

Tuhun vaha naçahyí Mateo sahá ña naçaja Jesucristo

Chichi naquixi Jesucristo

(Lc. 3:23-38)

¹ Ña yóho cúu quivi na naçacuu tásáhnú jícó Jesucristo, mé a naquixi chichi David xihín chichi Abraham:

² Abraham naçacuu tátá Isaac ta Isaac naçacuu tátá Jacob ta Jacob naçacuu tátá Judá xihín java ga ñani da.

³ Judá naçacuu tátá Fares xihín Zara ta náná ndíví da yóho naçananí ña Tamar. Ta Fares naçacuu tátá Esrom ta Esrom naçacuu tátá Aram. ⁴ Ta Aram naçacuu tátá Aminadab ta Aminadab naçacuu tátá Naasón ta Naasón naçacuu tátá Salmón. ⁵ Ta Salmón naçacuu tátá Booz, da cúu jahyi ña naní Rahab. Booz naçacuu tátá Obed ta Obed yóho naçacuu da jahyi ña naní Rut cán. Ta mé Obed yóho naçacuu tátá Isaí. ⁶ Ta Isaí naçacuu tátá rey David ta rey David yóho naçacuu tátá Salomón, da cúu jahyi ña naçacuu ñájíhí Urías nu cuítí cán.

⁷ Ta Salomón naçacuu tátá Roboam ta Roboam naçacuu tátá Abías ta Abías yóho naçacuu tátá Asa. ⁸ Ta Asa naçacuu tátá Josafat ta Josafat naçacuu tátá Joram ta Joram naçacuu tátá Uzías. ⁹ Ta Uzías naçacuu tátá Jotam ta Jotam naçacuu tátá Acáz ta Acáz naçacuu tátá Ezequías. ¹⁰ Ta Ezequías naçacuu tátá Manasés ta Manasés naçacuu tátá Amón ta Amón naçacuu tátá Josías. ¹¹ Ta Josías naçacuu tátá Jeconías xihín java ga ñani da. Ta naçacuu da tiempo tá natiin soldado na Israel já naçandaca ñahá da na cán ñuu Babilonia.

¹² Ta tá naçanduu na Israel ñuu Babilonia cán já naçacuu Salatiel ta tátá Salatiel naçacuu Jeconías. Ta Salatiel

naşacuu tátá Zorobabel. ¹³ Ta Zorobabel naşacuu tátá Abiud ta Abiud naşacuu tátá Eliaquim ta Eliaquim naşacuu tátá Azor. ¹⁴ Ta Azor naşacuu tátá Sadoc ta Sadoc naşacuu tátá Aquim ta Aquim naşacuu tátá Eliud. ¹⁵ Ta Eliud naşacuu tátá Eleazar ta Eleazar naşacuu tátá Matán ta Matán naşacuu tátá Jacob. ¹⁶ Ta Jacob naşacuu tátá José, da naşacuu yíi María. Ta María cúú ñá naşacuu náná Jesucristo, mé a naçindahá Ndióxi cacomí a cuéntá sahá ñayivi.

¹⁷ Ña cán queá janda tá naçasáhá cácu jahyi Abraham janda quiahva naixinu coo a quiví naçasáhá cácu jahyi David já nayaha uxu comi generación. Ta tá quiahva naçasáhá cácu jahyi David janda quiahva natiin na Babilonia na Israel já ñéhe ñahá na cuahan na nayaha inga uxu comi generación. Ta nayaha inga uxu comi generación nani naşandu na Israel ñuu Babilonia janda quiahva naixinu coo quiví naçacu Jesús, mé a naçindahá Ndióxi cacomí a cuéntá sahá ñayivi.

Tá naçacu Jesús

(Lc. 2:1-7)

¹⁸ Joho naşahiin tá naçacu Jesucristo: Mé María, ñá cacuu náná Jesús cán sa naşahan ñá tuhun ñá ña tандаha ñá xihín José. Joo tá cámaní coo da xihín ñá já naçandaa ini da ña ñúhu jahyi ñá. Ta ña yóho naşacuu a ña naçaja ínimá yii Ndióxi. ¹⁹ Ta José, da cacuu yíi María cán cúú dá da cája ndinuhu ña ndaa. Ta naçahan da ña naşahiin ñá xihín inga daṭaa joo coo naçeen da çahan núu da saha ñá nuú ñayivi. Sahá ña cán queá naşacu ini da jándacoo jehé da ña. ²⁰ Ta nani cáhvi ini da sahá ña caja da anda jávi naquixi in sani nu dá ta nandaca náha in táto Ndióxi nu dá. Ta tañu mé sani cán naçahan xihín dá. Já naçachi a já:

—José, da naquixi chichi David, a cáyihví tohún tандаhún xihín María jan jáchi naçaja ínimá yii Ndióxi ña

ñúhu jahyi ñá. ²¹ Ta tá sa nacacu jahyi María já chicaoan ndó quivi á ná cananí a Jesús jáchi jácacu a ñayivi nuú cuachi tá ná candeé ini na mé á —nacachi a.

²² Tóco ndihi ña yóho nayaha ña ná xinu coo nuú tuhun Ndióxi ña nacahyi in profeta sanahá ndivaha cán ta já nacachi da cán já:

²³ Vaxi quivi cañuhu jahyi in ñá tacú, ñá a ñáha coo taa xihín.

Ta tá sa nacacu jahyi ñá cán já cacu na quivi á cananí a Emanuel.

Ta tuhun yóho cúni cachi a: ín Ndióxi xoho.

²⁴ Ta tá nandicaxí ini José já nacaja da tá ín nacachi tátō Ndióxi cán xihín dá. Ta já natandaha dá xihín María.

²⁵ Joo coo nasahin da xihín ña tá quiahva ín in dataa xihín ñájíhí da janda quiahva cacu jahyi María. Ta tá nacacu a cán já nasacu José quivi á cananí a Jesús.

2

Tá naxito nihni na ndichí Jesús

¹ Ta nacacu Jesús in ñuu naní Belén ña ndácaan estado Judea. Ta mé tiempo cán nasacomí rey Herodes cuéntá sahá nación Israel. Ta mé tañu já naxinu coo java na ndichí ñuu Jerusalén. Mé na ndichí yóho cúú ná na jácuaha xihín quimi ta naquixi na chí nu cána candii.

² Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá ín da loho nacacu viti jan, da cacuu rey nuú na Israel. Jáchi naxini nde naqueta quimi nuú nde ta xihín rí yóho sa nacandaa ini nde ña sa nacacu da. Ta viti vaxi nde yóho caha cáhnu nde da —nacachi na ndichí cán ndáca tuhún na.

³ Ta tá naxini johu rey Herodes ña yóho já nacasáhá da ndíhi ndivaha ini da ta quiahva já nacasáhá ndíhi ini

tóco ndihi ñayivi ñuu Jerusalén cán. ⁴ Sahá ña cán quéa ñacana rey Herodes cán tóco ndihi ña sacuahá nuú jutu xihín ña jánahá ley Moisés cán. Ta já nandaca tuhún ña ña saha ndá ñuu cúu nu cáchí tuhun Ndióxi cacu ña ñasahan Ndióxi tuhun a chindahá a cacomí a cuénta sahá ñayivi. ⁵ Já ñacachi ña cán já xihín dá:

—Ñuu Belén, ña ndacaan estado Judea cán cúu nuú cáchí tuhun Ndióxi cacu ña jáchi quiahva já ñacahyí in profeta sanahá tá ñacachi ña já:

⁶ Vati ñuu Belén, ña ndacaan estado Judea, cúu á in ñuu loho ndivaha tañu ñuu náhnu cán joo ín sahá a, jáchi tañu ñayivi ñuu cán ndindita in ña cacomí cuénta sahá ña Israel, ña cúu cuénta Ndióxi, já ñacahyí in profeta sanahá.

⁷ Tá nandihí já ñacana xóo rey Herodes ña ndichí cán ta já nandaca tuhún ña ña cán saha ndá quivi ñanaha quimi cán mé rí nu ná. ⁸ Anda já ñachindahá ña ña ñuu Belén. Já ñacachi ña já xihín ná:

—Cuáhán ndo ñuu Belén cán ta ndaca tuhún vaha ndó ndaja cáa sahá ña loho ñacacu ñan. Ta tá sa nandiñehe ndó a já quixi ndó caxi tuhun ndó xihín i já ná cahun ri yehe va caha cáhnu i ña —ñacachi Herodes xihín ña.

⁹ Ta xihín ña yóho ñaquee ña ndichí cuahan tucu na. Ta quimi, rí ñaxini na nu cuítí cán já ndaca tucu rí ña cuahan ña. Ta tá ñaxinu rí chí nuú ín mé a loho cán anda já ñasacandichi rí. ¹⁰ Ta cájii ndivaha ini na tá xini ña mé quimi cán. ¹¹ Tá nandihí já ñaquihvi na ini vehe já ñaxini na mé a loho cán xihín María, náná a. Ta já ñacaxítí ña nu á ta já ñacaja cáhnu na ña. Ta tá nandihí já ñasuná ña yuhú sato ñehe na ta já ñajoco ña jihun cuáan nuú a xihín jusa vaha xihín in ña támi sahan naní mirra nu mé a loho cán. ¹² Tá nandihí já ñaquixi in sani nu ná ta xihín mé sani cán

naçachi Ndióxi xihin ná ña ná a ndicó coo na chí nu ñin rey Herodes. Sahá ña cán quéa nandijama na íchi cuánúhu ná ñuu na.

Tá ñéhe na Jesús cuahan na Egipto

¹³ Ta tá sa naquee na ndichí cán cuahan na já naquixi in sani nuú José ta nandaca náha in táto Ndióxi nu dá. Já cáchi a já xihin dá:

—Cuándacoún ndiquehe ña loho jan xihín María, náná a ta cunún cuhun xihin ná chí ñundáhyi nación Egipto. Ta cán coún xihin ná janda quiahva ná çaxi tuhun i xuhun. Jáchi caca nuu Herodes ndinducú da ña loho jan ña cahní ñahá da —naçachi táto Ndióxi cán xihín José.

¹⁴ Anda já nandacoo José já naquee da Jesús xihín María, náná a já naqueta ñuu na cuahan na chí Egipto.

¹⁵ Ta cán nasanduu na janda quiahva naxihí Herodes. Tóco ndihi ña yóho nayaha já ná xinu coo nuú tuhun naçachi Ndióxi sanahá tá naçahyí in profeta já: “Nasahin jahyi i nación Egipto ta naçana i da ná ndicó coo da”, cáchi tuhun Ndióxi.

Tá nasahnda Herodes chuun ña ná cahní na na valí

¹⁶ Ta ndaja coo naxini Herodes cán ña najándahvi na ndichí cán da sahá ña coo naxinu ga na nu dá. Ña cán quéa a juú quiahva naxojo ini da. Ta chí nasahnda da chuun ña ná cahní ndihi na ña valí, na ivi cuia chí ninu, mé na ndúu ñuu Belén xihín ñuu valí catáhan xihin á. Jáchi sa naçaxi tuhun na ndichí cán xihin dá ña naxini na mé quimi anda tátuhun ivi cuia. ¹⁷ Ta tá nandihí naxihí na valí yóho já naxinu coo nuú tuhun naçahyí profeta Jeremías sanahá ndivaha tá naçahyí da já:

¹⁸ Ñuu Ramá jandá joho ndáhví tácu

cáyuhú cóhó ñáñáha sácu ñá.

Ta ñá sácu yóho cúu ñá Raquel. Sácu ñá sahá jahyi ñá.

Ta cō cúnĭ ñá ndĭco ini ñá jáchi naxĭhi jahyi ñá, cáchĭ tuhun Ndióxi.

¹⁹ Joo tá sa naxĭhi Herodes já naquixi tucu sani nuú José nu ĩn da nación Egipto cán. Ta nandaca náha in táto Ndióxi nu dá já cáchĭ a já xĭhin dá:

²⁰ —Cuándacoun ta ndiquehe Jesús xĭhin María, náná a ta cuáhán ndicó cōo xĭhin ná chí ñundáhyĭ Israel. Jáchi sa naxĭhi va na ndúcú cahní ña loho jan —cáchĭ táto Ndióxi.

²¹ Anda já nandicoo José ta ñéhe da Jesús xĭhin María, náná a cuáhan na ndicó cōo na chí ñundáhyĭ Israel. ²² Joo tá ñañehe da tuhun ña nandicojo Arquelao chuun cacuu da rey nu Herodes, tátá da já nayihví José cuhun da chí estado Judea. Ta sahá ña sa naçaxi tuhun táto Ndióxi tañu sani nu dá sahá ña cán quea nandijama da íchĭ ta cuáhan da chí estado Galilea. ²³ Ta naxĭnu cōo na in ñuu naní Nazaret nuú nasanduu na. Ta xĭhín ña yóho naxĭnu cōo nuú tuhun naçahyĭ na profeta sanahá ña cacuu Jesús da ñuu Nazaret.

3

Tá naçasáha Juan, da jácandúta ñayivi cáhan ndojó da yucú íchĭ cán

(Mr. 1:1-8; Lc. 3:1-9, 15-17; Jn. 1:19-28)

¹ Mé tiempo cán Juan, da jácandúta ñayivi naxĭnu da yucú íchĭ cuéntá estado Judea cán. Ta naçasáha jánaha da ñayivi. ² Já cáchĭ da já xĭhin ná:

—Xínĭ ñúhú jándacoo ndó ña núu cája ndó ta ndicó cōo ini ndó nu Ndióxi jáchi sa naçayati quĭvi cacomí Ndióxi cuéntá sahá ñayivi —cáchĭ da xĭhin ná.

³ Mé Juan yóho cúú dá da naçahan profeta Isaías saha tá naçahyĭ da já:

Vaxi quĭvi tá çahan cóhó in da tañu yucú íchĭ ta cachi da já xĭhín ñayivi:

“Caja tiaḥva ndó íchī nuú quixi xitoho í, ta cuná ndó in íchī ndacú nu mé á ña ná ndihvi a ínima ndo”, cáchí tuhun Ndióxi.

⁴ Ta jáhma nasandixi Juan yóho nasacuu a ña nacavaha na xihin íji camello ta nasandico in nií jáhndá tóco da. Ta naxixi da tica xihín ñuñu yúcu. ⁵ Ta naqueta ñayivi ndúu ñuu Jerusalén xihín na ndúu estado Judea xihín na ndúu ñundáhyi yati yuta Jordán cán nasaa na nu Juan taa johona na nu cáhan da. ⁶ Ta tá nanahma na cuachi na nu Ndióxi já najácandúta Juan na ini yuta Jordán.

⁷ Joo tá naxini Juan ña janda johona xínu coo cuahá na fariseo xihín na saduceo nu dá ña ná jácandúta da na já nacasáhá xójo ndivaha ini da ta já nacachi da já xihin ná:

—Mé ndó cúu ndó tátuhun coo jáchī cúu ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. ⁸ Xíní ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna. ⁹ Ta a cáhán ndo ña jácacu Ndióxi ndohó sahá ña cúu ndó na naquixi chichi Abraham. Jáchī coo saha toho ña jan nu Ndióxi tá co jándacoo ndó cuachi ndó. Jáchī mé a ndaa ná cáhan i xihin ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. ¹⁰ Mé ndó cúu ndó tátuhun in yíto, dó sa natiin na hacha cuahan na cahnda na. Ta tóco ndihi yíto, dó co sahan cuíhi vaha nuu, tahnda do ta quee dó nu ñúhu cayi do. Quiahva já caja ri Ndióxi xihin ndó tá co cúnī ndó ndicó coo ini ndó nu mé á. ¹¹ Mé a ndaa cája ndúta i ndóhó xihín ticuif ta xihín ña yóho náha ña nandicó coo ini ndó nu Ndióxi. Joo vaxi inga da ta da cán cúu da jándicutú ínima ndo xihin ínima yii Ndióxi ta ña cán cacuu a tátuhun ñúhu cayi. Ta da cán iin cuahá chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa da. ¹² Mé

da vaxi cán caxi da ñayivi vaḥa tañu ñayivi quini. Cúu á tátuhun in dataa tá jáxixi da trigo xihín pala já ná quee xeḥe á já cacu vaḥa da ña. Ta xeḥe ñacana cán cuhun a çayi a xihín ñúhu ita ña a ndáhva toho —cáchi Juan xihín na cán.

Tá ñacandúta Jesús

(Mr. 1:9-11; Lc. 3:21-22)

¹³ Naḥee Jesús chí estado Galilea cuḥan yuta Jordán nu ndácaan Juan jácandúta dá ñayivi ña ná jácandúta da mé á. ¹⁴ Joo nu cuítí coó ñaxeen toho Juan jácandúta dá Jesús. Ña cán quea ñacachi da já xihín Jesús:

—Yóhó cúu da ndítahan jácandúta yeḥe. Ta cáa joho vaḥun yóho ña ná jácandúta i yohó —ñacachi Juan cán xihín Jesús.

¹⁵ Já nanducú nehe Jesús tuhun nu dá já ñacachi a já xihín dá:

—Candehé. Quiḥva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña ñasacu ini Ndióxi coo —ñacachi a.

Xihín ña yóho ñacandúsa Juan ta chí najácandúta dá Jesús. ¹⁶ Ta tá nandihí ñacandúta Jesús já ñaqueta ini ticuí cán. Anda já nanuna indivi ta ñaxini Jesús ñanuu ínima yii Ndióxi jatá ta ñasacaá tá quiḥva cáa in ndijata. ¹⁷ Tá nandihí já ñaxini joho a cáhan in a indivi ta já cáchi a cán já:

—Yóhó cúun jahyi maní i ta cájii ndivaha ini i xuhun —ñacachi a.

4

Xíto ndojó tiñáhá sacuḥa Jesús

(Mr. 1:12-13; Lc. 4:1-13)

¹ Tá nandihí já ndáca ínima yíi Ndióxi Jesús cuahan chí yucu íchí nuú cō ndúu ñayivi já ná coto ndojó tiñáhá sacuahá mé á.

² Ta cán nasahijn a tixi ivi jícó quivi. Nuu ta ndiví cōó naxixi a ta tá nandihí já naxinu joco nu á. ³ Já nacayati tiñáhá sacuahá nuú Jesús ña coto ndojó ñahá ri já nacachi rí já xihin á:

—Tá ta jivi ndusa jahyi Ndióxi cúun cahnda chuun ña ná nduu yuu yóho pan —nacachi rí cán xihin Jesús.

⁴ Anda já nacachi Jesús já xihin rí:

—Já cáchí tuhun Ndióxi: “A juú pan cuití cuxu ñayivi já catacu na, vaḥa. Xíní ñúhú ri a caja na ña sáhdá tuhun Ndióxi nu ná já queá cuu catacu na nu Ndióxi” —nacachi Jesús xihin rí.

⁵ Tá nandihí já ndáca tiñáhá sacuahá cán Jesús cuahan xihin rí ñuu Jerusalén, ña yíi cán ta já najándaa rí a nu jícó jiní veñuhu cáhnu ndácaan cán. ⁶ Ta já nacachi rí já xihin á:

—Tá ta jivi ndusa jahyi Ndióxi cúun jácana mún chí ninu jáchí já cáchí tuhun Ndióxi: Cahnda Ndióxi chuun nu tátō mé á ña ná candaa na yohó. Ta ndinehe ndáha na yohó, já queá ná a ndícuehe saḥun tá ná cachihin saḥun xihin yuu, já cáchí tuhun Ndióxi —nacachi rí xihin Jesús.

⁷ Ta já nanducú nehe Jesús tuhun nu rí já nacachi a já xihin rí:

—Cáchí tucu tuhun Ndióxi já: “A coto ndojó tohún Ndióxi, xitohún” —nacachi Jesús xihin ri.

⁸ Ta tá nandihí já ndáca tucu tiñáhá sacuahá cán Jesús nasahan xihin rí in jiní yúcu jícó ndivaḥa. Ta já nanaha rí ndaja táhan ñuu ndúu ñuyíví nu á ta najánaha rí tóco ndihí ña náhnu ndúu cán nu á. ⁹ Ta já nacachi tucu rí já xihin Jesús:

—Tóco ndihi ña yóho quiahva i nuun tá ná caxítún nuú i caja cáhnún yehe —ñacachi rí quini cán xihín Jesús.

¹⁰ Anda já ñacachi Jesús já xihín rí:

—Satanás, cuáhán caxoo jáchi já cáchi tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —ñacachi Jesús xihín rí cán.

¹¹ Tá nandihí já ñacaxoo tiñáhá sacuahá cán cuahan ri. Ta já naxinu java táto Ndióxi chindeé na Jesús.

Tá ñacasáhá cáxi tuhun Jesús tuhun Ndióxi nuú na estado Galilea

(Mr. 1:14-15; Lc. 4:14-15)

¹² Tá ñanehé Jesús tuhun ña ñachicaan na Juan, da jácandúta ñayivi vecaa já ñaque a cán cuahan chí estado Galilea. ¹³ Joo coó ñacandoo a ñuu Nazaret chí ñaque a cuahan coo a chí ñuu Capernaum ña ndácaan yuhú tañuhú, dó ndácaan ñundáhyi cuénta na ñaquixi chichi Zabulón xihín na ñaquixi chichi Neftalí. ¹⁴ Tóco ndihi ña yóho ñayahá ña ná xinu coo nuú tuhun ñacahyí profeta Isaías sanahá tá ñacahyí da já:

¹⁵ Ñayivi ndúu ñundáhyi Zabulón xihín na ndúu ñundáhyi Neftalí,

ña ñúhu inga xoo yuta Jordán yati yuhú tañuhú,
ta jári na ndúu Galilea, mé estado nu ndúu ñayivi, na co
cúu chichi Israel,

¹⁶ mé na cán ñasanduu na nuú naá ndivaha ta viti naxini
na in ñaha yehe ndivaha.

Jándiyehé á nu ná ña ná a quíví na,
joo catacu na anda ama cáa quivi nu ín Ndióxi, ñacahyí
Isaías sanahá.

¹⁷ Ta chí mé tiempo já ñacasáhá Jesús cáhan ndojó a nuú ñayivi ta já cáchi a já xihín ná:

—Xíni ñúhú jándacoo ndó cuachi cája ndó ta ndicó ɔo ini ndó nu Ndióxi jáchi sa nacayati quiví cacomí a cuéntá sahá ñayivi —nacachi Jesús.

Tá cána Jesús comí da tává tiyacá ña ná caca tuun da xihin á

(Mr. 1:16-20; Lc. 5:1-11)

¹⁸ Tá xíca Jesús cuahan yuhú tañuhú Galilea, nandinehé a ivi taa, da cúú ñani. In da naní Simón ta cáhan na Pedro xihin dá. Ta da inga cán naní da Andrés. Ndíví da yóho cúú dá da tává tiyacá ta ñúhu na jácana na ñúnu ná ini tañuhú cán. ¹⁹ Já nacachi a já xihin ndíví da:

—Naha quíí ndó candico ndó yehé caca tuun ndó xihín i. Tává ndó tiyacá viti joo caja i ña ná cuu tavá ndo ñayivi tañu cuachi —cáchi a.

²⁰ Ta chí ivi laá najándacoo da ñúnu da ta nandico da Jesús.

²¹ Ta nani xíca Jesús cuahan chága chí nuu já naxini a inga ivi tucu taa, da cúú ñani. In da naní Jacobo ta inga da naní Juan, da cúú jahyi Zebedeo. Ta ndíví mé da yóho ñúhu da ini barco da xihin tátá da ndája vaha da ñúnu dá. Ta nacana Jesús ndíví da yóho. ²² Ta chí ivi laá najándacoo da barco da xihin tátá da ta nacasáhá xíca tuun da xihín Jesús.

Jánaḥa Jesús nuú cuḥá ndivaha ñayivi

(Lc. 6:17-19)

²³ Níí cúú estado Galilea naxica nuu Jesús cáhan tuhun vaha nuú ñayivi ini veñuhu in in ñuu cán. Cáxi tuhun a nu ná ña sa nandindaa quiví cacomí Ndióxi cuéntá sahá ñayivi ñuyiví. Ta nandaja vaha Jesús na quíhvi tá nuú cueḥe ndóho na. ²⁴ Ta níí cúú ñundáhyi cuéntá Siria nandicuíta nuu tuhun sahá ña cája Jesús. Sahá ña cán queá néhe na na quíhvi, na ndóho tá nuú cueḥe vaxi na nu á ña ná ndaja vaha mé á na ta néhe na na ñúhu ínima

quini ini xínu nā nū á ta ndijáá nā xíhi yíhí xihín nā quíhví sahā néhe na vaxi na nuú Jesús. Ta nandaja vaha mé á nā.

²⁵ Ta cuahá ndivaha ñayivi ndíco nā Jesús. Cúú ná nā naquixi estado Galilea xihín nā ndúu uxu ñuu cuéntá Decápolis xihín nā ñuu Jerusalén xihín nā estado Judea xihín nā naquixi ñundáhyi chí xoo oriente nū ndácaan yuta Jordán cán.

5

Tá cáhan ndojó Jesús jini yúcu

(Lc. 6:20-23)

¹ Tá naxini Jesús ñā ndíco cuahá ndivaha ñayivi mé á já nandaa jini yúcu ta já nasacoo a cán. Ta nacayati nā xíca tuun xihín á nū á. ² Ta já nacasáhá jánahā nū tóco ndihi nā ndúu cán já nacachi a já xihín ná:

³ —Tāhví nacuu ñayivi tá ndícuni na xíní ñúhú nā ñā chindeé Ndióxi nā jáchi nā cán cúú nā cacomí Ndióxi cuéntá sahā.

⁴ 'Tāhví nacuu nā ndúu cuéha jáchi nā cán cúú nā quiahva Ndióxi tuhun ndéé ini.

⁵ 'Tāhví nacuu nā cō ndíñehe jíco mé jáchi nā cán cúú nā ñehe táhví ndiquehe na ñā nasahan Ndióxi tuhun a quiahva nū ná.

⁶ 'Tāhví nacuu nā xíca ini caja ñā cúní Ndióxi. Nā cán cúú nā caja Ndióxi ñā ná xínu nūú ñā cúú ini na.

⁷ 'Tāhví nacuu nā cándáhví ini sahā ñayivi jáchi nā cán cacuu na cándáhví ri ini Ndióxi sahā.

⁸ 'Tāhví nacuu nā cō ndácaan quini ínima jáchi nā cán cúú nā cuni Ndióxi.

⁹ 'Tāhví nacuu nā ndíhi ini ñā ná coo vaha na xihín ñayivi jáchi nā cán cúú nā cáchí Ndióxi cúú ná jahyi mé á.

¹⁰ 'Tahví ñacuu ña ndóho ini sahá ña cája na ña sáhndá Ndióxi nu ná cajú na jáchi ña cán cúú ña cacomí Ndióxi cuéntá saha.

¹¹ 'Tahví ñacuu ndó tá cánahá ñayivi xihín ndó ta cája xíxi na xihín ndó sahá ña cándeé ini ndó yehe. Ta tahví ñacuu ndó tá jácojo na cuachi jíquí jatá ndó sahá ña cándeé ini ndó yehe.

¹² 'Xíní ñúhú cajii ndivaha ini ndó ta coo vaha ini ndó jáchi ndiquehe ndó in ña vaha ndivaha cajú Ndióxi indiví. Xíní ñúhú ndicuhun ini ndó ña quiahva já nacaja xíxi na xihín ña profeta, ña nasanduu sanahá.

Cúú yó tátuhun ñúhú jándiyehé nuú ñayivi ñuyíví

(Mr. 9:50; Lc. 14:34-35)

¹³ 'Mé ndó cúú ndó tátuhun ñii yívi na. Sa xíní ndó ña cája ñii ña ná ndihají ñaha xíxi ndó. Ta quiahva já cája ndó xihín ñayivi ñuyíví. Joo tá ná ndihi ña ohva ñii cán a cúu ga ndicó coo a cahohva tucu a sahá ña cán queá jandá cuíta va íchi cuani nihni ñayivi ña jáchi coó chuun toho a.

¹⁴ 'Jári mé ndó cúú ndó tátuhun ñúhú jándiyehé nuú ñayivi ndúu ñuyíví. Ta mé ñúhú cán cúú á tátuhun in ñuu cánúu jatá in yucú jícó ta a cúu toho ndácaan jehé a.

¹⁵ Jáchi co chíñúhú ná in lámpara ta tá nu ndíhí já chíjehé ña ña tixi in sato. Ña cája na xihín á queá chínúu jícó ña ña já ná jándiyehé a nu tóco ndihi ña ndúu vehe. ¹⁶ Quiahva já xíní ñúhú ndihi ini ndó cajú vaha ndó ña ná cacuu ndó tátuhun in ñúhú cáyi nuú ñayivi. Jáchi tá ná cuni na ña vaha cája ndó já queá cuu cajú cáhnu na Ndióxi, tátá yo, ña ín indiví.

Jánañá Jesús saha ley Moisés

¹⁷ 'A juú cahán ndó ña ñaquixi i ñuyíví yóho ña cacu xóo i ña nasahnda ley Moisés xihín ña najánañá ña profeta, vaha. Co váxi toho i cacu xóo i ña. Vaxi i nu ndó jáxinu coo

i tóco ndihi ña cáchí mé ley já ná ñaha i nu ndó ndía cúu ndusa ña. ¹⁸ Mé a ndaa ná cahan i xihín ndó ña a ndíhi saha mé ley nani ín indiví xihín ñuyíví yóho. Ni in túhún toho tuhun, a ndíhi saha janda quiahva ná yaha tóco ndihi ña ndítahan yaha. ¹⁹ Sahá ña cán queá ndá na co cúni caja ña sáhndá ley Moisés vatí cúu á ña loho ndivaha ta ni co cúni na jánaha na ñayivi ña ná caja na ña cáchí a já queá cacuu na in na coo cuaha saha tañu na cacomí Ndióxi cuéntá saha. Joo na cája ña cáchí mé ley ta jánaha na ñayivi ña ná caja na ña, mé na cán cacuu na na cáhnu ndivaha tañu na cacomí Ndióxi cuéntá saha. ²⁰ Mé a ndaa ná cahan i xihín ndó ña tá ná caja cuití va ndó tá quiahva cája na jánaha ley Moisés xihín na fariseo já queá a cuú ndihvi ndó nuú cacomí Ndióxi cuéntá sahá ñayivi.

Jánaha Jesús ña co ndítahan cojo ini ñayivi
(Lc. 12:57-59)

²¹ Mé ndó sa xíni ndó ña nacachi Moisés xihín tásáhnu jícó ndó sanahá tá nacachi da já: “A cáhni ndó ndíi jáchí ndá na ná cahni ndíi tandaa quívi caja víi jutixia saha ná.”
²² Joo yehe cáchí i xihín ndó viti ña ndá na ná caja cuehe xihín ñani táhan na tandaa quívi caja víi jutixia saha ná. Ta jári na cánahá xihín ñani táhan na, á cáchí na cúu ná ñayivi tachi já vaxi quívi tá candichi na nu juéxe cáhnu ta cuu cuhun na indayá sahá.

²³ Sahá ña cán queá tá ta ñéhe ndó in ñaha cuahan ndó joco ndó nu náa Ndióxi ta nani cuahan ndó cán ndicuhun ini ndó ña ín in ñani táhan ndó ta co cúni táhan vaha na xihín ndó ²⁴ já queá mé jan yati nu náa ndítahan jándacoo tóo ndó ña ñéhe ndó joco ndó jan. Ta ndítahan quee ndó cuhun ndó ndique táhan máni ndó xihín ñani táhan ndó cán. Ta tá ná ndihi já cuu ndicó coo tucu ndó nu náa Ndióxi joco ndó ña najándacoo ndó jan.

²⁵ 'Tá sácú in na saha ndó cūhūn ndó vecaa ta cúnī nā candaca na ndohó cūhūn ndó nū juéxe, xínī ñíhú nducú ndó ndá quiahva ndique táhan mánī ndó xihīn ná nani núná nū ndó caja ndó ña. Já quea ná a ndiquiahva nā cán ndohó ndáha juéxe jáchī cuu ndiquiahva juéxe cán ndohó ndáha nā policia ta chicaoan nā ndohó vecaa. ²⁶ Mé a ndaa cáhī ī xihīn ndó ña cañuhu ndó cán janda quiahva ná chahvi ndó tóco ndihi jihún yíca ndo.

Jánaḥa Jesús sahá cuachi cája in dataa tá cúnī da coo da xihīn in ña cō cúu ñájíhī da

²⁷ 'Mé ndó sa xínī ndó ña nasahnda ley Moisés chuun sanahá ta já nacachi a já: “Coto a cóo ndó xihīn ñájíhī á yí ñani táhan ndó.” ²⁸ Joo yehe cáhī ī xihīn ndó viti ña ndá da sándehe in ñáñáha ta cáhvi núu ini da xihīn ña já quea cómī tá cómī da cuachi nū Ndióxi jáchī cúu á tátuhun sa ín da xihīn ña.

²⁹ 'Ña cán quea cáhī ī xihīn ndó ña tá nduchú núu cuáha ndó quea jándacava ndohó nuú cuachi, tavá ndó ña jácana xíca ndó ña ná cūhūn a jáchī vaha chága ña ná ndihi sahá in nduchú núu ndó a juú ga ña ná cūhūn in ní yiquí cuñu ndó ini indayá. ³⁰ Ta tá ndahá cuáha ndó quea caja ña ná ndacava ndó nuú cuachi, chitūhūn ndó ña ta jácana xíca ndó ña ná cūhūn a jáchī vaha chága ná ndihi saha ndáha ndo a juú ga ña ná cūhūn ní yiquí cuñu ndó ini indayá.

Jánaḥa Jesús ña cō ndítahan nuú dataa jándacoo da ñájíhī da

(Mt. 19:9; Mr. 10:11-12; Lc. 16:18)

³¹ 'Ta mé ndó sa xínī ndó ña nasahnda ley Moisés chuun sanahá já cáhī a já: “Ndá da cúnī jándacoo ñájíhī da ndítahan cavaha da in tutu quiahva da nu ña ta sa ín vaha va cuu jándacoo da ña.” ³² Joo yehe cáhī ī xihīn ndo viti

ñã ni in túhún toho ɬa ɬo ndítahan jándacoo da ñájíhí da. Jáchí ndá da jándacoo ñájíhí da cája da ñã ná caja ñã cuachi tá ná tandaha tucu ñá. Jári da tándaha xihín ñá cómí ri da cuachi nu Ndióxi. Joo tá ná candaã ini da ñã ín ñájíhí da xihín inga dataa já queã cuu ndusa jándacoo da ñã.

Jánaḥa Jesús ñã ndítahan caja na tá sáhan na tuhun na nuú ñayivi

³³ Mé ndó sa xíní ndó ñã ñasahnda ley Moisés chuun sanahá já cáchí a já: “Xíní ñúhú jáxiṇu ɬoo ndó tóco ndihi ñã ñasahan ndó tuhun ndó caja ndó tá tává ndo quivi Ndióxi.” ³⁴ Joo yehe cáchí i xihín ndó viti ñã ná quiahva ndó tuhun ndó nuú ñayivi joo a tává ndó quivi ni in ñaha. A tává ndó quivi indivi jáchí indivi cúú nu ín coo Ndióxi. ³⁵ Ta ni a tává ndo quivi ñundáhyi jáchí ñundáhyi cúú nu sání mé á ta ni a tává ndo quivi ñuu Jerusalén jáchí cúú á ñuu naçaxi Ndióxi, mé á cúú á rey cáhnu ndivaha. ³⁶ Ta ni a tává ndó quivi yiquí jíní ndó tá sáhan ndó tuhun ndó nuú ñayivi jáchí ɬo ndéé ndó ndaja yaa ndó á ndaja tuún ndó ni in túhún íjì jini ndo. ³⁷ Tá sáhan ndó tuhun ndó nuú ñayivi xíní ñúhú cachi ndó: “Ajan, caja i ñã.” Á tá ɬoó xíní ñúhú cachi ndó: “Uhun, a cuú caja i ñã.” Jáchí tá cachi ndó inga tuhun já caja ndó ñã cúni ñã quini.

Jánaḥa Jesús ñã ndítahan caja cáhnu ini saḥa táhan ñayivi (Lc. 6:29-30)

³⁸ Mé ndó sa xíní ndó ñã ñasahnda ley Moisés chuun sanahá já cáchí a já: “Tá quiahva cája ñayivi xuhun quiahva já caja ri yóhó va xihín ná. Ta tá ná caní in da nduchú núún já queã ndítahan caní mún nduchú núú da. Tá ná tavá da nuhún já ndítahan nuun tavá ri yóhó va nuhú da”, cáchí ley Moisés. ³⁹ Joo yehe cáchí i xihín ndo viti: A cája ihvi ndó xihín ñayivi, na cája núu xihín ndo. Ta ndá na ná caní in xoo sajóho ndó, cata ñee ndó inga

xoo sajóho ndó nū ná ña ná cani na a. ⁴⁰ Ta tá cúní in na candaca na ndohó cūhun ndó nū juéxe sahá ña cúní na candaa na cotó ndo já quéa quiahva ndó ña nū ná ta janda cotó ndéé ndo quiahva ndó nū ná. ⁴¹ Ta tá vaxi in soldado nū ndó ta tá cahnda da chuun ña ná cojo ndó ñaha da in kilometro, xíní ñúhú cojo ndó ña anda ivi kilometro cūhun ndo. ⁴² Ta ndá na ná caça in ñaha nū ndó quiahva ndó ña nū ná. Ta ndá na xíca too ñaha nū ndó, quiahva too ndó ña nū ná.

Xíní ñúhú quihvi iní na co cúní mí

(Lc. 6:27-28, 32-36)

⁴³ Mé ndó sa xíní ndo ña nasahnda ley Moisés chuun sanahá já cáchí a já: “Quihvi ini ndó na xíní táhan vaha xihín ndó ta candají ndó na co cúní táhan xihín ndo”, cáchí ley Moisés. ⁴⁴ Joo yehe cáchí i xihín ndo viti: Ndítahan quihvi ini ndó na co cúní táhan xihín ndó. Ta cahan vaha ndó xihín na canahá xihín ndó. Ta caja vaha ndó xihín na candají ndohó. Ta caça tahví ndó nū Ndióxi sahá na cája xíxi xihín ndo. ⁴⁵ Jáchi xihín ña yóho náha ña cúu ndó jahyi Ndióxi, tátá yo, mé á íin indiví. Ta mé á cája ña ná cana candii jatá ñayivi quini xihín jatá ñayivi vaha. Ta mé á jácuun javi jatá ñayivi ndaa xihín jatá na co cája vaha. ⁴⁶ A cáhán ndo ña caja Ndióxi cuahá ñamaní xihín ndo tá quihvi ini cuití ndó na quihvi ini ndohó va jáchi janda ñayivi quini, na jataca jiuhún cuéntá impuesto cája na já. ⁴⁷ Ta a cáhán ndo ña nacaja ndó cuahá ña vaha tá ná cahan Ndióxi cuití ndó xihín ñani táhan ndó jáchi janda ñayivi co xíní Ndióxi cája na já. ⁴⁸ Xíní ñúhú caja ndaa ndó xihín tóco ndihi ñayivi tá quiahva cája ndaa Ndióxi, tátá yo, mé a íin indiví —nacachi Jesús.

6

Jánaḡa Jesús ña ndítahan chindeé yo na ndahví

¹ Já ñacachi tucu Jesús já:

—A ndúcu ndó caja vaha ndó nuú ñayivi sahá ña ná cuni táhyí na ña cája ndó já candoo vaha ndó nu ná. Jáchi tá ná caja ndó já coo toho ñaha ñehé táhvi ndó nu Ndióxi, tátá ndo íin indiví. ² Sahá ña cán queá tá chindeé ndó ñayivi, na ndímaní ñaha nuu, a cáca nuu ndó cahan lándá ndó ña nuú ñayivi tá quiahva cája na co cúu ná tá quiahva ndáa na. Jáchi na cán sahan na ñaha nuú na ndahví ini veñuhu xihín nu táca ñayivi íchi já ná cuu cuni táhyí tóco ndihi ñayivi ña vaha cája na. Jáchi na cán cuni na ña ná caja cáhnu ñayivi na. Mé a ndaa cáchí i xihín ndó ña sa yahvi na cúu mé ña cája cáhnu ñayivi na. ³ Ña ndítahan caja ndó tá chindeé ndó na ndímaní ñaha nuu queá caja ndó ña ná a cándaá ini ni in ñayivi ña cája ndó ⁴ ta xíní núhú caja jehé ndó ña. Ta Ndióxi, tátá ndo sándehe a ña vaha cája ndó xihín ñayivi ta mé á queá chahvi a sahá ña cája ndó jan.

Jánaha Jesús ñayivi ndaja cacá tahví na nu Ndióxi
(Lc. 11:2-4)

⁵ Tá xíca tahví ndo nu Ndióxi a cája ndó tá quiahva cája na co cúu ná tá quiahva ndáa na jáchi cátóo na candita na veñuhu xihín cáyé ña cacá tahví na nu Ndióxi ña ná cuni táhyí ñayivi na. Mé a ndaa ná cahan i xihín ndo sa yahvi na cúu mé ña xíní ñayivi na. ⁶ Joo ndóhó, tá xíca tahví ndó nu Ndióxi, tátá ndo íin indiví ndítahan quihvi ndó ini vehe ndó ta chicaji tuun ndó yéhe a ta jan cuu cacá tahví jehé ndo nu Ndióxi. Jáchi jan íin Ndióxi, tátá ndo xihín ndo taa joho a nu cáhan ndo ta caja mé á ñamaní xihín ndó.

⁷ Ta tá xíca tahví ndó nu Ndióxi, a cáhan tucu tucu ndó mé tuhun ña coo saha jáchi ñayivi, na co xíní Ndióxi cán cája na já. Ta cáhan na táa joho Ndióxi na sahá ña cuaha cáhan na joo a juú ña ndaa. ⁸ Joo a cája ndó tá quiahva cája na cán jáchi Ndióxi, tátá ndo sa xíní va mé á ndá queá xíní

ñúhú ndo janda tá cámani caça ndó ña nu á. ⁹ Ña yóho queá ndítahan cachi ndó tá xíca tahví ndó nu Ndióxi:
Tátá Ndióxi, ña íin indiví,
cáhnú ná cacuu quivi ndó.

¹⁰ Ná tandaa quí quivi cacomí ndó cuéntá sahá nde.
Ta ná coo tá íin cúní mé ndó coo ñuyiví yóho tá quiahva
íin indiví cája ndó.

¹¹ Quiahva ndó nuú nde ña ndímaní nuú nde cuxu nde in
in quivi.

¹² Caja cáhnú ini ndó sahá cuachi nde tá quiahva cája
cáhnú ini mé nde sahá ña núu cája ñayivi xihín
nde.

¹³ Ta a quiahva ndó ñamani ña ná coto ndojó tiñahá
sacuahá ndehe já ná a cája nde cuachi nu ndó.

Jáchí cómí ndó cuéntá saha tóco ndihi ñayivi,
ta cúu cája ndó tóco ndihi ñaha,
ta cáhnú cúu mé ndó andá ama cáa quivi.

Já ná coo, quiahva já cachi ndó tá xíca tahví ndó nu Ndióxi.

¹⁴ Jáchí tá cája cáhnú ini ndó sahá ña núu cája inga na
xihín ndo já queá caja cáhnú ri ini Ndióxi, tátá ndo, mé a
íin indiví sahá ndo. ¹⁵ Ta tá co cúní ndo caja cáhnú ini ndó
sahá ña núu nacaja inga na xihín ndo já queá a cája cáhnú
ini Ndióxi sahá cuachi cája ndó.

Jánaḡa Jesús ndaja ndítahan caja na tá cajuhun na

¹⁶ Tá cajuhun ndó a cája ndó tá quiahva cája na co
cúu ná tá quiahva ndaa na. Na cán cúní na ña ná cuní
táhyí tóco ndihi ñayivi ña xíjuhun na sahá ña cán queá
cája cueḡa nuu na já ná ndiñehe jícó ñahá na. Mé a ndaa
cáché i xihín ndo ña sa yahvi na cúu ña xíní ñayivi na.

¹⁷ Joo ndóhó, tá ná cajuhun ndó ndítahan cuchú nuú ndo
ta ndaja vií ndó mé ndó. ¹⁸ Já queá ná a cúní ñayivi ña
xíjuhun ndó ta in túhún Ndióxi, tátá ndo, mé a íin tuun

xih̄in ndó cándaḡ ini ña mé a ndaa xíjuhun ndó ta mé á queá cháhvi a sahá ña cája ndó jan.

Indiví cúu nu ndítahan ndaja tútú ñayivi ña vaha

(Lc. 12:33-34)

¹⁹ 'A ndúcú ndó játaca cuahá ndivaha ndó ña cuicá canduu nu ndo ñuyiví yóho jáchi yóho cúu nu quihvi tiqijí ñaha ndó jándihi rí sahá ta já tívi ndihi ñaha ndó. Ta jári cuu quihvi ta cuíhná caja cuíhná da ña. ²⁰ Vaha chága ná játaca ndó ña vaha indiví jáchi cán coo quihvi toho tiqijí jándihi rí sahá ñaha ndó. Ta mé cán ni in ñaha co tívi ta ni ta cuíhná a cúu ndihvi caja cuíhná. ²¹ Jáchi nuú nandaja tútú ndo ña ndáyahvi nu ndó, cán coo ri ínima ndo.

Nduchú núu yo cúu á tátuhun lámpara ña jándiyehē nu xica í

(Lc. 11:34-36)

²² 'Nduchú núu yo cúu á tátuhun in lámpara jándiyehē nu yó já xíní yo nu xica í. Ta tá tívi vaha nduchú núu yo já cuu candehé vaha í nu xica í. ²³ Joo tá co tívi nduchú núu yó já queá xica yó nu naá ndivaha. Ta tá cáhán yo ña cúu yó na xica nu yehē ndivaha ta cáa ví yó cája í cuachi já queá cúu yó tátuhun na xica nu naá ndivaha.

In ñaha cúu Ndióxi ta inga ñaha cúu jjuhún

(Lc. 16:13)

²⁴ 'Ni in túhún ñayivi a cúu caja chúun nuú ivi xitoho na jáchi candají na in xitoho na ta inga xitoho na quihvi ini chága na. Á tá coo ta caja ndíví vaha na chuun nuú in xitoho na ta inga na cán a cája chúun vaha na nuu. Ta quiahva já iin ri xih̄in ndóhó va jáchi a cúu caja cáhnu ndó Ndióxi tá chínuu ndó ínima ndó jatá jjuhún ndo.

Ndaá Ndióxi na cúu cuénta mé á

(Lc. 12:22-31)

²⁵ 'Candehé ndo ña cáhan i xihin ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quivi. Ta ni a ndícani ini ndó saha jáhma candixi ndó. Jáchí tá tacute ndo, ña jan cúú ña cáhnu chága a juú ga ña cuxu ndó. Ta íin chága saha yiquí cuñu ndó a juú ga jáhma ndíxi ndó jan. ²⁶ Candehé ndó laa ndáchí nu táchi jan: rí jan ni co xútu rí ta ni a vája sáhan rí jáquee rí ta ni co yaca ri nu táan vaha ri nuni ri. Ta Ndióxi, tátá ndo, mé a íin indiví sáhan ña xíxi rí jan nu ri. Á co xíni ndó ña íin chága saha mé ndó a juú ga laa cán. Sahá ña cán queá quiahva mé á ña xíni ñúhú ndó catacu ndó. ²⁷ Ta coo saha toho ña ndícani nahá ini ndó jáchí a cuú ndaja jícó ndó mé ndó java metro chága sahá ña ndicani ini ndó.

²⁸ 'Ta ni co ndítahan ndicani ini ndó saha jáhma candixi ndó. Candehé ndo ndá quiahva ndató sáhnu itá yucu. Mé ita jan ni co cája chúun a ta ni co cávaha jáhma á. ²⁹ Joo mé a ndaa ná cahan i xihin ndo ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuicá. ³⁰ Candehé ndó ndaja ndaa vaha Ndióxi yucu ita vatí íin tóo a viti ta itaan cáyi a jándihi sahá. Ndaja ga ví caja Ndióxi xihin ndóhó ña quiahva mé á tóco ndihi ña xíni ñúhú ndó catacu ndó. Joo mé ndó co cándúsa ndó ña candaa mé á ndohó. ³¹ Ña cán queá a ndícani ini ndó saha ndá ña cuxu ndó á sahá ña coho ndó á sahá ña candixi ndó. ³² Jáchí na co xíni íchi cuéntá Ndióxi, na cán cúú na ndícani cuahá ini saha tóco ndihi ña yóho. Joo cúú ndó cuéntá Ndióxi, tátá ndo íin indiví ta xíni vaha mé á ña ndímaní nu ndó catacu ndó. ³³ Joo ndítahan nu ndó ndiquiahva ndó mé ndó ndáha Ndióxi ña ná cacomí mé á cuéntá saha ndó ta já quiahva mé á ña ndímaní nu ndo catacu ndó. ³⁴ A ndícani ini ndó sahá ña quixi nu ndó inga quivi itaan jáchí Ndióxi cuití va xíni a ndía vaxi nu ndó

quíví itaan ta coó sahá ndicani ini ndó sahá ña ndoho ndó itaan.

7

Cọ ndítahan candehe ndaa yó ñayivi

(Lc. 6:37-38, 41-42)

¹ 'A cándehé ndaa ndó ñayivi já ná a cándehé ndaa Ndióxi ndohó. ² Jáchí tá quiahva cája ndó xihín inga ñayivi quiahva já caja ri Ndióxi xihín ndóhó va. Sahá ña cán queá tá quiahva sándehé ndaa ndó ñayivi quiahva já caja ri Ndióxi xihín mé ndó. ³ Jáchí ndá cuéntá queá sándehé ndó ña núu cája ñani táhan ndó ta co sándehé ndo ndá quiahva náhnu chága ña núu cája mé ndó. Cúu á tátuhun ndácaan in xehe loho nduchú núu ñani táhan ndó nani ndácaan in yito ndúhu cáhnu ini nduchú núu ndo. ⁴ Ta tá a cuú cuni ndó yito cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núu jan.” ⁵ Jándahvi ndó mé ndó xihín ña cája ndó. Xíní ñúhú tavá ndó yito cáhnu ndácaan nduchú núu mé ndó jan já ná nuna nu ndó cuni vaha ndó já ná cuu tavá ndó xehe loho ndácaan nduchú núu ñani táhan ndó.

⁶ 'A quiahva ndó ña yii cuéntá Ndióxi nuú ñayivi quini. Jáchí tá cája ndó já cúu á tátuhun tá ná quiahva ndó ñaha yii nuú tina ta tiahva náá ndicó coo rí tiin rí ndohó. Ta jári cúu á tátuhun tá ná quiahva ndó ñaha yahvi ndivaha tátuhun perla nu cóchí jáchí cuu cuani nihni rí ña.

Ndaja caja í caca í ñamaní nu Ndióxi

(Lc. 11:9-13; 6:31)

⁷ 'Ndá ñaha ndímaní nu ndó xíní ñúhú caca ndó ña nu Ndióxi ta já quiahva mé á ña nu ndo. Ndinducú ndó ña cúní ndo ta ñehe ndó ña caja Ndióxi. Cúu á tátuhun catí ndáha ndo yéhé ta já nuna yéhé nu ndo. ⁸ Jáchí na xíca in

ñaha, na cán cúu na ñéhe va. Ta na ndúcú ñaha, na cán cúu na ndíñehe ña. Ta na cáti ndáha yéhe, na cán cúu na ndínuna yéhe nuu.

⁹ Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe ri ndó quiahva ndó yuu nu á ña ná caxí a. ¹⁰ Ta ama ná quiahva ri ndó in coo nu á caxi tá xíca tiyacá nu ndó cuxu a. Co cája ndó já. ¹¹ Candehé ndó. Vatí mé ndó cúu ndó ñayivi cája cuachi joo xini vaha ndó quiahva ndó ña vaha nuú jahyi ndó. Ndaja ga ví cája Ndióxi, tátá ndo, mé a íin indivi xihin ndo. Quiahva mé á ña vaha nu ndo tá ná cacá ndó ña nu mé á.

¹² Candehé ndó. Tá quiahva cúni ndó cajú ñayivi xihin ndo quiahva já ndítahan cajú ri ndóhó va xihin ná jáchi ña yóho quéa sáhná ley Moisés xihin ña nacahyí na profeta cajú ndó.

Yéhe táhán cúu nuú quihvi na cuhun indivi

(Lc. 13:24)

¹³ Cúu á tátuhun íin ivi yéhe. In yéhe cúu á ña táhán ndivaha ta xini ñúhú ndinducú ndó ndihvi ndó cán. Jáchi inga yéhe cúu á ña ndíca ndivaha nuú ndihvi na cuhun indayá. Ta cuahá ndivaha ñayivi cúu na xíca íchi ndíca cuahan na indayá nuú ndihi saha ná. ¹⁴ Joo ña cúu íchi ña ndáca ñayivi yéhe táhán nu ndíhvi na indivi cúu á ichi táhán ndivaha ta yáncá ndivaha caca nuu í nu á. Ta chá ndivaha cúu na ndíhvi cán.

Xihin cuhi cúun nuú in yito cuu ndicuni ndá yito cúu dó

(Lc. 6:43-44)

¹⁵ Cuéntá coo ndó xihin na tuhún, na cáchi cáhan na cuéntá Ndióxi jan. Jáchi uun ndivaha cása na nu ndo. Joo cúu ná tátuhun ndivahyí quini ndivaha vatí náha na tátuhun ndicachi loho. ¹⁶ Cúu ndicuni ndó na xihin ña cajú na. Jáchi ñayivi quini co cajú vaha toho na. Cúu á tátuhun tá a cúu cuun uva nuú tohíñú ta ni a cúu jáquee

ndó titó ñuhú nuú tohíñú. ¹⁷ Ña cán queá tóco ndihi yitó vaha ndinuhu cuihi vaha cuití cúun nu do. Joo yitó quini ndinuhu cuihi quini cuití cúun nu do. ¹⁸ Dó cúú yitó vaha cán a cúu toho cana cuihi quini nu do ta ni yitó quini cán a cúu cuun cuihi vaha nu do. ¹⁹ Ta tóco ndihi yító, dó co cána cuihi vaha nuu, tãhnda do ta quee dó nu cándaha ñúhu ña çayí do. ²⁰ Sahá ña cán queá xihín ña cája ñayivi já cuu ndicuni ndó á cúú ná ñayivi vaha á cúú ná na quini.

A juú ndihi toho ñayivi ndihvi na nuú cacomí Ndióxi cuéntá saha ná

(Lc. 13:25-27)

²¹ 'A juú ndihi toho na cachi cúú yehe xitoho na çuhun na nuú cacomí Ndióxi cuéntá saha ná. Na cája ña sãhnda Ndióxi, tátá i, mé a íin indivi na cán cuití cúú na cacomí mé á cuéntá saha. ²² Jáchi tá ná xinu coo quivi caja vii Ndióxi sahá ñayivi já queá casáha çahan çahá ndivaha ñayivi xihín i ta já cachi na já: “Jesús, mé ndó cúú xitoho nde ta xihín quivi mé ndó naxica nuu nde çahan nde tuhun Ndióxi xihín ñayivi ta xihín quivi mé ndó ñatavá nde rí quini nasãnuhu ínima ñayivi ta xihín quivi mé ndó nacaja çahá ndivaha nde ña xituhún”, cachi na xihín i. ²³ Ta anda já nducú ñehe e tuhun nu ná já cachi i já xihin ná: “Co xini toho i yo cúú ndóhó. Caxoo ndó nuú i jáchi ndinuhu ña quini cája ndó”, cachi i xihin ná.

Sácú Jesús quiahva sahá ivi da nacavaha vehe

(Mr. 1:22; Lc. 6:47-49)

²⁴ 'Ndá na xini joho ña çahan i ta cája na ña, na cán cúú ná tátuhun in dataa, da íin xini túni ta nacavaha da vehe da jata in tóto. ²⁵ Ta tá naxinu javi já nasahnu yuta ta naxinu tachi quini jata vehe cán joo coo nandicava vehe da jáchi tóyíí cándichi vehe da jata tóto cán. ²⁶ Joo na xini joho nu çahan i ta co cája na ña, na cán cúú ná tátuhun in

dataa, da cō xíní túní ta ñacavaḥa da vehe da nuú ñutí.
 27 Tá ñandihi já naxinu javi já ñasahnu yuta ta ñaxinu
 tachi quíni jatá vehe cán. Anda já ñandicava vehe da ta
 chí ñandihi saḥa chí uun —ñacachi Jesús jáñaha ñayivi.

28 Ta tá ñandihi ñacahan Jesús ña yóho já tóco ndihi
 ñayivi ñacatóntó ña xíní johó na ndá quiahva jáñaha mé á
 29 jáchi tá jáñaha mé á nu ná cáhan tá quiahva cáhan in da
 ín saḥa cahnda chuun ta cō cáhan toho a tá quiahva cája
 ña jáñaha ley Moisés.

8

Tá ñandaja vaha Jesús in da ndóho cueḥe táhyi
(Mr. 1:40-45; Lc. 5:12-16)

1 Tá ñanuu Jesús jata yúcu nuú ñasanúu a cán já ndíco
 cuahá ndivaha ñayivi jatá cuahan. 2 Ta ndaja coo já
 ñacayati in dataa, da ndóho cueḥe táhyi nu á. Ta já
 ñacaxítí da nu á já ñacachi da já xihín á:

—Cuu ndaja vaha ndó yeḥe, xitoho i tá cúní ndó —
 ñacachi da xihín Jesús.

3 Tá ñandihi já ñacani ndaa ndáha Jesús da já ñacachi a
 já xihín dá:

—Cúní ña ná ndivahún ña cán queá ñandivahún viti —
 cáchí a xihín dá.

Tá ñacachi Jesús já chí ivi laá ñandindaa cueḥe táhyi
 ñandoho da cán. 4 Anda já ñacachi Jesús já xihín dá:

—Candehé. A cáxi tuhun tohún ña yóho xihín ni in
 tuhún ñayivi. Cuáhán ndacún ñahun mún nuú jutú.
 Ta ndítahan jocún ñaha nu Ndióxi tátuhun sáhdá ley
 Moisés sanahá caja ña sa ñandivaha. Já ná candaa ini
 tóco ndihi ñayivi ña sa ñandindaa va cueḥe ñasandohún
 —ñacachi Jesús xihín da cán.

Tá ñandaja vaha Jesús in da cája chuun nuú in jefe soldado
(Lc. 7:1-10)

⁵ Tá nandihvi Jesús ñuu Capernaum já nacayati in da sáhdá chuun nuú soldado naquixi ñuu Roma nu Jesús jáchi cúni da caca da in ñamani nu á.

⁶ Já nacachi da já xihín á:

—Á co cúni ndó caja ndó ñamani ndaja vaha ndó mozo i, datacú jáchi cándúhu da vehe quíhvi da naxihí tuchu yiquí cuñu da ta a juú quiahva cáhivvi yiquí cuñu da —nacachi da cán xihín Jesús.

⁷ Já nacachi Jesús já xihín dá:

—Vaha va, cuhun i ndaja vaha i da —nacachi Jesús.

⁸ Anda já nacachi tucu da sáhdá chuun nuú soldado cán já xihín Jesús:

—Candehé ndó. Coó saha toho yehe ña ná ndihvi ndó vehe e. Joo cahnda cuití ndó chuun janda nu ín ndó yóho ta já ndivaha va mozo i. ⁹ Jáchi ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuu. Ta tá chindahá i in da ña ná cuhun da nu cúni mí i cuhun da ta cuahan da. Ta tá sáhdá i chuun nuú inga da ña ná quixi da nuú i ta vaxi da nuú i. Ta tá sáhdá i chuun nu mozo i ña ná caja da ña sáhdá i ta cája da ña —nacachi da cán.

¹⁰ Tá naxini johó Jesús ña yóho já nacatontó a já nacachi a já xihín na ndíco cuahan cán:

—Mé a ndaa ná cahan i xihín ndo ña a ñaha cuni i tañu na Israel in da cándéé cáhnu nahá ini Ndióxi tá quiahva cándéé cáhnu ini da yóho Ndióxi. ¹¹ Candehé ndo ná cahan i xihín ndo ña quixi ñayivi ndijáá níí cúú saha ñuyívi ta cacoo na cuxu na xihín Abraham ta xihín Isaac ta xihín Jacob indivi nu ín Ndióxi cómi a cuéntá sahá ñayivi. ¹² Joo cuahá na Israel, na nanditahan nuu coo cán a cóo toho na cán. Ña caja Ndióxi xihín na cán quea cuita na jata vehe cuhun na nuú naá ndivaha. Ta cán cuacu ndivaha na janda quiahva chicáhñá mé nuhu ná —cáchi Jesús.

¹³ Tá nandihí já nacaḥan tucu Jesús xihín da sáhná chuun nuú soldado cán já nacachi a já xihín dá:

—Cuanúhu vehún. Nandivaha mosún tá quiahva cúnun jáchi nacandúsún yehe —nacachi Jesús xihín dá.

Chí mé hora já nandivaha mozo da cán.

Tá nandaja vaha Jesús ñá cúú xojo Pedro

(Mr. 1:29-31; Lc. 4:38-39)

¹⁴ Nasahān Jesús vehe Pedro ta tá naxinu a cán cándúhu ñá cúú xojo Pedro quíhvi ña jáchi chícaan cáhni ndeé ña. ¹⁵ Anda já natiin Jesús ndáha ña quíhvi cán ta chí nandindaa cáhni ña. Ta já nandacoo ñá cán cája ndíví ña nu ná.

Tá nandaja vaha Jesús cuhá ndivaha na quíhvi

(Mr. 1:32-34; Lc. 4:40-41)

¹⁶ Ta tá nacuaá já ñéhe cuhá ndivaha na na quíhvi xihín na ñúhu ínima quini ini nuú Jesús. Ta xihín in túhún tuhun nacaḥan mé á natavá ínima quini ñúhu ínima ñayivi ta jári nandaja vaha mé á tóco ndihi na quíhvi. ¹⁷ Ta tóco ndihi ña yóho nayaha já ná xinu coo nuú tuhun ña nacaḥyí profeta Isaías tá nacachi da já: “Mé á nandiquehe ndihi a ña cávitá iní ta naxojo ndihi a cuehe yo”, cáhí tuhun Ndióxi.

Na cúní candico Jesús

(Lc. 9:57-62)

¹⁸ Tá naxini Jesús ña a juú quiahva cándíhi táhan ñayivi ndúu na xihín á já nasahnda chuun ña ná cojo cava na inga xoo tañuhú cán. ¹⁹ Joo nacayati in da jánaḥa ley Moisés nu á já nacachi da já xihín á:

—Maestro, cúní candico i ndohó ndá nacuu nuú cūhun ndo —nacachi da xihín á.

²⁰ Já nanducú ñehe Jesús tuhun nu dá já nacachi a já xihín dá:

—Ndicuii cúu rí ta vatí fin cáva ñúhu rí. Ta laa cúu rí ta vatí fin táca ñúhu rí. Joo yehe, da nachindahá Ndióxi nduu ñayivi, chí ni nuú cuju mí i coó va —ñacachi Jesús xihin dá.

²¹ Ta inga da sa xíca xihin á ñacachi da já xihin á:

—Maestro, quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —ñacachi da xihin á.

²² Já ñacachi Jesús já xihin dá:

—Xíní ñúhú candicún yehe viti jáchi ná cuhun mé ñayivi, na a ñaha cacu ndaa ínima jánduxu na ndii jan —ñacachi Jesús xihin dá.

Tá najácátáji Jesús tachi xihín tañuhú tá ndícojo do

(Mr. 4:35-41; Lc. 8:22-25)

²³ Ta ndaja coo ñaquihvi Jesús ini in barco ta cátahan na xíca tuun xihin á cán cuahan na. ²⁴ Ta nani xíca na nuú tañuhú cán cuahan na ta in náá cuití ñaxinu in tachi quíni ndivaha nuú tañuhú cán. Ta a juú quiahva ndeé ñacasáhá ndícojo ticuí cán janda quiahva nandichutú ticuí ini barco cán. Joo cándúhu Jesús ini barco quíji va. ²⁵ Anda já ndáva na xíca tuun xihin á cán nasahan na ndíñehe na ña. Já ñacayuhú na já cáchí na xihin á:

—Chindeé ndó ndehe, xitoho nde. Jáchi cácoo barco cahá tañuhú cuahan do —ñacachi na xihin á.

²⁶ Anda já nanducú ñehe Jesús tuhun nu ná já ñacachi a já xihin ná:

—Ndá cuénta quea yíhvi nahá ndo. Ndá cuénta quea co cándeé ini ndó yehe —ñacachi a.

Já nandacoo a ta jánani a tachi quíni cán xihín tañuhú cán ta já ñacátáji uun tóco ndihi a cán. ²⁷ Tá ñaxini na xíca tuun xihin á cán ña yóho já ñacatóntó na ta ñacasáhá ndáca tuhún táhan na já cáchí xihin táhan na já:

San Mateo 8:28 29 San Mateo 8:34

—Ta ndá da cúu dataa yóho ña janda tachi xihín tañuhú cándusa nu cáhan da —cáchi xihín táhan na cán.

*Tá naqueta ivi da ñúhu ínimá quini ini nuú Jesús
(Mr. 5:1-20; Lc. 8:26-39)*

²⁸ Tá naxinu coo Jesús inga xoo tañuhú cán nu ín ñundáhyi cuéntá Gadara já naqueta ivi da ñúhu ínimá quini ini tañu nu ndúxu ndij. Ta nacayati da nuú Jesús. Ndívi mé da ñúhu ínimá quini ini yóho cúu dá tátuhun quíti, rí cuehe ndivaha. Sahá ña cán quea ni in túhún ñayivi a cuú yaha chí íchi cán. ²⁹ Tá naxini da Jesús já nacasáhá da cáyuhú da nu á já cáchi da já xihín á:

—Ndá cuéntá quea vasún quihvi nuún xihín nde, Jesús, da cúu in túhún jini já jahyi Ndióxi. Á vasún jándoho yachún ini nde tá camaní yii ndindaa tiempo ndoho ini nde —nacachi rí quini cán xihín Jesús.

³⁰ Ta ndaja coo yati cán nasanduu cuahá ndivaha cóchi xixáhan rí. ³¹ Ta mé rí quini ñúhu ini ndívi dataa cán naxica tahví ri nu Jesús já cáchi ri já xihín á:

—Tá ta ná tavún ndehe ini da yóho, quiahva ñamaní nuú nde ña ná cuhún nde ndihvi nde ini cóchi ndúu cáa —nacachi rí xihín Jesús.

³² Anda já nacachi Jesús já xihín rí:

—Cuáhán ndó, dá já.

Chí naqueta rí quini cán ini ndívi dataa cán já nasahan rí nandihvi rí ini cóchi cán. Ta chí ivi laá xínu tóco ndihi cóchi cán cuahan rí núu rí nu ndáyi yuhú tañuhú cán. Ta najáqueta nuu rí mé rí ini tañuhú chí nacandaa rí ticuí já naxihi ri.

³³ Ta chí a juú quiahva nayihví da ndáa cóchi chí naxinu ndivaha da cuahan da. Ta tá naxinu da ñuu já nacasáhá da ndícani da ndaja cáa ña nayaha xihín ndívi da nasañuhu ínimá quini ini cán. ³⁴ Anda já naqueta tóco ndihi ñayivi

ñuu cán cuahān nā candehé nā Jesús. Ta tá naxini na mé á já naxica tahví nā nu á ñā ná quee a cuhūn a.

9

Tá nandaja vaha Jesús in da naxihī tuchu saha

(Mr. 2:1-12; Lc. 5:17-26)

¹ Tá sa nayaha tóco ndihi ñā yóho já nandaa Jesús jatá in barco ta já naxojo cava inga xoo tañuhú cán jandā quiahva naxinu coo a ñuu mé á. ² Ta cán ñéhe na in da quíhvi, da naxihī tuchu saha ta cándúhu da nu yívi loho ñéhe na nacasaā nā nu á. Ta tá naxini Jesús ndá quiahva cándeé ini da cán mé á já nacachi a já xihín da quíhvi cán:

—Candehé, jahyi a. A ndícani toho inún jáchi cája cáhnu ini i sahá cuachún viti —nacachi Jesús xihín dá.

³ Java táhan da jánaha ley Moisés nacasáhá da cáhán da já: “Mé da yóho ndája núu da Ndióxi xihín tuhun cáhān da jáchi ni in túhún toho ñayivi a cuú caja cáhnu ini sahá cuachi.” ⁴ Joo sa nacandaā ini Jesús ñā cáhvi ini da cán sahá ñā cán quea nandaca tuhún a da já nacachi a já xihín dá:

—Ndá cuéntá quea cáhvi núu ini ndó sahá yehe. ⁵ Á cáhán ndo ñā ihvi chága cachi i xihín da yóho: “Nacaja cáhnu ini i sahá cuachún viti.” Á tá coo ta cachi i xihín dá: “Cuándacoo ta cuáhán.” ⁶ Candehé vaha ndo ná nahā i nu ndo ñā ín sahá i, da nachindahá Ndióxi nduu ñayivi caja cáhnu ini i sahá cuachi cája ñayivi ñuyívi yóho —nacachi Jesús xihín dá.

Tá nandihī já nandicahān tucu a xihín da naxihī tuchu saha cán:

—Ta viti cáhān i xuhūn cuándacoo ndiquehe xito lohún ta cuanúhu vehún —nacachi Jesús xihín dá.

⁷ Chí ivi laá nandacoo da quíhvi cán ta já naquee da cuanúhu dá. ⁸ Tá naxini ñayivi ndúu cán ñā nacaja Jesús

yóho já n̄ayihví n̄a ta n̄acasáhá cája cáhnu na Ndióxi s̄ahá ña n̄asahan ndée mé á nuú ñayivi ña ná cuu caja na ña xitúhún.

*Tá n̄acana Jesús Mateo ña caca tuun da xihín á
(Mr. 2:13-17; Lc. 5:27-32)*

⁹Tá n̄andihi já n̄aquee Jesús cuahan ta nani xíca cuahan já n̄axini a in d̄ataa naní Mateo, d̄a íin coo n̄u s̄ac̄o d̄a j̄ataca j̄iuhún cuéntá impuesto. Ta n̄acana Jesús d̄a já n̄acachi a já xihín dá:

—Naha quí candicún yeh̄e.

Anda já n̄andaca ndichi Mateo ta n̄acasáhá ndíco d̄a Jesús.

¹⁰Tá n̄andihi já íin coo Jesús xíxi a vehe d̄a cán ta cán n̄axin̄u coo cuahá táhan n̄a j̄ataca j̄iuhún cuéntá impuesto xihín java ga ñayivi cája cuachi. Nasac̄o na xíxi na xihín Jesús ta cán ndúu coo ri n̄a xíca tuun xihín a cán. ¹¹Ta tá n̄axini n̄a fariseo ña ndúu n̄a cán xíxi na xihín Jesús já n̄acasáhá n̄a ndáca t̄uhún n̄a n̄a xíca tuun xihín Jesús cán já:

—Ndá cuéntá queá xíxi xitoho ndó xihín n̄a j̄ataca j̄iuhún cuéntá impuesto ta xihín java ga n̄a cája cuachi — n̄acachi n̄a fariseo cán.

¹²Joo tá n̄axini j̄oho Jesús ña yóho já n̄acachi a já xihín n̄a fariseo cán:

—Ñayivi íin v̄aha c̄o xíní ñúhú toho na d̄a cája tátá ñahá joo n̄a quíhvi, n̄a cán cúu n̄a xíní ñúhú d̄a cája tátá ñahá.

¹³Ta yeh̄e coo v̄axi toho i cana i n̄a sa íin v̄aha. V̄axi i cana i ñayivi, n̄a cája cuachi ña ná j̄andacoo na cuachi cája na. Xíní ñúhú c̄uhun ndo jácuaha v̄aha ndó ña cún̄i cachi t̄uhun Ndióxi tá cáchí a já: “Ña cún̄i queá ná candáhv̄i ini ndó ñayivi jách̄i v̄aha chága ña yóho a juú ga ña ná j̄oc̄o ndó quít̄i nuú i”, cáchí t̄uhun Ndióxi —cáchí Jesús xihín ná.

Cáhan Jesús ndá saha quéa cajuhun na

(Mr. 2:18-22; Lc. 5:33-39)

¹⁴ Tá nandihí na xíca xihín Juan, da jácandúta ñayivi cán naxinu coo na nu Jesús. Já nacasáhá ndáca tuhún na mé á já nacachi na já xihín á:

—Ndávaha co xíjuhun toho na xíca xihín yóhó nani cuhá ndivaha xíjuhun mé nde xihín na fariseo —nacachi na cán xihín Jesús.

¹⁵ Anda já nanducú ñehe Jesús tuhun nu ná já nacachi a já xihín ná:

—Á cáhan ndo canduu cuéha na ndúu in vicó tándaha nani íin mé da tándaha cán xihín ná. Uhun. Jáchi cájii ini na. Joo xinu coo quiví candaa na da tándaha cán anda jáví casáhá cajuhun na. Ta cáchí i xihín ndo ña vaxi quivi candaa na yehe nuú na yóho ta anda jáví casáhá na xíca tuun xihín i cajuhun na —nacachi Jesús.

¹⁶ Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in tuhun jáh-ma saá jáchi tá nandihí ndíndíí a, sáhdá chága ví a jahmá yatá cán ta jándacáhu chága ví a yávi ña nandicahmá na cán. ¹⁷ Ta ni co táán na vino saá ini voso níí yatá jáchi jácáhdí mé vino cán níí ta cuíta mé vino cán ta tíví voso níí cája dó. Sáhá ña cán quéa ndítahan taán yo vino saá ini voso níí saá ná a ndíhi saha vino xihín voso —cáchí Jesús.

Tá nandaja vaha Jesús jahyi jhí Jairo xihín in ña nacani ndaa ndáha jáhma á

(Mr. 5:21-43; Lc. 8:40-56)

¹⁸ Ta nani cáhan Jesús cándichi a naxinu coo in da sáhdá chuun nuú na Israel. Já nacaxítí da nu á ta já nacachi da já xihín á:

—Jacá naxihí uun ña loho cúu jahyi jhí i joo tá ná caja ndó ñamaní quixi ndó vehe e ta chinúu ndó ndáha ndó jata ña já nditacu tucu ña —nacachi da cán xihín Jesús.

¹⁹ Andá já naquee Jesús cuahān xihín dā cán ta ndáca nā xíca tuun xihín á cán cuahān nā. ²⁰ Ta ndaja coo cán ín in ñañaáha, ñá ndítahví nij ñá tixi uxu ivi cuía. Ta nacayati ñá chí jata Jesús já nacani ndaa ndáha ñá yuhú jáhma á. ²¹ Jáchí nacahán ñā: “Tá ná cani ndaa cuití ndáha í jáhma Jesús já ndivaha í”, nacahán ñā. ²² Joo nandicoto nihni jata Jesús nū ñá ta tá naxini a ñá já nacachi a já xihín ñā:

—A cáyihví tohún, jahyi a. Nandivahún jáchí nacandúsún yehe —nacachi Jesús xihín ñá.

Ta chí mé hora já nandivaha ñá.

²³ Ta tá naxinū coo Jesús vehe dā sáhná chuun nuú nā Israel cán já naxini a ñā sá ndúu música cán ñā ná cūhun nā jánduxu nā jahyi dā cán. Ta naxini a jandá joho sácu cóhó ñayivi ndúu na. ²⁴ Ta chí já nacachi a já xihín tóco ndihi nā cán:

—Cuáhán queta ndó jata véhe. Jáchí coo naxihí toho ñá loho yóho. Quiji cuití va ñá —nacachi Jesús xihín ñayivi ndúu cán.

Joo nacasáhá nā cán sácu ndaa ñahá nā. ²⁵ Ta chí natavá Jesús nā jata véhe. Ta tá nacayati a nū ñá cán já natiin a ndáha ñá chí ivi laá nandacoo ñá. ²⁶ Ta ní cúu ñundáhyi cán nandicuīta nuu tuhun sahá ñā nacaja Jesús cán.

Tá nandaja vaha Jesús ivi dā cuaá

²⁷ Tá naquee Jesús cuahān já ndíco ivi dā cuaá jata cuahān dā já nacasáhá cáyuhú cóhó dā já cáchí dā já xihín á:

—Jesús, dā naquixi chichi David caja ndó ñamaní candáhví loho ini ndó ndehe —cáchí dā cáyuhú dā jata Jesús.

²⁸ Ta ndaja coo naquihvi Jesús ini in vehe ta já nacayati ndíví dā cuaá cán nū á. Já nacasáhá ndáca tuhún a dā cán já nacachi a já xihín dá:

—Á cáhán ndo ñā cuu caja i jándiyehē nuu ndo —nacachi Jesús xihín dā cán.

—Ajan, xitoho nde. Cándúsa nde ña cuu caja ndó ña —
 ñacachi ndíví da cuaá cán xihín Jesús.

²⁹ Tá nandihí já ñacani ndaa ndáha Jesús nduchú núú
 da cán ta já ñacachi a já xihín ndíví da cán:

—Ná coo tá quiahva cúni ndo jáchi cándeé ini ndó yehe
 —cáchi a.

³⁰ Tá nandihí já ñacasáha sándehe ndíví da cuaá cán.
 Ta ñasahnda Jesús chuun nu dá ña ná a cáxi tuhun da nuú
 ñayivi sahá ña ñacaja mé á xihín dá.

³¹ Joo tá jacá ñaqueta uun da cán já ñacasáha da ndícani
 da nuú ndijáa ñayivi ndúu ñundáhyi cán sahá ña ñacaja
 Jesús xihín dá.

Tá nandaja vaha Jesús in da níhi

³² Nani ñaquee da cuaá cán cuahan da já ñasaa java
 ñayivi nu Jesús ñehe na in da níhi, da ndácaan ínima quini
 ini. ³³ Ta tá ñatavá Jesús ínima quini ini da cán chí ivi laá
 ñacasáha cáhan da. Ta a juú quiahva ñacatóntó ñayivi ta
 já cáchi ña já:

—Ni in túhún tañu coó ñaxini nde in ñaha tátuhun ña
 yóho ñundáhyi Israel —ñacachi ña cán.

³⁴ Joo ña fariseo cán ñacasáha cáchi ña já:

—Rí cúu tiñháha sacuahá nu rí quini sáhan rí ndée rí nuú
 Jesús yóho ña ná tavá a ínima quini ini ñayivi —ñacachi ña
 fariseo cán.

Táhnda ini Jesús sahá ñayivi

³⁵ Ndjáa ñuu náhnu xihín ñuu válí ñaxica nuu Jesús
 jánahá tuhun Ndióxi ini veñuhu ña cán. Ta ñacaxi tuhun
 a tuhun vaha xihín ñayivi ña sa ñacayati quiví cacomí
 Ndióxi cuénta saha ná. Ta nandaja vaha mé á tá nuú
 cuehe ndóho ñayivi. ³⁶ Ta tá ñaxini Jesús ñayivi cuaha
 cán já ñatahvi ini a saha ná jáchi ndóho ini na ta cávitá

ini na tátuhun ndicachi, rí coó da candaa ñahá. ³⁷ Andá já ñacachi Jesús já xihín na xíca tuun xihín a cán:

—Mé á ndaa ndúu cuahá ndivaha ñayivi, na cúní cuni johó tuhun Ndióxi joo chá cuití na cúní cuhun na cahan na ña xihín ñayivi. Cúu á tátuhun ín cuahá ndivaha ní ña xíní ñúhú jáquee joo ndímaní ñayivi jáquee na ña. ³⁸ Sahá ña cán queá xíní ñúhú caça tahví ndó nu Ndióxi ña ná chindahá mé á chága na cája chúun cuéntá mé á —cáchi Jesús xihín ná.

10

Chindahá Jesús na xíca tuun xihín á ña ná cuhun na cahan na tuhun Ndióxi xihín ñayivi

(Mr. 3:13-19; Lc. 6:12-16)

¹ Tá ñandíhi já ñacana Jesús ndíhuxu ivi na xíca tuun xihín á cán. Ta já ñasahan ndée nu ná ña ná cuu tavá na ínima quini ini ñayivi. Ta ñasahan ndée nu ná ña ná ndaja vaha na tá nuú cuehe ndóho ñayivi. ² Ña yóho cúu quívi ndíhuxu ivi na cúu apóstol xíca tuun xihín á cán: Da nu cuití cán naní da Simón ta cahan ri na Pedro xihín dá. Ta inga da cán cúu Andrés ñani da. Ta inga da cúu Jacobo xihín ñani da, Juan. Ndíví da yóho cúu dá jahyi Zebedeo. ³ Tañu na cán ndácaan ri Felipe xihín Bartolomé xihín Tomás xihín Mateo, da najátaca jihún cuéntá impuesto. Ta cán ndácaan ri Jacobo, da cúu jahyi Alfeo xihín Lebeo, da cahan ri na Tadeo xihín. ⁴ Ta cán ndácaan ri Simón, da ñaxíca cuéntá na cananista xihín Judas Iscariote, mé da najicó túhún Jesús tá nu ndíhí cán.

⁵ Tá ñachindahá Jesús ndíhuxu ivi na cán já ñacachi a já xihín ná:

—Coto a cuhun ndó chí ñuu ñayivi tóho, na co cúu na Israel. Ta ni a quíhvi ndó ñuu ñúhu chí estado Samaria.

⁶ Vaha chága ná cuhun ndó cahan ndó tuhun Ndióxi xihín

na Israel jáchi cúu ná tátuhun ndicachi, rí nandiñúhú. ⁷ Cuáhán ndó caxi tuhun ndó xihín ná ña sa nacayati quivi cacomí Ndióxi cuéntá sahá ñayivi. ⁸ Ta ndaja vaha ndó na quíhvi ta jánditacu ndó ndij ta ndaja vaha ndó na ndóho cuehe táhyi. Ta tavá ndó rí quini ñúhu ínima ñayivi. Ta a quéhe ndó yahvi sahá ña cája ndó jáchi coó naxeen ndó ndée ñéhe ndó jan. ⁹ A cánehe toho ndó ni jiuhun cuáán ni jiuhun cúxú ni jiuhún caa cuáhá caca nuu ndó. ¹⁰ Ta ni a cánehe ndó yátí cuhun ndó íchi. Ta ni a cánehe ndó inga naha jáhma ndó cuhun xihín ndo. Ta ni a cánehe ndó inga ndusa ndó cuhun ndo. Ta ni garróté a cánehe ndó cuhun ndo. Jáchi nditahan nuú ñayivi quiahva na ña nu ndo.

¹¹ Tá ná xinu coo ndó in ñuu cáhnu á ñuu loho, xini ñúhú ndinducú ndó in ñayivi, na cuu candee ini ndó ta vehe na jan canduu ndó janda quiahva ná xinu quivi quee ndó cuhun ndo. ¹² Ta tá ná xinu coo ndó vehe jan cahán Ndióxi ndó xihín ná. ¹³ Ta tá ná ndiquehe vaha ñayivi vehe jan ndohó já quea cachi ndó xihín ná ña ná coo vaha ini na. Joo tá co cúní na ndiquehe vaha na ndohó já quea a cahán ndo xihín ná ña ná coo vaha ini na. ¹⁴ Ta tá co cúní na ndiquehe vaha na ndohó ta ni co cúní na cuni johó na nu cahán ndo já quea cuáhán queta ndó vehe jan á ñuu jan ta catí ndó ña yácá saha ndó já ná naha ña cuahan cuachí na cán jata mé va na. ¹⁵ Jáchi mé a ndaa ná cahán i xihín ndo ña tá ná xinu coo quivi caja vií Ndióxi sahá ñayivi ndúu ñuyiví já quea jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihín ñuu Gomorra sanahá sahá ña coó nandiquehe na ndohó.

Vaxi quivi caja xíxi ñayivi xihín na xica cahán tuhun Ndióxi

¹⁶ Candehé ndo. Yehe chindahá i ndohó cuhun ndó tañu ñayivi quini. Cúu ndó tátuhun ndicachi válí tañu ndivahyí ña cán quea xíní ñúhú cuéntá vaha coo ndó tá quiahva cája coo. Ta xíní ñúhú coo mánsó ndo tá quiahva

cája ndijata. ¹⁷ Cuéntá coo ndó jáchi tiin na ndohó ta ndiquiahva na ndohó ndahá na jutixia. Ta cani na ndohó ini veñuhu. ¹⁸ Ta saha mí i cañehe na ndohó cuhun ndó nuú na cúu gobernador á nuú na cómi cuéntá sahá in nación. Ta já ná cuu ndicani ndó sahá i nuú na cán ta xihín nuú na tóho, na co cúu na Israel. ¹⁹ Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchi tá ná ndindaa hora cahan ndó xihin ná já quéa quiahva mé va Ndióxi tuhun nu ndó ña ná cuu cahan ndó sahá i nuú na cán. ²⁰ Jáchi a juú jiní mé ndó quixi ña cahan ndo. Ínima yii Ndióxi cacuu ña quiahva tóco ndihi ña cahan ndo.

²¹ 'Ta java taa jicó túhún da ñani da ta java da jicó túhún da jahyi da ña ná cahní ñahá na. Ta java na ndicuita na cani táhan na xihin tátá na ña ná cahní ñahá na. ²² Ta ndaja táhan ñayivi ndúu ñuyiví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. ²³ Tá ná ndicuita na caja xixi na xihin ndó in ñuu já cunu ndó cuhun ndó inga ñuu. Jáchi mé a ndaa ná cahan i xihin ndo ña tá sa xinu coo tucu yehe, da nachindahá Ndióxi nduu ñayivi já a ñaha caca nuu ndó ndijáa ñuu ndacaan ñundáhyi Israel.

²⁴ 'Candehé ndo. Ni in túhún toho da xica jácuaha tiaha chága da nu mé dá jánaha ñahá cán. Ta ni in túhún mozo co cúu dá da cáhnu chága nuú xitoho da. ²⁵ In da jácuaha ndítahan cajji íni da tá sa xini ndihi da ña xini maestro da. Ta da cúu mozo ndítahan cajji ini da tá ná xinu da cacuu da cáhnu tátuhun xitoho da. Candehé ndo. Tá ná cachi ñayivi xihin da cúu xitoho ndó ña cúu da Beelzebú, rí cúu tiñahá sacuaḥa ndaja ga ví cachi na xihin ndóhó.

Yo já ndítahan cayihví yo

(Lc. 12:2-7)

²⁶ Candehé ndo. A cáyihví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndáca náha nu á. Ta vatí cáhan jehé ñayivi tuhun joo vaxi quivi tá candaa ini ñayivi sahá. ²⁷ Ña cáhan yehe xihin ndó nuú naá xíní ñúhú cahan ndó ña ndivi táhyi nani yehe candii. Ta ña cáhan jehé e xihin ndo xíní ñúhú ndaa ndó jiní véhe cayuhú ndó ña. ²⁸ A cáyihví toho ndó ñayivi, na cuu caha cahní yiquí cuñu ndó jáchi ni in ñaha a cúu caha na xihin ínima ndo. Ndióxi queá xíní ñúhú cayihví ndo jáchi mé á cuu jándihi a saha yiquí cuñu ndó ta cuu jácana mé á ínima ndo ini indayá anda ama cáa quivi.

²⁹ Candehé ndo. Laa válí ndáchí ri nu táchi ta núu ndivaha jícó na ri. Joo ni in rí cán co cúyu nu ñúhu ña quivi rí tá co sahan Ndióxi, tátá ndó ñamani. ³⁰ Ta viti caha ndó cuénta xihin mé ndó. Janda jí jiní ndó jan ndáhvi tá in tá in a nu Ndióxi. ³¹ Ña cán queá a cáyihví toho ndó jáchi ndiyahvi chága ndo nu Ndióxi a juú ga cuahá ndivaha laa válí.

Tá cáhan cáxi ñayivi ña cúu ná cuénta Jesús

(Lc. 12:8-9)

³² Ndá na cáxi tuhun nuú ñayivi ña cuahan na cuénta mí i já queá cachi mí i sahá na nu Ndióxi, tátá i, mé a ín indiví, ña mé a ndaa cúu ndusa na cán cuénta mí i. ³³ Joo ndá na ná cachi xihin ñayivi ña co xíní toho na yehe já queá ni yehe a ndícuni toho i na ña cúu ná cuénta mí i nu Ndióxi, tátá i, mé a ín indiví.

Cája Jesús ña sáhdá java táhan ñayivi

(Lc. 12:51-53; 14:26-27)

³⁴ A cáhan toho ndó ña naxinu i ñuyiví yóho caha i ña ná coo vaha ini ñayivi. Co cája i já. Jáchi ña vaxi yehe caha

i quéa ná cahnda java táhan na. ³⁵ Vaxi i jácani táhan i dataa xihín tátá dá sahá yehe. Ta vaxi i jácani táhan i in ñañaña xihín náná ña sahá yehe. Ta vaxi i jácani táhan i ñá cúú sanu xihín xojo ñá sahá yehe. ³⁶ Ta ndaja vehe mé ñayivi ndicuita na cani táhan na sahá yehe.

³⁷ Ta ndá na cúni chága tátá na á náná na a juú ga yehe já quéa coó saha toho na cacuu na cuéntá mí i. Ta ndá na quihvi ini chága jahyi yíi na á jahyi jíhí na a juú ga yehe já quéa coó saha toho na cacuu na cuéntá mí i. ³⁸ Ndá na co cúni ndoho ini sahá ña candico na yehe ta co ín tiahva na quivi na sahá i já quéa coó saha toho na cacuu na cuéntá mí i. ³⁹ Jáchí ndá na cátóo coo chága na ñuyíví yóho, na cán cúú na ndihi saha. Joo na sáhan ndeé ini quivi sahá i, na cán cúú na ñehe táhvi na catacu na anda ama cáa quivi.

*Ña quiahva Ndióxi nuú ñayivi
(Mr. 9:41)*

⁴⁰ Ndá na ndíquehe vaha ndohó, ndíquehe vaha ri na yehe va. Ta ndá na ndíquehe vaha yehe, ndíquehe vaha ri na Ndióxi, mé a nachindahá yehe vaxi i ñuyíví yóho. ⁴¹ Ndá na ndíquehe vaha in profeta vaxi cuéntá Ndióxi já quéa tá quiahva coo yahvi ndiquehe profeta cán quiahva já coo ri yahvi ndiquehe na cán. Ta ndá na ndíquehe in ta vaha sahá ña cúú dá ñayivi vaha já quéa ndiquehe na cán yahvi na tá quiahva cáa yahvi ndiquehe ta vaha cán. ⁴² Ta ndá na ná quiahva ñaha vatí in yáxi ticuí nuú in na cúú jahyi i yóho sahá ña ndico na íchi cuéntá mí i, mé a ndaa ná cahan i xihín ndó ña चाहvi Ndióxi sahá ñamani cája na xihín ná —cáchi Jesús.

dá nuú Jesús

(Lc. 7:18-35)

¹ Tá nandihí nanaha Jesús nuú na xíca tuun xihín á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

² Mé tiempo já nasandacaan Juan vecaa, mé dá cúu dá da jácandúta ñayivi. Ta cán nañehe dá tuhun sahá ña náhnu cája Jesús. Anda já nachindahá da java na xíca xihín dá nu á ³ ña ná ndaca tuhún na Jesús á jivi ndusa cúu á Cristo, mé a chindahá Ndióxi cacomí a cuéntá sahá ñayivi, á ndítahan candati na inga ga quixi. ⁴ Tá nandihí nandaca tuhún da cán Jesús sahá ña yóho já nacachi Jesús já xihín ná:

—Cuahán ndó ndicani ndó nu Juan tóco ndihí ña naxini ndó cája i xihín tóco ndihí ña naxini johó ndó cáhan i. ⁵ Ta ndicani ndó nu dá ña ndínuna nuú na cuaá ta ndícaca na réncó cája i. Ta ndaja vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínimá ná. ⁶ Tahví nacuu na cō jándacoo ña cándéé ini na yehe —nacachi Jesús.

⁷ Tá naquee na nachindahá Juan cán cuahan na já nacasáhá Jesús cáhan xihín ñayivi já cáchí a já xihín ná:

—Ndía nacaán ndo cuni ndó tá naqueta ndó nasahan ndó sándehe ndo Juan yucú íchí cán. A juú da cán cúu ta láchá já quíji nuu da tátuhun quíji nuu in tóyoó cája tachí. ⁸ Ndía naqueta ndó candehé ndó. A juú da cán cúu ta ndíxi jahmá lándá ndivaha. Sa xíní vaha ndó ña cō ndúu toho da ndíxi jahmá lándá yucú íchí. Ndá da ndíxi jahmá lándá cúu da ndúu vehe rey cuití va. ⁹ Ndía nasahan ndó candehé ndó cán. Á cōó nasahan ndó cuni johó ndó nu cáhan in da cúu profeta nu ndo. Mé a ndaa da cán cúu

dá in profeta ta ín chága saha dá a juú ga inga profeta nasanduu sanahá. ¹⁰ Jáchí mé Juan cúú dá da cahan tūhun Ndióxi saha tá cáchí a já:

Chindahá i in da cánúú cūhun nū mún, já ná caja tiahva da íchí nuú quisún, já nacahyi a sanahá. ¹¹ Candehé ndo ná cahan i xihín ndo. Tañu tóco ndihi ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuénta saha ná, vatí cúú ná na coó saha, na cán cúú na cáhnu chága a juú ga Juan.

¹² Janda quiví naxinu Juan, da jácandúta ñayivi ta janda viti ñúhú ndíhi ndivaha ini ñayivi ndiquiahva na mé ná ndáha Ndióxi. Ta na sáhan tūhun ndeé ini, na cán cúú na ñehē táhvi cacomí Ndióxi cuénta saha. ¹³ Janda tá cámani xinu Juan tóco ndihi ña nacahyi na profeta xihín ña nacahyi Moisés cahan ña vaxi quiví cacomí Ndióxi cuénta sahá ñayivi. ¹⁴ Ta tá cúní ndo candúsa ndó ña nacahyi na cán sanahá já cuu candaa ini ndó ña Juan cúú dá da nacahan na cán saha tá nacachi na ña ndítahan quixi tucu profeta Elías ñuyiví yóho. ¹⁵ Na ín johó, ná cuni johó na.

¹⁶ 'Ná cahan i xihín ndó ndaja ín ñayivi ndúu tiempo viti. Cúú ná tátūhun na valí sácoo sájiquí na nuú yahvi ta cáyuhú na nuú java ga na valí ndúu cán ta já cáchí na já: ¹⁷ "Natíví nde tótíví nū ndo joo coó naxeen ndó cata sáhá ndo. Ta naxita cuéha ndivaha nde nū ndo ta ni coó nasacu ndó." ¹⁸ Quiahva já ín ñayivi ndúu tiempo viti jáchí tá naquixi Juan, da jácandúta ñayivi ta naxijuhun da ta ni coó naxihi da vino joo nacachi ndó saha dá ña ndácaan ínimá quini ini da. ¹⁹ Ta tá naxinu yehe, da nachindahá Ndióxi nduu ñayivi ta xíxi i pan ta xíhi i vino já nacasáhá cáchí ndó sahá i ña cúú u in taa ndehé ndivaha ta xíhi ndivaha i. Ta cáchí ndó ña cátoó ndivaha i cacuu amigo na cája cuachi xihín na játaca jihún cuénta impuesto. Joo

na cúnĭ cándaḗ ini ña ndaa, na cán cúú na cándaḗ ini ña cája Juan ta cája ri yehe ña ndaa —naçachi Jesús xihĭn ná.

Ñayivi sáa ini cō cúnĭ na caja na ña cúnĭ Ndióxi

(Lc. 10:13-15)

²⁰ Tá nandĭhi já naçasáhá Jesús jánani a ñayivi ndúu ndíjájá ñuu nuú naçaja cuaha chága mé á ña xitúhún. Jáchi vatĭ naçaja cuaha mé á ña xitúhún nu ná cōo nandĭcō cōo ini na nu Ndióxi. Ña cán quea naçachi Jesús já xihĭn ná:

²¹ —Ndáhvĭ nahá naçuu ndó, na ñuu Corazín. Ta ndáhvĭ nahá naçuu ndó, na ñuu Betsaida. Cuahá ndivaha ña náhnu naçaja ĩ nu ndo joo cōo naçeen ndó ndĭcō cōo ini ndó jándacoo ndó cuachi ndó. Sañahá najándĭhi Ndióxi sahá ñuu Tiro xihĭn sahá ñuu Sidón sahá cuachi na. Tá ná sahan ĩ caja ĩ ña náhnu nuú na cán tá quiahva naçaja ĩ nu mé ndó, sa najándacoo va na cán cuachi na, nduu. Ta chí ĩvi laá ndaca ndixi na jahmá ndĭi ta jácuyu na yaa yiquí jínĭ na, nduu. Jáchi xihĭn ña yóho jánaha na ña nandĭcō cōo ini na sahá cuachi na. ²² Mé a ndaa ná cahan ĩ xihĭn ndo tá ná xĭnu quivĭ caja ví Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi naçanduu ñuu Tiro xihĭn ñuu Sidón sañahá. ²³ Ta viti cáhan ĩ xihĭn ndó, na ndúu ñuu Capernaum. Janda indivĭ cúnĭ ndó cuhun ndó joo sahá ña sáa ini ndó cuhun ndó janda indayá, caja Ndióxi. Jáchi tá ná caja ĩ ña xitúhún nuú ñayivi ñuu Sodoma tá quiahva naçaja ĩ nu ndóhó ta ni a ndĭhi sahá ñuu cán, nduu. ²⁴ Mé a ndaa ná cahan ĩ xihĭn ndo ña tá ná xĭnu quivĭ caja ví Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi naçanduu ñuu Sodoma sañahá —naçachi Jesús.

Tá naçajĭi ndivaha ini Jesús

(Lc. 10:21-22)

²⁵ Mé tiempo cán naçahan Jesús já naçachi a já:

—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indivi xihín ñuyivi. Jáchí najánaha ndó ña ndichí ndivaha nuú ñayivi, na coo cuahá saha nuú java ga na. Ta nacaja ndó ña ná a cuú candaa ini na ndichí xihín na tácu ini ñaha mé ndó. ²⁶ Já nacaja ndó jáchi já nasacu ini ndó caja ndó —nacachi Jesús.

²⁷ Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ña ná cacomí i cuénta sahá. Ta ni in túhún toho ñayivi co xini vaha na yehe, da cúu in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na co xini vaha na yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jánaha i nuu sahá Ndióxi, tátá i já ná candaa vaha ini na yo cúu mé á. ²⁸ Naha ndihi ndó nuú i, na sa nacanaá cája chúun. Taxi ndó ña ndójo ndó jan nuú i ta já yehe caja i ña ná ndiquehe ndée ndo. ²⁹ Yehe cúni ña ná ndiquiahva ndó mé ndó ndahá i. Ta ña yóho cúu á tátuhun in yúcu chínúu na sahá jiqui tindiqui. Ta xini ñuhú catiahva ndó caja ndó tá quiahva cája yehe. Jáchí coo cama jini i xihín ñayivi ta cúu u taa manso ndivaha. Quiahva já caja ndó já ñehe íni ndo ndiquehe ndée ndo. ³⁰ Jáchí yúcu chínúu i jata ndo xihín ñaha jácojo i jata ndo cúu á ña cama ñuhú láá —nacachi Jesús.

12

Ña nacaja na xica tuun xihín Jesús in quivi ndiquehe ndée ñayivi

(Mr. 2:23-28; Lc. 6:1-5)

¹ Ta ndaja coo in quivi ndiquehe ndée ñayivi xica Jesús cuahan tañu nuú naxutu na trigo. Ta sahá ña cuíco na xica tuun xihín Jesús sahá ña cán quéa nacasahá na túhún na java yucu jini trigo cán ta táva na trigo sáxi na. ² Tá naxini

na fariseo ña yóho já nacasáhá na cáhan cuachí na nuú Jesús. Já cáchi na já:

—Candehé. Na xica tuun xuhun jan cája na chuun ña co ndítahan caha ñayivi quivi ndíquehe ndée yó —nacachi na xihin Jesús.

³ Já nanducú ñehe Jesús tuhun nu ná já nacachi a já xihin ná:

—Á a ñáha toho cahvi ndó nuú tuhun Ndióxi nu cáhan sahá ña nacaja David sanahá tá nacuico da xihin na xica xihin dá. ⁴ Ña nacaja da queá naquihvi da ini veñuhu Ndióxi ta naxixi da pan ña yi. Ta ni nu mé dá ta ni nuú na xica xihin dá cán co cáni a nuu cuxu na pan cán. In túhún jutú cuití va cáni a nuu cuxu na pan cán. ⁵ Ta á a ñáha toho cahvi ndó ña nacahyí Moisés nu ley tá nacahyí da ña co cája toho jutú cuachi nu Ndióxi vatí cája chúun da veñuhu quivi ndíquehe ndée ñayivi. ⁶ Mé a ndaa ná cahan i xihin ndó ña iin chága sahá i, da cándichi yóho a juú ga sahá veñuhu nu cája cáhnu na Ndióxi jan. ⁷ Mé ndó co cándaá toho ini ndó ña cúnj cachi tuhun Ndióxi tá cáchi a já: “Yehe cúnj ña ná candáhví ini ndó ñayivi jáchi vaha chága ña yóho a juú ga ña ná joco ndó quítj nuú i”, cáchi tuhun Ndióxi. Jáchi tá ná cándaá ini ndó tuhun yóho, nduu ta a chicaan toho ndó cuachi jatá ñayivi, na coó cuachi. ⁸ Candehé ndó. Yehe, da nachindahá Ndióxi nduu ñayivi, iin sahá i cahnda i chuun sahá quivi ndíquehe ndée ñayivi —nacachi Jesús.

Tá nandaja vaha Jesús in da nahichi ndáha

(Mr. 3:1-6; Lc. 6:6-11)

⁹ Tá nandihi já naquee Jesús cuahan já nandihvi a veñuhu mé ñuu cán. ¹⁰ Ta cán nasandacaan in dataa, da nahichi ndáha. Ta sahá ña ndúcú na fariseo ndúu cán ndá quiahva caha na já ná cuu chicaan na cuachi jatá Jesús sahá ña cán queá nandaca tuhún na mé á já nacachi na já:

—Á sáhan Ndióxi ñamaní ndaja vahún na quíhvi quívi ndíquehe ndée yo —nacachi na cán xihín á.

¹¹ Anda já nacachi Jesús já xihín ná:

—Candehé ndó. Tá íin in ndicachi loho jana ndo ta tá ná ndicava rí ini in táhvi quívi ndíquehe ndée yo, ama ná a cúhun ndó tavá ndó rí. ¹² Ta ndíyahvi chága ñayivi a juú ga ndicachi. Ña cán queá sáhan Ndióxi ñamaní cája í ña vaha quívi ndíquehe ndée yo —nacachi Jesús xihín ná.

¹³ Tá nandihí nacachi a já xihín dataa, da nahichí ndáha cán já:

—Jándacaá ndáhun —nacachi a xihín dá.

Tá najándacaá da ndáha dá já nandivaha ndáha dá. Ta cáa tá quíahva cáa inga ndáha da cán. ¹⁴ Joo tá naqueta na fariseo cán já nacasáhá na jándique táhan na tuhun na ña cahní na Jesús.

Ña cáhan Isaías sahá Jesús

¹⁵ Tá nañehé Jesús tuhun ña ndúcú na cán cahní ñahá na já naquee a cuahan va ta cuahá ndivaha ñayivi ndíco jatá cuahan. Ta ndaja táhan na quíhvi nandaja vaha Jesús.

¹⁶ Ta nasahnda Jesús chuun nuú na sa nandivaha cán ña ná a cáxi tuhun na nuú ñayivi yo cúú mé á. ¹⁷ Tóco ndihí ña yóho nayaha já ná xinu coo nuú tuhun nacahyí profeta Isaías tá nacahyí da já:

¹⁸ Yóho íin da cája chúun cuéntá mí i, mé dá nacaxi i.

Quíhvi ndivaha ini i da ta cájii íní i xihín ña cája da.

Ta jáchutu ndaa i ínima dá xihín ínima yii mí i,

ñá ná jánaha da nuú ñayivi ndúu ñuyíví ndá quíahva cája víi i saha ná.

¹⁹ Ta ni a cáhan cuachi toho da ta ni a cáyuhú cóhó da, já queá a cúni johó ñayivi xíca cállé nu cáhan da.

²⁰ Tá quíahva a jácuachi toho da ndoo, dó sa natahnu, quíahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúní ndahva janda quiahva ná quee vaha ña ndaa xihín ña ihvi.

²¹ Ta ndaja táhan ñayivi ndúu níí cúú ñuyíví tandaa candeé ini na mé dá, nacahyí Isaías sanahá.

Jácojo na cuachi jatá Jesús ña cája chúun a xihín ndée tiñáhá sacuahá

(Mr. 3:20-30; Lc. 11:14-23; 12:10)

²² Java ñayivi ñéhe na in da cuaá ta cúú dá da níhi jáchi ndacaan rí quini ini da. Ta tá nandaja vaha Jesús da já nasandehé da ta nandicahan da. ²³ Tá naxini ñayivi ndúu cán ña yóho já nacatóntó ndivaha na já nacasáhá ndaca tuhún táhan na já cáchí na já:

—Á a juú da yóho cúú da naquixi chichi rey David — cáchí xihín táhan na.

²⁴ Tá naxini johó na fariseo ña cáhan ñayivi cán já nacasáhá cáchí mé na fariseo cán já:

—Taa yóho cúú tává da rí quini ñúhu ini ñayivi jáchi mé Beelzebú, rí cúú tiñáhá sacuahá nu rí quini cán sahan rí ndée rí nu dá cája da ña —nacachi na.

²⁵ Ta sa xini va Jesús ña cáhvi ini na cán sahá ña cán queá nacachi a já xihín ná:

—Tá sáhdá java táhan ñayivi ndúu in nación ta ndúu na cuaha táhdá já casáhá cáni táhan ndaja táhan mé va na já cama chá ndihi sahá nu ndúu na cán. Ta quiahva já yaha ri xihín in ñuu á in vehe tá sáhdá java táhan ndaja táhan mé ná já queá jándihi na saha ná. ²⁶ Ta quiahva já yaha xihín Satanás, rí cúú tiñáhá sacuahá. Ta tá ná tavá rí inga rí quini ini ñayivi á tá ná cani táhan ndaja táhan mé rí já queá ndihi saha ndée ña cómí ri. ²⁷ Mé ndó cáchí ndo ña tává i rí quini ini ñayivi xihín ndée Beelzebú, rí cúú tiñáhá sacuahá. Joo tá mé a ndaa cúú ndusa ña cáchí ndo sahá i jan, ndáchí quehe na cúú cuéntá mé ndó jan

ndée tavá nā rí quini ini ñayivi. Ama ná cachi ndó ñā tává ndo rí quini xihín ndée tiñáhá saçuaha. Ñā yóho náha ñā cō cáhvi ndaa ini ndó. ²⁸ Candehé ndo. Yehe tává i ínima quini ini ñayivi xihín ndée ínima yii Ndióxi. Ta xihín ñā yóho náha cáxi a ñā sa naxinu cōo quivi cacomí Ndióxi cuéntá saha ndó.

²⁹ Candehé ndo. Sácú u in quiahva nu ndo. Ni in dataa a cúu ndihvi da caja cuíhná da ñaha vehe in da ndacú joo tá ná cató da da ndacú cán já cuu quehe da ñaha da cán.

³⁰ Ndá nā cōo cuahan xoo i, cúu ná nā cō cúní yehe. Jáchi ndá nā cō chindeé yehe xihín ñā cája i, cúu ná nā sáji nuu nuú i.

³¹ Ñā cán queá cáchi i xihín ndo ñā caja cáhnu ini Ndióxi saha tá nuú cuachi cája ñayivi xihín saha tá nuú tuhun quini cáhan nā. Joo tá ná cahan núu na saha ínima yii Ndióxi já queá a cája cáhnu toho ini Ndióxi sahá ñā nacaja na. ³² Caja cáhnu ini Ndióxi janda saha ndá nā ná canahá xihín yehe, da nachindahá Ndióxi nduu ñayivi joo tá ná canahá nā xihín ínima yii Ndióxi já queá a cája cáhnu toho ini Ndióxi saha ná ni nani tácu nā ndúu na ñuyívi yóho ta ni tá cuhun nā cavií saha ná nu Ndióxi.

*Xihín cuihi cúun nuú in yító cuu ndicuní ndá yító cúu dó
(Lc. 6:43-45)*

³³ Xíní ñúhu jándee ndó yító vaha ñā ná cuun cuihi vaha nu do. Jáchi tá ná jándee ndó yító núu já queá cuihi núu cuun nu do. Jáchi xihín cuihi cúun nuú in yító cuu ndicuní ndá yító cúu dó. ³⁴ Mé ndó cúu ndó tátuhun cōo jáchi cúu ndó nā quini sahá ñā cán queá cáhan ndó tuhun quini ta a cúu cana tuhun vaha yúhu ndo. Jáchi yúhu ñayivi cána tóco ndihi ñā nandicutú ñúhu ínima ná. ³⁵ In taa vaha cáhan da ndinuhu ñā vaha jáchi ndinuhu ñā vaha ñúhu ínima dá. Ta in taa quini cáhan da ndinuhu

ñā núu jáchi ñā núu quéa ndácaan ínima dá. ³⁶ Mé a ndaa ná caḥan i xihín ndo ñā tá ná ndindaa quiví caja víi Ndióxi sahá ñayivi ndúu ñuyívi anda jávi ndiquiahva ñayivi cuéntá nu Ndióxi sahá ndaja táhan tuhun núu naḥaḥan na ñuyívi yóho. ³⁷ Jáchi saḥa mé tuhun naḥaḥan ndó jan caja víi Ndióxi saḥa ndo. Ta xihín ñā jan cachi Ndióxi ñā á íin cuachi ndó á coo cuachi ndó —cáchi Jesús.

Xíca ñayivi quini ñā ná caja Jesús ñā xitúhún nu ná

(Mr. 8:12; Lc. 11:29-32)

³⁸ Java na fariseo xihín na jánaḥa ley Moisés naḥaḥan na xihín Jesús já naḥachi na já xihín á:

—Maestro, cuni nde ñā ná caja ndó in ñāha xitúhún nuú nde já ná cuni nde —naḥachi na xihín Jesús.

³⁹ Já nanducú ñehe Jesús tuhun nuú na cán já naḥachi a já xihín ná:

—Ñayivi quini, na co cuni cándúsa Ndióxi, na yóho cúu na cuni cuni ñā xitúhún. Joo a cuni toho na ñā. Ñā cuni ndusa na quéa ñā ndoho i tá quiahva nandoho Jonás, da nasacuu profeta sanahá. ⁴⁰ Jáchi tá quiahva nasandacaan Jonás uni quivi xihín uni ñuú tixi tiyacá cáhnu tá naḥocó rí da quiahva já ndacaan ri yehe, da naḥindahá Ndióxi nduu ñayivi tixi ñundáhyi uni quivi xihín uni ñuú. ⁴¹ Ta ñayivi nasanduu Nínive sanahá cán ndacuíta na chicaan na cuachi jatá ndó tá ná xinu quiví caja víi Ndióxi sahá cuachi ñayivi ndúu viti. Jáchi mé na nasanduu ñuu Nínive cán najándacoo na cuachi cája na tá naḥaḥan Jonás xihín ná ñā naḥachi Ndióxi coo. Ta yehe ín chága saḥa i a juú ga Jonás joo co cándúsa ndó yehe. ⁴² Jári tá ná xinu quiví caja víi Ndióxi sahá cuachi ñayivi ndúu tiempo viti anda já ndacuíta in ñā nasacomí cuéntá saḥa ñayivi ndúu chí xoo sur sanahá ta chicaan ñā cuachi jatá ñayivi ndúu tiempo viti. Jáchi mé ñā cán vaṭí nasahin xicá ndivaḥa ñā nu rey

Salomón sanahá nasahan ñá cuni johó ñá tuhun ndíchí cáhan da. Ta yehe ñin chága sahá í a juú ga Salomón joo cõ cándúsa ndó yehe.

Jánaḥa Jesús ña cuḥá tañu ndícó cõo tucu ínima quini ini ñayivi vatí sa naquee rí

(Lc. 11:24-26)

⁴³ Tá quéta in ínima quini ini in dataa já quée rí cuahan rí xíca nuu rí ndijáá yucú íchí ndínducú rí nuú candõo rí. Ta tá cõ ndíñeḥe rí ña já cásahá cáhvi ini rí já: ⁴⁴ “Coho ndicó cõo tucú ini da nuú nasandacaan í cán jáchi cúú á tátuhun vehé”, cáhan rí. Ta tá xínu cõo rí ini da cán já sándeḥé rí ña ñin víi va ini da cán tá quiahva víi ini vehe tá natihvi á ta nandaca ndójó vaha tóco ndihi ñaha ini a. ⁴⁵ Andá já quée tucu mé rí quini cán cuahan rí quehe rí usa ga rí quini chága a juú ga mé rí já xínu ndihi rí ndihvi rí ini dataa cán. Ta mé da cán ndiquini chága da a juú ga tá nasandacaan in tálaá rí ini da. Quiahva já ndoho ri ñayivi quini ndúu tiempo viti —cáchi Jesús.

Nána Jesús xihín ñani a cúní na cuni na a

(Mr. 3:31-35; Lc. 8:19-21)

⁴⁶ Nani cáhan yii va Jesús xihín ñayivi já naxínu cõo nána Jesús xihín ñani a ña ná cahan na xihín á cúní na. Joo nacandõo na ndíta na jata véhe. ⁴⁷ Já nasahan in na cáxi tuhun na nuú Jesús já cáchi na já xihín á:

—Jata véhe cáa ñin nánún xihín ñanún ta cahan na xuhun cúní na —nacachi na xihín Jesús.

⁴⁸ Joo nanducú ñehe Jesús tuhun nuú na cán já nacachi a já xihín ná:

—Cáhan í xihín ndó ndá na cúú ndusa nána í xihín ñani í —nacachi Jesús xihín ná.

⁴⁹ Andá já nanaha ndáha mé á na xíca tuun xihín á cán já nacachi a já:

—Na yóho cúu ná tátuhun náná i xihín ñani i. ⁵⁰ Jáchí ndá na cája ña cúní Ndióxi, tátá i, mé a íin indiví, na cán cúu ná tátuhun ñani i xihín quiahva i xihín náná i — nacachi Jesús xihín na cán.

13

Sácú Jesús quiahva sahá in da sátá tata

(Mr. 4:1-9; Lc. 8:4-8)

¹ Sa mé quivi já naqueta Jesús vehe cán já nasahan nasacoo a yati yuhú tañuhú cán. ² Ta sahá ña nataca cuahá ndivaha ñayivi nu á sahá ña cán quea nandaa mé á jatá in barco loho ta nasacoo a jatá do cán nani ndúu ñayivi ñuti yuhú tañuhú cán. ³ Anda já nacasáhá jánaha cuahá ñaha nu ná ta nasacu a quiahva nu ná já nacachi a já xihín ná:

—In da sátá tata naquee da cuahan da cata da ña. ⁴ Ta tá sátá da ña cuahan da já nacuyu java ña íchi ta cán naxinu laa ta nasaxí rí ña. ⁵ Ta java ña nacuyu a tañu yuu nuú coo cuaha ñúhu. Ta cama chá nanduta mé tata jáchi co cúná ñúhu nuú nacuyu a. ⁶ Joo tá naqueta candii já najáhichi ñahá sahá ña coo cuaha yóho a chí nandihí sahá. ⁷ Ta java tata nacuyu tañu tohíñú ta tá nasahnu tohíñú cán já nanditáha ndihí a nacaja tohíñú. ⁸ Ta java tata nacuyu a nu ñuhú vaha ta já nasahan cuahá ñaha ña jáquee na nu á. Java ña nasahan in ciento a nuú in in tata ta java ña nasahan uní jícó uxu a ta java ña nasahan oco uxu a nuú in in tata. ⁹ Na íin johó, ná cuni johó na —nacachi Jesús.

Ndícani Jesús ndá saha quea nasacu a quiahva nu ná

(Mr. 4:10-12; Lc. 8:9-10)

¹⁰ Na xíca tuun xihín Jesús cán nacayati na nu á já nacasáhá ndáca tuhún na mé á ndá cuénta quea jánaha mé á xihín quiahva cuití va nuú ñayivi. ¹¹ Anda já nacachi Jesús já xihín ná:

—Ñā cōó ñacandaa ini ndó jihna ñā cán cándaa ini ndó viti jáchi ñasuná Ndióxi xíní túní ndo cándaa ini ndó ndá quiahva cacomí mé á cuéntá sahá ñayivi. Joo ñā a ñāha cacomí Ndióxi cuéntá saha, ñā cán cúú ñā sácú u quiahva nuu. ¹² Jáchi ndá ñā sa íin ñāha nuu, ñehe táhvi ñā coo chága ñāha nu ná. Joo ñā cō á ñāha nuu, janda ñā chá íin nu ná ndindaa. ¹³ Sahá ñā cán queá cáhan i xihín ndinuhu quiahva xihín mé ndó jáchi vatí sándehe ñā joo cúú ná tátuhun ñā cō tívi nuu. Ta vatí xíní johō na joo cúú ná tátuhun ñā johō jáchi cō cándaa ini na ñā cáhan i xihín ná. ¹⁴ Ta xihín ñā yóho xínu cōo nuú tūhun ñacachi profeta Isaías sanahá ndivaha tá ñacachi da já:

Vatí xíní johō na joo cúú ná tátuhun ñā johō jáchi cō cándaa ini na ñā cáhan i xihín ná.

Ta vatí sándehe ñā joo cúú ná tátuhun ñā cō tívi nuu.

¹⁵ Jáchi ñandaji xíní túní tóco ndihi ñayivi ñuu yóho.

Ta ndájí tuun johō na ta ndájí tuun nduchú núú ñā.

Ñā cán queá a cuú cuni johō na,

ta ni a cuú candehé ñā,

ta ni a cuú cándaa ini na ñā xíní johō na.

Ta xihín ñā yóho cō ndíco cōo na nuú i ñā ná ndaja vaha i ñā, ñacahyí Isaías sanahá.

¹⁶ Joo táhvi ñacuu ndó jáchi cándaa ini ndó ñā sándehe ndó xihín ñā xíní johō ndó. ¹⁷ Mé a ndaa ná cáhan i xihín ndo ñā cuahá ndivaha ñā profeta xihín cuahá ndivaha ñayivi vaha ñaxica ini na cuni na ñā xíní ndó yóho viti joo cōo ñaxini na ñā ta ñaxica ini na cuni johō na ñā xíní johō ndó yóho joo cōo ñaxini johō na ñā.

Ndicani Jesús ñā cúní cachi quiahva ñasacu a nu ná

(Mr. 4:13-20; Lc. 8:11-15)

¹⁸ Cuni johō ndó ñā cúní cachi quiahva ñasacu u sahá da sátá tata cán. ¹⁹ Ñayivi, ñā xíní johō tūhun vaha sahá ñā sa ñacayati quiví cacomí Ndióxi cuéntá sahá ñayivi joo

cō cándaꝯ ini na ña, na cán cúú ná tátuhun tata ña ñacuyu íchi cán. Jáchi xínu tiñáhá sacuaḥa ta tává ri tuhun Ndióxi cán ínima ná. ²⁰ Ta tata ña ñacuyu tañu yuu cán náḥa ndá quiahva ín ñayivi, na cájii ndivaha ini ndíquehe tuhun Ndióxi. ²¹ Joo saḥá ña cō ñéhe ín yóho a cuhun cúná a saḥá ña cán queá chá tiempo cuití va cándúsa na tuhun Ndióxi. Jáchi tá casáhá ndóho ini na saḥá tuhun Ndióxi chí jándacoo va na ña. ²² Ta tata ña ñacuyu tañu tohiñú cán náḥa ndá quiahva ín ñayivi, na xíni johó tuhun Ndióxi joo cō jándacoo na íchi naḥica na jihna. Ta casáhá ndícani ini na saḥá ñaha ñuyíví yóho ta casáhá na cátoó na canduu cuḥá ñaha cuíca nu ná ta casáhá ndícají ini na caja na ña núu. Saḥá ña cán queá cúú á tátuhun tata ña cō cána ñaha jáquee na nuu jáchi coó ñasahnu na xihín tuhun Ndióxi. ²³ Joo tata ña ñacuyu nuú ñuhú vaḥa cán náḥa ndá quiahva ín ñayivi, na xíni johó tuhun Ndióxi ta cándaꝯ ini na ña ta cája na ña cájii ini Ndióxi xihín. Java na cúú ná tátuhun yucu trigo ña ñasahan in ciento a nuú in in tata. Ta java na cúú ná tátuhun tata ña ñasahan uní jico uxu a nuú in in tata. Ta java na cúú ná tátuhun tata ña ñasahan oco uxu a nuú in in a —ñacachi Jesús xihín ná.

Sácú Jesús quiahva saḥá yucu quini nána tañu trigo

²⁴ Andá já ñasacu Jesús inga quiahva nuú ñayivi ndúu cán já ñacachi a já xihín ná:

—Tá ná casáhá cacomí Ndióxi cuéntá saḥá ñayivi já cacuu a tátuhun tá naḥutu in dataa trigo ña vaḥa nu núhu dá. ²⁵ Joo tá sa ndúu ndihi na quíji na já naḥinu cō in da cō cúní táhan xihín dá ta naḥihin da tata yucu quini tañu trigo cán já ñaquee da cuahan da. ²⁶ Ta tá ñasahnu trigo cán ta ñacasáhá cána yóco a já nanduta ri yucu quini cán. ²⁷ Andá já ñasahan na cája chúun cán cáhan na xihín xitoho na já ñacachi na já: “Candehé ndo. Tata vaḥa queá

nachihin ndó nū ñúhu ndo joo cō cándaꝓ ini nde ndáchí naquixi yucū quini nanana xihín á yóho”, nācachi nā cán xihín xitoho na. ²⁸ Andā já nanducú ñehe dā cán tuhun nū ná já nācachi dā já xihín ná: “Ndá dā cō cúní yehe, dā cán cúú dā nācāja ñā yóho”, nācachi dā. Andā já nācachi nā cája chúun nū dá cán já xihín dá: “Á cō cúní ndó ñā ná quihvi nde tuhun ndihi nde yucū quini cáa tañu trigo”, nācachi na xihín dá. ²⁹ Andā já nācachi dā já xihín ná: “Ná coo mé á jáchí tiaḥva náá nani túhun ndó yucū quini jan cuu tuhun ndó yucū trigo xihín á. ³⁰ Vaha chá ná quiaḥva í ñamaní cuahnu a xihín trigo jandā quiaḥva ná ndindaa tiempo jáqueé trigo. Ta tá sa jáqueé já cahnda i chuun nuú nā jáquee ñā ná tavá xóo na yucū quini jihna ñúhú ta ná cató nā ñā tá nuhni tá nuhni ñā ná chicaꝓ ñúhú ná ñā. Ta andā jáví ná játaca na trigo taán vaha na ini yáca ñaha í”, nācachi dā —cáčí Jesús sácú a quiaḥva nū ná.

Sácú Jesús inga quiaḥva saḥa ndíqui mostaza

(Mr. 4:30-32; Lc. 13:18-19)

³¹ Ta nāsacu Jesús inga quiaḥva nū ná já nācachi a já xihín ná:

—Tá ná xinu cōo quiví cacomí Ndióxi cuéntá saḥá ñayivi já cúú á tátuhun in ndíqui mostaza ñā chíhin in datāa nū ñúhu dā. ³² Cúú á ndíqui loho chága nū tóco ndihi ndíqui válí ín ñuyíví. Joo sáḥnu a jandā quiaḥva ndúu a in yíto, dó cáḥnu nū ndíhi yíto nū xinu cōo laa cávaha rí choḥo rí nū ndáḥa do —cáčí Jesús.

Sácú Jesús quiaḥva saḥa yusá naxaa

(Lc. 13:20-21)

³³ Ta nāsacu Jesús inga quiaḥva nū ná já nācachi a já xihín ná:

—Tá ná cacomí Ndióxi cuéntá saḥá ñayivi já cacuu a tátuhun tá cává táhan in ñáñáḥa uní táhnda náḥnu harina

xihín loho yúsá naxaa ña ná jánañu a tóco ndihi mé yúsa cán —ñacachi Jesús.

Sácu Jesús quiahva cuití va nuú ñayivi

(Mr. 4:33-34)

³⁴ Xihín ndinuhu quiahva cuití najánaha Jesús tóco ndihi ña yóho nuú ñayivi. ³⁵ Já nacaja Jesús ña ná xinu çoo nuú ña ñacachi in da profeta sanahá tá ñacachi da já: Xihín ndinuhu quiahva cuití va çahan i xihín ñayivi, ta çahan i sahá ñaha nasahiin jehé nu ná janda mé saha tá camani çava sahá sahá ñuyiví —cáchi tuhun Ndióxi.

Ndicani Jesús ña cuni cachi quiahva nasacu a sahá yucu quini nanana tañu trigo cán

³⁶ Tá nandihí nandindayí Jesús ñayivi cuaha ndúu cán já naquihvi a ini vehe. Anda já ñacativi na xíca tuun xihín a cán nu á já ñacachi na já xihin á:

—Ná ndicani ndó nuú nde ndía cuni cachi quiahva nasacu ndó sahá yucu quini nanana tañu trigo cán —ñacachi na.

³⁷ Anda já ñacachi Jesús já xihin ná:

—Da xútu tata vaha cúu yehe, da ñachindahá Ndióxi nduu ñayivi. ³⁸ Ta ñúhu nu xútu u tata cúu á ñayivi ñuyiví. Ta tata vaha cán cúu á yuhú nuú na cómi Ndióxi cuénta saha. Ta yucu quini cán cúu á yuhú nuú ñayivi quini, na cúu cuénta rí quini. ³⁹ Ta da ço cuni táhan xihin i nasahan da naxutu da yucu quini nu ñúhu cán ta cúu dá yuhú nuú tiñahá sacuaha. Ta tiempo jáquee na cán cúu á tá ná xinu çoo quiví caja víi Ndióxi sahá ñayivi ndúu ñuyiví. Ta na xíca jáquee cán cúu ná tátō Ndióxi. ⁴⁰ Ta tá quiahva nacaja na cán xihin yucu quini tá najátaca na ña ta nachicçaan ñúhu na ña quiahva já yaha ri xihin ñayivi ñuyiví yóho tá ná tandaa quiví ndihi sahá ñuyiví. ⁴¹ Ta

yehe, da nāchindahá Ndióxi nduu ñayivi chindahá i tātó mí i ña ná cahnda java táhan na nā cómi i cuéntá saha xihín nā cō cúu cuéntá mí i. Jáchí nā cán jácahan nā inga na caja na cuachi xihín java ga nā cája ña núu. ⁴² Ta jáqueta nuu i nā ini indayá ta cán cuacu na anda quiahva chicáhñá nuhu nā jáchí ndóho ndivaha ini na. ⁴³ Ta anda já nā cája ña cúni Ndióxi ndiyihvi ndaa na tá quiahva yéhe candii nuú cacomí Ndióxi cuéntá saha ná, mé á cúu á tátá nā. Ndá nā ín johó, ná cuni johó na.

Sácú Jesús quiahva sahá sató jjuhún ndácaan jehé

⁴⁴ Tá ná cacomí Ndióxi cuéntá sahá ñayivi cacuu a tátuhun ña yáha xihín in dataa tá ndínehe dá in sató jjuhún ña ndácaan jehé in ñundáhyi. Ta tá nandihí já chíjahvi tucu da ña xihín ñúhu. Ta já cávatá ndivaha da cuhun da jicó da tóco ndihí ña cómi da ña ná cueen da ñundáhyi nuú nanduxu mé sató jjuhún cán.

Sácú Jesús quiahva sahá in jíqui sándacu na ña yahvi ndivaha

⁴⁵ Tá ná cacomí Ndióxi cuéntá sahá ñayivi cacuu a tátuhun tá xíca nuu in da cája ndahvi ndúcú da jíqui sándacu na ña yahvi ndivaha. ⁴⁶ Ta tá ndítahan da in jíqui yahvi ndivaha já cuahan da jicó da ndihí ñaha cómi da ña ná cueen da jíqui yahvi ndivaha cán.

Sácú Jesús quiahva sahá in ñunu táva tiyacá

⁴⁷ Ta tá ná cacomí Ndióxi cuéntá sahá ñayivi cacuu a tátuhun in ñunu jácana na nuú tañuhú ta já tíin na tá nuú tiyacá. ⁴⁸ Ta tá sa nachutú ñunu cán já táva nā tiyacá cán yuhú tañuhú ta cán sácoo na ndacahnda java na ri. Ta rí vaha cán táán vaha na ini toyicá nā joo rí núu cán xíta ri cája na. ⁴⁹ Quiahva já yaha ri xihín ñayivi tá ná ndihí sahá ñuyíví. Jáchí queta tātó Ndióxi ndacahnda java nā vaha tañu nā quini. ⁵⁰ Ta ñayivi quini cán chicaan nā ini

indayá ta cán cuacu na janda quiahva chicáhná nuhu na jáchi ndóho ndivaha ini na —cáchi Jesús.

Tá jánaḥa Jesús sahá ña saá xihín ña yata

⁵¹ Tá nandihí já nandaca tuhún Jesús na já nacachi a já:

—Á cándaḥa ini ndó tóco ndihí ña cáhan i yóho —cáchi a.

—Ajan, cándaḥa ini nde ña —nacachi na cán xihín á.

⁵² Anda já nacachi Jesús já xihín ná:

—Tá jácuaha in da jánaḥa ley Moisés sahá ndaja ndiquiahva da mé dá ndáḥa Ndióxi cacomí a cuénta saḥa dá já cúu dá tátuhun in daṭaa, da ín ñaha ini vehe. Ta xini vaḥa da tavá da ñaha da á cúu á ña saá á ña yata —cáchi a.

Tá cuahḥan Jesús ñuu Nazaret

(Mr. 6:1-6; Lc. 4:16-30)

⁵³ Tá nandihí najánaḥa Jesús xihín quiahva yóho já naquee a cuanúhu a. ⁵⁴ Tá naxinu a ñuu mé á já nacasáhá jánaḥa ini veñuhu cán. Ta jandá johó cátoṅtó ñayivi ñuu cán já cáchi na já:

—Ta ndájá nacatiahva nahá ri da yóho ña xini da. Ta ndaja cája da ñaha xituhún yóho. ⁵⁵ Á a juú da yóho cúu jahyi da cája chúun xihín yito. Á a juú náná da yóho cúu María. Ta ñani da cúu Jacobo xihín José xihín Simón xihín Judas viti. ⁵⁶ Ta sa mé ñuu yóho ndúu ri quiahva da jan. Ndájá nacatiahva nahá da ña jánaḥa da nu yo, dá já —nacachi xihín táhan na cán.

⁵⁷ Ta chí coó naxeen na candúsa ñahá na. Sahá ña cán queḥa nacachi a já xihín ná:

—Vatí tóco ndihí ñayivi cája cáhnu na in profeta joo na vehe da xihín na ñuu da co cándúsa na da —cáchi Jesús.

⁵⁸ Ta coó nacaja cuahá Jesús ña xituhún ñuu cán jáchi coó nacandúsa toho ñayivi cán mé á.

14

Tá naxihi Juan, da nacaja ndúta ñayivi

(Mr. 6:14-29; Lc. 9:7-9)

¹ Mé tiempo cán naxini johó Herodes, da cúú gobernador cán ña ndítuhún na sahá Jesús. ² Anda já nacachi da já xihin mozo da:

—Á a juú Jesús cúú á Juan, da najácandúta ñayivi ta viti nanditacu tucu da. Sahá ña cán queá ín ndée da cája da tóco ndihi ña cája da yóho —cáchi Herodes.

³ Jáchi janda mé saha natiin Herodes Juan nacató ñahá da ta naxicaca da da vecaa. Ta nacaja da ña yóho sahá Herodías, ña nasacuu ñájíhí Felipe, ñani da. ⁴ Jáchi mé Juan najánani ñahá da sahá ña ín Herodes xihin ña ta já nacachi da:

—Co ndítahan coún xihin ñájíhí ñanún —nacachi Juan xihin dá.

⁵ Ta janda já nanducú Herodes cahní da Juan joo a cúú caja da ña jáchi yíhví da ñayivi sahá ña cándúsa na ña cúú Juan in profeta naxindahá Ndióxi. ⁶ Joo in tañu nani ndácaan Juan vecaa já nacavaaha Herodes víco sahá quivi nacacu da. Ta nandaca ndíhí ña cúú jahyi Herodías cán naxita sahá ña nu ndíhi na ndúu víco cán. Ta a juú quiahva nacajji ini Herodes xihín ña yóho. ⁷ Sahá ña cán queá quivi Ndióxi táva da tá sahan da tuhun da nu ña cán ña quiahva da nu ña ndá ña cúní mé ña caca ña nu dá. ⁸ Tá nandihí nandaca tuhún jihna ña náná ña já ndáva ña nasahan ña nu Herodes já cáhí ña já xihin dá:

—Viti ñúhú cúní ña ná quiahva ndó yiquí jíní Juan, da jácandúta ñayivi nuú i ini in cohó cáhnu —nacachi ña xihin dá.

⁹ Tá nacachi ña já xihin Herodes já nacacuéha ndivaha ini da. Joo sahá ña sa natavá da quivi Ndióxi tá nasahan da tuhun dá nu ña cán ta sahá ña cúní da candoo vaha da

nuú nā ndúu vícō xihín da cán sahá ñā cán quēa ñasahnda da chuun ñā ná quiahva na ñā nu ñá. ¹⁰ Chí ñasahnda da chuun ñā ná chitúhūn ná yiquí jíní Juan ini vecāa cán. ¹¹ Ta já ñachicaan nā yiquí jíní da ini in cohō cáhnu já ñasahan nā ñā nu ñá cán. Anda já ñandiquiahva ñá cán ñā ndáha náná ñā.

¹² Anda jáví ñaxinu nā ñaxica xihín Juan cán já ñasahan nā ñandiquehe na yiquí cuñu da ta ñajánduxu nā da. Ta já ñasahan nā ñacaxi tuhun na ñā yóho nuú Jesús.

Tá ñasahan Jesús ñā cuxu uhun mil taa
(Mr. 6:30-44; Lc. 9:10-17; Jn. 6:1-14)

¹³ Tá ñaxini johō Jesús saha Juan já ñaquee xóo a ini in barco loho cuahan nuú cō ndúu ñayivi. Joo tá ñaxini johō ñayivi ñā cuahan Jesús já ñaquee na ñuu na ndícō ñā cuahan sahá ñā nu ín a. ¹⁴ Ta tá ñanuu Jesús barco cán já ñaxini a cuahá ndivaha ñayivi ta ñatahvi ini a saha ná. Ta chí ñandaja vaha mé á ñā quíhvi ñaquixi tañu nā cán. ¹⁵ Ta tá sa cáhini cuahan já ñacayati ñā xíca tuun xihín a cán nu á. Já cáhí ñā já xihín á:

—Sa ñahini va ta a juú xoo nu ndúu ñayivi quēa yóho. Ndindayí ndó ñayivi ná cūhūn ñā ñuu válí yati ñā já ná cueen na ñā cuxu na —ñacachi ñā cán xihín á.

¹⁶ Anda já ñacachi a já xihín ná:

—Cō xíní ñúhú toho quee na cūhūn ñā. Mé ndó quiahva ndó ná cuxu na —ñacachi Jesús.

¹⁷ Anda já ñacachi tucu ñā cán já xihín á:

—Cō mé ñaha va cuxu na yóho. Uhun víxí pan xihín ivi laá tiyacá cuití va ín yóho —ñacachi na xihín Jesús.

¹⁸ —Taxi ndó a chóho —ñacachi Jesús xihín ná.

¹⁹ Anda já ñasahnda Jesús chuun ñā ná ndaca nduu ndihi ñā cán nuú yucu. Anda já ñatiin a ndíhūhūn pan xihín ndíví tiyacá cán já ñasandehé a chí indiví já

nandiquiahva ndixahvi nu Ndióxi. Tá nandihí já nasahnda java pan ta nasahan ña nuú na xíca tuun xihín á cán ta na cán nandicahnda na ña nuú ñayivi cuaha cán. ²⁰ Ta tóco ndihí na naxixi na janda quiahva nachutú na. Ta tá nandihí naxixi na já najátaca na ña nacandoo cán ta najáchutú na uxu ivi toyicá xihín ña nacandoo cán. ²¹ Ta tóco ndihí na naxixi cán nasacuu na tátuhun uhun mil taa. Co cáhan sahá najihí xihín na valí.

Tá naxíca sáhá Jesús nuú tañuhú

(Mr. 6:45-52; Jn. 6:16-21)

²² Ta tá nandihí já nacaja Jesús ña ná ndihvi na xíca tuun xihín á cán ini in barco ña ná cuhun cuéé na inga xoo tañuhú cán nani candoo tóo mé á jándindayí a ñayivi cuaha cán. ²³ Ta tá sa najánduta tóco ndihí ñayivi já nandaa mé á yucu cuahan caça tahví a nu Ndióxi. Tá nandihí já nacuaá ta in túhún mé á ndacaan xíca tahví a nu Ndióxi cán. ²⁴ Ta ndaja coo barco loho, dó cândojó na xíca tuun xihín á cán sa naxinu coo dó janda mahñú tañuhú cuahan do. Ta ndícojo ndivaha tañuhú jáchi xoo cuahan na vaxi tachi. ²⁵ Joo tátuhun sa cuahan tívi já xíca sáhá Jesús cuahan nuú tañuhú naxinu a nu ná. ²⁶ Ta tá naxini na xíca sáhá Jesús vaxi a nuú tañuhú cán já nacatóntó na. Ta nacasáhá na cáyuhú cóhó na sahá ña yíhví na já cáchí na já:

—Ínima quéa vaxi yóho —cáchí na.

²⁷ Joo ivi laá nandicahan Jesús xihín ná já cáchí a já:

—Ndacú coo ini ndó jáchi yehe va cúu u. A yíhví toho ndó —nacachi a xihín ná.

²⁸ Anda já nacachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ña ná cuu saa i nu ndo ta ná caca i nuú tañuhú —nacachi da xihín Jesús.

²⁹ Ta já cáchí Jesús já:

—Naha quíi —cáchi a xihín dá.

Anda já nanuu Pedro barco cán ta nacasáhá xíca sáhá da nuú tañuhú cuahan da nuú Jesús. ³⁰ Joo tá naxini da tachi ndeé xícó nuú tañuhú cán já nayihví da. Chí ivi laá nacasáhá quéta nuu da cuahan da ini tañuhú. Já nacayuhú cóhó da já cáchi da já xihín Jesús:

—Chindeé ndó yehe, xitoho i —nacachi da xihín á.

³¹ Ta cama chá natiin Jesús ndáha da ta já nacachi a já xihín dá:

—Ndá cuéntá quéa co cándeé chága inún yehe ta nacasáhá cáhvi ivi johó inún —nacachi Jesús xihín dá.

³² Ta tá nandaa ndívi na jata barco já nacatáji tachi cán.

³³ Anda já nacaja cáhnu na ñúhu ini barco cán Jesús já cáchi na já xihín á:

—Mé a ndaa táhyí cúu jivi ndusa ndó in túhún jini já jahyi Ndióxi —nacachi na xihín á.

Tá nandaja vaha Jesús na quíhvi ndúu ñundáhyi Genesaret (Mr. 6:53-56)

³⁴ Ta já naxica loho ga na nuú tañuhú cán já naxinu coo na ñundáhyi Genesaret. ³⁵ Ta tá nandicuni ñayivi ndúu cán mé á já nachindahá na chuun nasahan nuú ndaja táhan ñayivi ndúu ndijáá ñundáhyi cán. Já ñéhe ndihi na na quíhvi nacasa na nu á. ³⁶ Ta na quíhvi cán naxica tahví na nu á ña ná quiahva ñamani cani ndaa ndáha ná yuhú jahmá níhnu a ta tóco ndihi na nacani ndaa ndáha jahmá a nandivaha na.

15

Ña cája quini ínimá ñayivi (Mr. 7:1-23)

¹ Ndaja coo java na fariseo xihín java na jánaha ley Moisés ndúu ñuu Jerusalén cán nacayati na nuú Jesús já nacasáhá cáchi na já xihín á:

² —Ndávaha cō cāja nā xíca tuun xuhun ña ñacachi tásáhnū jícó yō cāja na. Ndávaha xíxi na tá cámanī ndahá nā tá quiahva sáhndá ley cāja na —ñacachi nā cán xihín Jesús.

³ Anda já nanducú ñehe Jesús tuhun nū ná já ñacachi a já:

—Ta jári ndóhó va, ndá cuéntá queá jándacoo ndó ña sáhndá Ndióxi nū ndó cāja ndó. Ta ña cāja ndó queá ndíco ndó costumbre mé va ndó. ⁴ Jáchi sáhndá Ndióxi chuun já cáhí a já: “Caja cáhnún tátún xihín nánún.” Ta jári cáhí a: “Ndá nā ná chícaan cháhan jatá tátá nā á náná nā, ndítahan quivi na”, cáhí a. ⁵ Joo ndóhó, jáñaha ndó nuú ñayivi ña cuu cahan nā já xihín tátá nā á náná nā: “A cuú chindeé e ndóhó jáchi sa nasacu xoo i ñaha i quiahva i ña nū Ndióxi”, cáhí nā. ⁶ Tá ná cachi na ña yóho já queá cō ndúsa ga chindeé nā tátá náná nā. Quiahva johō cāja ndó ta sácu xóo ndó ña nasahnda Ndióxi chuun nū ndo ta ndája ndó a tátuhun in ñaha ña cōó saha. Jáchi ndíco cáhnū ndó ña najándacoo tásáhnū jícó ndo nū ndo. ⁷ Cō cúú ndó tá quiahva ndáa ndó. Mé a ndaa ñacahan profeta Isaías saha ndo sanahá tá ñacahyí da ña ñacachi Ndióxi:

⁸ Yuhú ñinu uun na cāja cáhnū na yehe.

Ta cō cāja cáhnū na yehe xihín ndinuhu ínimā nā.

⁹ Ta mé a uun queá cāja cáhnū na yehe,

jáchi ña jáñaha nā nuú ñayivi cuití va cúú á ña quíxi jini mé va na, ñacachi profeta Isaías sanahá ndivaha —ñacachi Jesús xihín nā cán.

¹⁰ Tá nandihí já ñacana Jesús tóco ndihí ñayivi ndúu cán já ñacachi a já xihín ná:

—Cuni johō vaha ndó ña cáhan i xihín ndó ta ná candaa ini ndó ña. ¹¹ A juú ñaha xíxi ñayivi ndája quini ínimā ná. Tuhun quini quéta yúhu ná ña jan queá cāja quini ñahá —ñacachi Jesús.

¹² Tá nandihí já n̄acayati n̄a xíca tuun xihín Jesús cán n̄u á já n̄acachi na já xihín á:

—Chí a váha mé n̄acuu ini n̄a fariseo tá n̄axini j̄oho na ña n̄acachi ndó jan —n̄acachi n̄a cán.

¹³ Anda já n̄acachi Jesús já xihín ná:

—Ñayivi, n̄a c̄o ndíquehe v̄aha tuhun Ndióxi cúu ná tátuhun in yíto, dó c̄o n̄ajánde Ndióxi, tátá i ña ín indiví. Sahá ña c̄o cúu dó cuéntá mé á já tandaa quivi ña tuhun mé á d̄o anda yóho d̄o. ¹⁴ Sahá ña cán queá c̄o ndítahan ndicani ini ndó sahá n̄a jan jáchi n̄a cuaá va cúu ná. Ta a cúu toho caja in da cuaá candaca da inga da cuaá c̄uhun da jáchi ndíví já da ndacava da yávi —n̄acachi Jesús.

¹⁵ Tá nandihí já n̄acachi Pedro já xihín Jesús:

—Ndicani loho ndó nuú nde ndaja cáa ña cáhí ndo ña c̄o cája quini toho ña xíxi ñayivi mé ná jáchi c̄o cánda ini nde ña —n̄acachi Pedro xihín Jesús.

¹⁶ Já n̄acachi Jesús já xihín ná:

—Á c̄o toho xíní túní ri ndóhó va, v̄aha. ¹⁷ Jáchi c̄o cánda ini ndó ña tóco ndihi ñaha xíxi ñayivi a cuú caja quini a n̄a. Jáchi ña xíxi ñayivi c̄o xínu a ini ínima ná joo xínu c̄o ña tixi va na já queta tucu a yiquí cuñu na.

¹⁸ Ña cuu ndaja quini ñayivi cúu ña quíxi ínima ná tátuhun tuhun cáhan n̄a xihín ña cája na. ¹⁹ Jáchi chí ínima ñayivi quíxi ña cáhvi núu ini na tátuhun ña cáhvi ini na cahní n̄a ndij. Ta sa mé cán quíxi ña cáhvi ini in dat̄aa coo da xihín ñájíhí ñani táhan da á xihín in ñá c̄o cúu ñájíhí da. Ta sa mé cán quíxi ña ndiáva íní da caja cuíhna da. Ta sa mé cán quíxi ña cávaha jíquí da tuhun sahá ñani táhan da ta jári quíxi ña cánahá da xihín Ndióxi. ²⁰ Tóco ndihi ña cáhvi núu ini ñayivi caja na, ña yóho queá ndája quini a n̄a. Joo c̄o cáquini toho ñayivi sahá ña c̄o ndáhá n̄a tá cámani cuxu na tá quíahva ín costumbre na —n̄acachi Jesús xihín n̄a xíca tuun xihín á cán.

Tá naqandee ini in ñá tóho Jesús

(Mr. 7:24-30)

²¹ Tá nandihí já naqee Jesús cuḥan chí ñundáhyi cuéntá Tiro xihín cuéntá Sidón cán. ²² Ta nu xíca cuḥan cán naqueta in ñáñáha ñundáhyi Canaán nu á já cáyuhú ña já cáchí ña já xihín á:

—Xitoho i, da naquixi chichi David caja ndó ñamaní candáhví loho ini ndó yehe. Chindeé ndó jahyi jíhí i jáchí rí quini ndácaan ini ñá —naçachi ñáñáha cán xihín Jesús.

²³ Joo ni in túhún tuhun coo nanducú ñehe Jesús nu ña. Anda já naçativi na xíca tuun xihín a cán nu á já naçachi na já xihín á:

—Taxi ndó ñá jan ná quee ñá cuḥun ña jáchí cáyuhú ña ndácaa ñá jata yó vaxi ñá —naçachi na cán xihín Jesús.

²⁴ Anda já naçachi Jesús xihín ñáñáha cán já:

—Naçindahá Ndióxi yehe vaxi i nuú ñayivi Israel cuití va, mé na cúú tátuhun ndicachi, rí nandiñúhú —naçachi Jesús.

²⁵ Anda já ndáva ñá cán naxinu coo ñá naçaxítí ña nu Jesús já cáchí ña já xihín á:

—Caja ndó ñamaní chindeé loho ndó yehe, xitoho i.

²⁶ Anda já naçachi Jesús já xihín ñá:

—A váha toho candaa i pan ndahá na valí ta já cana i ña nuú tina —naçachi Jesús xihín ñá cán.

²⁷ Anda já naçachi ñá cán já xihín Jesús:

—Mé a ndaa cáhan ndo joo anda tina, rí ndúu tixi mesa xíxi rí ña jácyu jahyi xitoho rí —naçachi ñá cán xihín Jesús.

²⁸ Anda já naçachi Jesús já xihín ñá:

—Mé a ndaa cándeé cáhnu inún Ndióxi. Ná coo a tá quiḥva cúni mún —naçachi Jesús xihín ñá.

Chí mé hora já nandivaha jahyi jíhí ña.

Ndája vaha Jesús cuḥa na quihvi

²⁹ Tá nãndihi já naquee Jesús cuãhan já nãxinu coo a yati yuhú tañuhú Galilea. Já nãndaa in jini yúcu ta cán nasacoo a. ³⁰ Ta já nãcasáhá nãtaca cuãhá ndivãha ñayivi já ñéhe na nã quíhvĩ saha xihín nã cuaá xihín nã níhi xihín nã réncõ ndáha. Ta cuãhá ga nuú nã quíhvĩ ñéhe na nãcasaa nã nãchinduu na nã nu Jesús. Ta nãndaja vaha mé á nã. ³¹ Ta xihín ñã yóho a juú quiahva nãcatóntó nã tá nãxini na ñã nãcasáhá ndicãhan nã níhi. Ta nãcatóntó nã tá nãxini na ñã nãndivãha ndahá nã réncõ ta ndícaca vaha nã quíhvĩ saha ta quiahva já nãndivãha ri nã cuaá. Ta nãcasáhá nã cája cáhnu na Ndióxi, mé a cómi cuéntá sahá nã Israel.

Tá nasahan Jesús ñã cuxu comi mil nataa

(Mr. 8:1-10)

³² Anda já nãcana Jesús nã xíca tuun xihín á já nãcachi a já xihín ná:

—Táhnda ndivãha ini i sahá ñayivi yóho jáchi sa nãxinu unĩ quivĩ ndúu na xihín i ta chí coó ga ñã cuxu na. Ta co cúni chindahá i nã nuhu nã vehe na jáchi cámanĩ cuxu na ta tiahva náá cuitá nã ta cuyu na íchi —nãcachi Jesús.

³³ Anda já nãcachi nã xíca tuun xihín a cán já:

—Coó toho ñuu yati va ta ni mí, a cuú quiahva í ñã cuxu na jáchi coó toho ñayivi ndúu yóho nuú cueén ñã cuxu na —nãcachi nã cán xihín Jesús.

³⁴ Já nãcachi Jesús já:

—Ndaja pan cómi ndõ.

Já nãcachi nã cán já:

—Usa pan xihín java tiyacá válĩ.

³⁵ Anda já nasahnda Jesús chuun ñã ná cacoo ndihi ñayivi nu ñúhu cán. ³⁶ Ta já nãtiin a ndíhusa pan cán xihín java tiyacá válĩ cán já nãndiquiahva ndixahvi nu Ndióxi. Ta já nasahnda java ñã ta nasahan ñã nuú nã xíca tuun xihín á cán ñã ná ndicahnda na ñã nuú ñayivi cuãha

cán. ³⁷ Ta naxixi tóco ndihi na janda quiahva naxhutú tixi na. Ta tá najánditaca na ña nacandoo cán já naxhutú usa toyicá xihin ña. ³⁸ Ta na naxixi cán cúu ná comi mil taa ta co cáhan sahá najihí xihín na valí. ³⁹ Ta tá nandihí nandindayí Jesús ñayivi já nandihvi a ini barco já naxinu coo a ñundáhyi cuéntá Magdala.

16

Cúni na fariseo xihín na saduceo cuni na in ña xitúhún caja Jesús

(Mr. 8:11-13; Lc. 12:54-56)

¹ Ta ndaja coo naxinu coo na fariseo xihín na saduceo nu Jesús. Ta sahá ña cúni na coto ndojó cuití ñahá na sahá ña cán queá naxica na nu á ña ná caja in ña xitúhún cuéntá indiví já ná candaa ini na á mé a ndaa cúu á ña nachindahá Ndióxi. ² Anda já nanducú ñehe Jesús tuhun nu ná já nacachi a já xihin ná:

—Tá nahini já cáchí ndo já: “Tiempo vaha ndivaha cacuu a jáchi ndiyéhe cuhá indiví”, cáchí ndo. ³ Ta naha cáchí ndo já: “Viti ndusa queá cuun ndeé ndivaha javi jáchi íin víco ndivaha ta íin víco cuhá indiví”, cáchí ndo. Co cúu ndó tá quiahva ndaa ndó. Ndá cuéntá queá tiavha ndó ndicuni ndó ndá queá coo tá sándehe ndó indiví joo co tiavha ndó ndicuni ndó ndá tiempo cúu á viti. ⁴ Ñayivi quini, na co cúni candúsa Ndióxi, na cán cúu na xica ña ná caja i ña xitúhún nu ná. Joo ni in túhún toho ñaha xitúhún a cája ga i nu ná. In túhún ña candehé na cacuu a ña tandaa quivi ndoho i tá quiahva nandoho profeta Jonás sanahá ndivaha —nacachi Jesús xihin ná.

Já naquee a cuahan.

Tá sácú Jesús quiahva sahá na fariseo

(Mr. 8:14-21)

⁵ Ta ndaja coo naxinu coo a inga xoo tañuhú xihín na xíca tuun xihín á cán ta nandindójó na cán cañehe na pan cuxu na. ⁶ Tá nandihi já nacachi Jesús já xihín ná:

—Candehé ndo. Cuéntá coo ndó xihín na fariseo ta xihín na saduceo jan jáchi ña jánaha na cúú á tátuhun yúsa naxaa ña cáva táhan na xihín harina cávaha na pan —nacachi Jesús.

⁷ Joo na xíca tuun xihín á cán ndítuhún xihín táhan na ña nacachi Jesús já sahá ña coo pan ñehe na cuahan xihín ná.

⁸ Ta tá nacandaa ini Jesús ña cáhan na já nacachi a já xihín ná:

—Ndá cuéntá quea co cándéé cáhnu ini ndó yehe ta cáhan ndo ña cáhí i ña yóho xihín ndo sahá ña co ñehe ndó pan vaxi ndó. ⁹ A ñaha cándaa ini ndó. Ndítahan ndicuhun ini ndó ña ndajaja cuahá i uhun víxí pan tá naxixi uhun mil taa. Ta sa xini ndó ndaja toyicá najácutú ndo xihín ña nacandoo cán. ¹⁰ Ta ndítahan ndicuhun ini ndó ña nacaja i xihín usa pan tá nandicahnda i ña naxixi comi mil taa ta sa xini ndó ndaja toyicá najácutú ndo xihín ña nacandoo cán. ¹¹ Ndá cuéntá quea co cándaa toho ini ndó ña coo nacachi i ña yóho xihín ndó sahá ña coo pan ñehe ndó vaxi ndó. Joo nacachi i ña cuéntá coo ndó xihín na fariseo ta xihín na saduceo jáchi ña jánaha na cúú á tátuhun yusá naxaa ña cáva táhan na xihín harina cávaha na pan —nacachi Jesús.

¹² Tá nacachi Jesús ña yóho já nacandaa ini na xíca tuun xihín á cán ña a juú toho sahá yusá naxaa cáhan Jesús sahá. Ña cuni Jesús cachi a xihín ná quea cuéntá vaha ná coo na xihín ña jánaha na fariseo xihín na saduceo.

Tá cáxi tuhun ndaa Pedro ña cúú Jesús mé á nqchindahá Ndióxi cacomí a cuéntá sahá ñayivi

(Mr. 8:27-30; Lc. 9:18-21)

¹³ Tá naxinū cōo Jesús ñundáhyi Cesarea cuéntá Filipo já nandaca tuhún a na xíca tuun xihin á cán já nacachi a já xihin ná:

—Ndá da cáchí ñayivi cúu yehe, da nachindahá Ndióxi nduu ñayivi —nacachi Jesús.

¹⁴ Já nacachi na cán já:

—Java na cáchí na ña cúu ndó Juan, da nacaja ndúta ñayivi. Ta java na cáchí na ña cúu ndó profeta Elías. Ta java na cáchí na ña cúu ndó profeta Jeremías. Ta java na cáchí na ña cúu ndó in táhan profeta nasanduu sanahá —nacachi na.

¹⁵ Anda já nacachi Jesús já xihin ná:

—Ta ndóhó ri, ndá da cáchí ndó cúu u —nacachi a.

¹⁶ Anda já nanducú ñehe Simón Pedro tuhun nu Jesús já nacachi da já xihin á:

—Mé ndó cúu Cristo, ña nachindahá Ndióxi cacomí cuéntá sahá ñayivi. Ta cúu ndó in tuhún jini já jahyi Ndióxi, mé a tácu íin indiví —nacachi da.

¹⁷ Anda já nanducú ñehe Jesús tuhun nu dá já nacachi a já xihin dá:

—Tahví nahá cúun, Simón, jahyi Jonás jáchi ni in tuhún ñayivi cōo nacaxi tuhun ña yóho xuhun. In tuhún tátá i, mé a íin indiví nanaha ña yóho nuun. ¹⁸ Ta quiahva joho cáchí ri yehe saha yóhó: Yohó cúun Pedro ta quivun cuni cachi a tóto. Ta cúun tátuhun yuu ndúhu saha in vehe nuú cavaha i veñuhu mí i jáchi yóhó caca nuún cahun saha i nuú ñayivi já ná quee vaha na xihin tiñahá sacuaḥa já ná a cūhun na indayá. ¹⁹ Ta caja i xuhun ña ná cuu ndicanún nuú ñayivi ndaja ndiquiahva na mé ná ndáha i cacomí i cuéntá saha ná. Cacu a tátuhun quiahva i yávi nuun ña ná cunún íchi nuú ndihvi ñayivi cacomí i cuéntá saha ná. Tá cō sáhun ñamani ná ndihvi ñayivi cán já quea a quiahva toho i ñamani nu ná. Joo tá sáhun ñamani nu ná ndihvi na

cán já quéa quiahva ri yehe ñamaní nu ná —cáchi a xihín Pedro.

²⁰ Anda já nasahnda Jesús chuun nuú na xíca tuun xihín á cán ña ná a cáxi tuhun na xihín ni in túhún ñayivi ña cúu mé á Cristo, mé á nachindahá Ndióxi cacomí cuéntá sahá ñayivi.

Tá cáxi tuhun Jesús ña quivi a

(Mr. 8:31-9:1; Lc. 9:22-27)

²¹ Ta janda mé quivi já ñacasáhá Jesús cáxi tuhun a xihín na xíca tuun xihín á ña ndítahan nu á cuhun a ñuu Jerusalén. Ta mé cán ndoho ndivaha ini a ndahá na sacuahá veñuhu xihín ndahá na sacuahá nuú jutu xihín ndahá na jánaha ley Moisés. Ta caja xíxi ri na cán va xihín á ta cahni ñahá na. Joo tá ná xinu uni quivi nditacu tucu a. ²² Anda já natavá xoo Pedro Jesús já ñacasáhá da jánani ñahá da já ñacachi da já xihín á:

—Ama ná yaha ña yóho xihín ndó, xitoho i. Ná a quiahva toho Ndióxi ñamaní ndoho ndó já —ñacachi Pedro xihín Jesús.

²³ Joo ñacava nuu Jesús sándehe a nu Pedro ta já cáchi a já xihín dá:

—Cuáhán quee Satanás, rí cúu tiñahá sacuahá. Tá quiahva ín na sáji nuu nu ná quiahva já íun nuú i. Jáchi co cáhvi inún tá quiahva cáhvi ini Ndióxi joo cáhvi inún tá quiahva cáhvi ini ñayivi cuéntá ñuyivi yóho —ñacachi Jesús xihín dá.

²⁴ Anda já ñacachi Jesús já xihín na xíca tuun xihín a cán:

—Ndá na cuni candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coo caja toho a ná quivi na sahá i. ²⁵ Jáchi ndá na catóo coo chága ñuyivi yóho ndihi saha ná. Joo ndá na sahan ndeé ini quivi

sahá i xihín sahá tuhun Ndióxi, ñehē táhvi ná catacu na anda ama cáa quivi. ²⁶ Vatí ná quee vaha in na ñuyívi yóho ta cómi ná tóco ndihi ñaha ñuyívi yóho joo ndá chuun quéa tá nu ndíhi ndihi saha ná indayá. Jáchí ni in ñaha a cuú chahvi in na saha ínima ná ña ná a cúhun na indayá. ²⁷ Jáchí yehe, da nachindahá Ndióxi nduu ñayivi quixi tucu u xihín ndée Ndióxi, tátá i ta xihín ndée táto Ndióxi. Mé tiempo cán náha ndaja cáhnu cúu yehe. Anda já chahvi i nuú in in ñayivi sahá ñaha nacaja na nani nasanduu na ñuyívi yóho. ²⁸ Mé a ndaa ná cahan i xihín ndo ña java na ndúu yóho a quíví toho na janda quiahva ná xinu quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchí Jesús.

17

*Tá nandijama nuu Jesús quiahva cáa
(Mr. 9:2-13; Lc. 9:28-36)*

¹ Tá nayaha iñu quivi já nandaa Jesús in yucú jícó ta ndáca táhan Pedro xihín Jacobo xihín ñani da Juan cuahan na xihín á. ² Ta nu táhyí mé na cán nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachí ña ta chí a juú quiahva yéhe ña. ³ Ta ndaja coo nandaca náha Moisés xihín Elías ta nacasáhá ndítuhún da xihín Jesús. ⁴ Anda já nandicahan Pedro xihín Jesús já nacachi da já xihín á:

—Vaha cúu ndúu nde yóho, xitoho nde. Tá cuni ndó cavaha nde uni vehe tiyahvá válí. In a coo mé ndó ta inga coo Moisés ta inga coo Elías —cáchí Pedro.

⁵ Ta nani cahan Pedro nanuu in vico jata ná ta nacava nuu a na. Ta a juú quiahva ndató yéhe a. Ta tañu vico cán naxini johó na ña cahan in a ta já cachí a já:

—Da yóho cúú jahyi maní i ta cájii ini i xihín dá. Cuni johó ndó nu cáhan da —nacachi mé a cán.

⁶ Tá naxini johó na xíca tuun xihín Jesús cán ña cáhan yóho já nacaxítí na janda quiahva naxinu nuu ná nu ñúhú. Ta a juú quiahva ná yihví na. ⁷ Anda já nacayati Jesús nu ná ta nacani ndaa ndáha na já nacachi a já xihín ná:

—Cuándacoo ndó. A cáyihví toho ndó —nacachi Jesús xihín ná.

⁸ Ta tá nandiñehe na cán nuu ná já naxini na ña ín in túhún jini mé va Jesús.

⁹ Ta tá nanuu na jini yúcu cán já nasahnda Jesús chuun nu ná já nacachi a já xihín ná:

—A cáxi tuhun ndó ña naxini ndó yóho nuú ni in ñayivi janda quiahva ná nditacu tucu yehe, da nachindahá Ndióxi nduu ñayivi —nacachi Jesús.

¹⁰ Já nacachi na cán já xihín á:

—Ndávaha cáchi na jánaha ley Moisés ña ndítahan quixi jihna ñúhú profeta Elías —nacachi na.

¹¹ Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndihi da ñaha. ¹² Joo mé a ndaa ná cahan i xihín ndo ña sa naquixi va Elías joo coo naxeen na ndicuni na da. Ta nacaja na tá quiahva cuni mé ná xihín dá. Ta quiahva já jándoho ri na ini yehe, da nachindahá Ndióxi nduu ñayivi —nacachi Jesús.

¹³ Anda jáví nacandaa ini na xíca tuun xihín Jesús cán ña cáhan Jesús saha Juan, da najácandúta ñayivi tá nacachi a ña sa naquixi va Elías.

*Tá nandaja vaha Jesús in da loho ndácaan ínimá quini ini
(Mr. 9:14-29; Lc. 9:37-43)*

¹⁴ Ta tá sa nanuu na ta naxinu coo na nu ndúu cuahá ñayivi cán já naxinu coo in dataa ta já nacaxítí da nu Jesús. Já nacachi da já xihín á:

¹⁵—Candáhví loho ini ndó jahyi i, xitoho i jáchi xíhi yíhi da ta ndóho ndivaha ini da. Ta cuahá tañu ndícava da nu ñúhu ita á ini ticuí. ¹⁶Ta ñéhe e da ñacasaá i nuú na xíca tuun xihín ndó yóho joo coó ñacuu ndaja vaha na da — ñacachi da xihín Jesús.

¹⁷ Anda já ñacachi Jesús já:

—Ndáhví ñahá ñacuu ndó jáchi sa cuahá ndivaha quivi fin i xihín ndo ta a ñaha candeé ini ndó yehe. Cúú ndó ñayivi quini ndivaha chí co ndeé ga ini i xihín ña cája ndó. Taxi ndó taa loho jan chóho —ñacachi Jesús.

¹⁸ Anda já najánani Jesús rí quini ndácaan ini da loho cán. Chí ñaqueta rí cuahan ri ta mé hora já nandivaha da loho cán.

¹⁹ Tá nandihí já ñacahan jehé na xíca tuun xihín Jesús cán xihín á já ñacachi na já:

—Ndávaha coó ñacuu caja nde tavá nde ínima quini ñasandacaan ini da loho jan —ñacachi na xihín Jesús.

²⁰ Já ñacachi Jesús já xihín ná:

—Coó ñacuu caja ndó jáchi co candeé cáhnu ini ndó yehe. Mé a ndaa cáchi i xihín ndó, loho tíin ndivaha cáa in ndíqui mostaza joo ndúu dó in yito cáhnu. Tá candeé loho ini ndó yehe viti vaxi quivi candeé chága ini ndó yehe. Anda jáví cuu caja ndó in ñaha ihvi ndivaha tátuhun ña cuu cachi ndó xihín in yucu ña ná caxoo a ta chí caxoo ndusa ña. Tóco ndihí ñaha cuu caja ndó tá ná candeé ini ndó yehe. ²¹ Joo tá cúni ndó tavá ndó ínima quini tátuhun rí yóho xíní ñúhú cajuhun ndó ta caça tahví ndó nu Ndióxi —cáchi Jesús xihín ná.

Tá cáxi tūhun tucu Jesús ña quivi a

(Mr. 9:30-32; Lc. 9:43-45)

²² Ta ndaja coo xíca tútú ndihí na xíca tuun xihín Jesús cán cuahan na xihín á chí estado Galilea. Ta já nandicani Jesús nuú na cán ña tandaa quivi ndiquiahva ñayivi mé

á ndáha nā cahní ñahá, mé a nāchindahá Ndióxi nduu ñayivi. ²³ Ta nācachi a xihín ná ñā tá sá ná yaha unī quiivi já nditacu tucu a. Tá nācachi Jesús ñā yóho xihín nā xíca tuun xihín á cán já nācacuéha ndivaha ini na.

Tá nāchahvi Jesús jjuhún impuesto cuénta veñuhu cáhnu ñuu Jerusalén

²⁴ Tá nāxinu cōo Jesús ñuu Capernaum xihín nā xíca tuun xihín á já nāxinu cōo nā jātaca jjuhún impuesto cuénta veñuhu nū Pedro. Já nācachi na já xihín dá:

—Á cō cháhvi toho Jesús, da jánaha ndohó jan jjuhún impuesto cuénta veñuhu ñuu Jerusalén —nācachi na xihín Pedro.

²⁵ Anda já nācachi Pedro já:

—Cháhvi a ñā —nācachi da.

Anda já nāndihvi Pedro ini vehe nū ndácaan Jesús joo jihna ñúhú nāndicahan Jesús xihín dá já nācachi a já:

—Ndía cáhvi inún, Simón. Yo já ndítahan nū chahvi jjuhún cuénta impuesto nuú nā sáhdá chuun ñuyívi yóho. Á nā ñuu mé ná á nā ñuu tóho —nācachi Jesús.

²⁶ Já nācachi Pedro já:

—Nā tóho va sá cháhvi jjuhún cája na —nācachi Pedro.

Já nācachi tucu Jesús já:

—Sahá ñā cán quéa mé nā ñuu cō cháhvi toho na. ²⁷ Joo mí cō cúnī yō ñā ná ndicuita na xohō sahá ñā cán quéa cuhún tañuhú. Ta mé cán tavún tiyacá. Ta rí nū cuítí ná tavún jan candehún yúhu rí jáchī jan nditáhún in jjuhún caa. Ta cañehe a cūhūn chahvún saha mún ta saha mí i jáchī queta va —nācachi Jesús xihín Pedro.

18

Ndicani Jesús ndá nā cúú nā iin chága saha
(Mr. 9:33-37; Lc. 9:46-48)

¹ Mé tañu já ñacayati ña xíca tuun xihin Jesús nu á já ñacasáhá ndáca tuhún ñahá ña já ñacachi na já xihin á:

—Yo já cacuu ña cáhnu chága tá ná tandaa quivi cacomí Ndióxi cuéntá sahá ñayivi —ñacachi na xihin Jesús.

² Anda já ñacana Jesús in ña loho já ñasacandichi a ña maññú java ña cán. ³ Já ñacachi a já:

—Mé a ndaa ná cahan i xihin ndo ña ndítahan ndaja núu ndó mé ndó ta nduu ndó tátuhun ña valí já cuu cacomí Ndióxi cuéntá sahá ndo. ⁴ Ña cúní cacuu ña cáhnu chága tá cacomí Ndióxi cuéntá sahá ñayivi ndítahan nduu na tátuhun in ña coó sahá ta já nduu na tátuhun ña loho yóho. ⁵ Ta ndá ña ná ndiquehe in aloho tátuhun ña yóho sahá ña cúní ña yehe, ña cán cúu ña ndiquehe ri na yehe viti.

Tá jándacava ñayivi inga na nuú cuachi

(Mr. 9:42-48; Lc. 17:1-2)

⁶ Ta ndá ña ná jándacava in ña ndahví, ña cándéé ini yehe nuú cuachi janda vaha chága ná candico in yuú yojó jico ná ta ná ndihi sahá ña cahá tañuhú. ⁷ Ndahví nahá ñacuu ñayivi ñuyiví yóho jáchi mé a ndaa in cuahá ndivaha ña núu ñuyiví yóho. Ña cán quea ndácava cuahá ñayivi nuú cuachi joo ndahví nahá ñacuu ña jándacava inga na nuú cuachi.

⁸ Sahá ña cán quea tá ndaha ndo á sahá ndo jándacava ndohó nuú cuachi, chituhun ndó a ta jácana xíca ndó ña ná cuhun a. Jáchi vaha chága ná cuhun réncó ndó á lundu ndó indiví a juú ga ña ná cuhun ní yiquí cuñu ndó indayá nu cáyi ñuhú ita anda ama cáa quivi. ⁹ Ta tá nduchú núu ndo jándacava ndohó nuú cuachi, tavá ndó ña ta jácana xíca ndó ña ná cuhun a. Jáchi vaha chága ná cuhun ndó indiví xihín in tuhún nduchú núu ndo a juú ga ña ná cuhun ndó xihín ndíví nduchú núu ndo indayá nu cáyi ñuhú ita.

*Tá sácú Jesús quiáhva sahá in ndicachi, rí nãndiñúhú
(Lc. 15:3-7)*

¹⁰ Coto a quéhe núu ndó ni in na cúu cuéntá mí i jáchi cáchí i xihín ndó ña tátò Ndióxi, mé na ndáá na cán níi tiempo ndíta na nu Ndióxi, tátá i indiví. ¹¹ Jáchi yehe, da nachindahá Ndióxi nduu ñayivi naquixi i jácacu u ñayivi, na cája cuachi.

¹² Cuni johó ndó ná cahan i xihín ndo: Tá cómi in dataa in ciento ndicachi ta tá ndíñúhú in rí já quéa ña cája da quéa jándacoo da comi jico sahun comi rí cán yucu ta já quee da cuhun da ndinducú da mé rí nãndiñúhú cán. ¹³ Ta tá ndiñehe dá ri cajii chága ini da saha rí nãndiñúhú cán a juú ga sahá comi jico sahun comi rí sa ndúu nu dá cán. ¹⁴ Ta quiáhva já ndoho ri Ndióxi, tátá i jáchi co cúní mé á ña ná ndihi sahá ni in na cãndeé ini mé á.

*Ndítahan caja cáhnu ini sahá ñani táhan í
(Lc. 17:3)*

¹⁵ Tá cája quini ñani táhan ndó xihín ndo já quéa tavá xóo ndó da ta cahan ndó xihín dá ña ná ndicuni da ña a váha toho cája da. Ta tá ná tahvi ini da sahá cuachi cája da já quéa sa nãndiquehe táhan maní tucu ndó xihín dá. ¹⁶ Joo tá co cúní da cuni johó da nu cahan ndo já quéa ndítahan nu ndó cana ndó in á ivi chága ñani táhan ndó já ná cacuu na testigo sahá ña cahan ndo. ¹⁷ Ta tá co cúní da cuni johó da nu cahan na cán xihín dá já quéa ndítahan cuhun ndó nu tóco ndihi na cúu cuéntá Jesús táca veñuhu. Ta tá co cúní da cuni johó da nu cahan ndihi na cán xihín dá já quéa ndítahan caja ndó xihín dá tá quiáhva cája ndó xihín in da tóho, da co cãndúsa Ndióxi á in da játaca jjuhún cuéntá impuesto.

¹⁸ Mé a ndaa ná cahan i xihín ndo ña tóco ndihi ñaha ná cató ndo ñuyiví yóho candico a janda indiví. Ta tóco ndihi ña ná ndaxí ndo ñuyiví yóho janda indiví ndaxi ña.

¹⁹ Ta jári cáhan i ña yóho xihin ndó. Tá jándique táhan tuhun ivi ndó ñuyívi yóho ta tá mé a ndaa in cúu ndó sahá ña xíca tahví ndó nu Ndióxi, mé á ñin indivi já queá quiqhva tátá i ña nu ndó. ²⁰ Jáchi nu ndúu ivi á uní na ta táca na cuéntá mí i já queá tañu na cán ndacaan i — nācachi Jesús.

Tá sácú Jesús quiqhva sahá in da co cúní caja cáhnu ini da sahá inga da

²¹ Ta ndaja coo nācayati Pedro ndáca tuhún da Jesús já nācachi da já:

—Xitoho i, ndaja tañu xíní ñúhú caja cáhnu ini i sahá ñani táhan i tá cája núu da xihín i. Á ndítahan nuú i caja cáhnu ini i saha dá janda usa tañu —nācachi da xihín Jesús.

²² Já nācachi Jesús já xihín dá:

—A juú janda usa tañu cuití ndítahan caja cáhnu inún sahá ñani táhún. Vaha janda comi ciento comi jico uxu tañu ndítahan nuun caja cáhnu inún sahá ñani táhún.

²³ Cáchi i ña yóho xihín ndó jáchi tá cómí Ndióxi cuéntá sahá ñayivi cúu á tátuhun ña nayaha xihín in rey tá nācasáha da jātaca da cuéntá nuú na yíca nu dá. ²⁴ Mé tañu já ñéhe na in da yíca cuahá millón nu dá nācasaa na. ²⁵ Ta sahá ña coó nācuu chahvi da ña yíca da sahá ña cán queá nāsahnda rey chuun ña ná jicó na mé dá xihín ñájíhí da xihín jahyi válí da ta janda ñaha da viti ña ná cuu ndiquehe rey cán cuéntá da. ²⁶ Anda já nācaxítí da yíca cán nu mé rey já nācasáha xíca tahví da já cáchi da já: “Caja ndó ñamaní, xitoho i candati tóo chága ndó yehe, ndáhví i, já chahvi ndihi i ña yíca i nu ndó”, nācachi da xíca tahví da nu rey cán. ²⁷ Anda já nācandáhví ini rey cán da ta nācaja cáhnu ini a saha tóco ndihi ña yíca da já najaní a da cuahan da.

²⁸ Ta tá naqueta da yíca cán cuahan da já nandique táhan da xihín inga da cúu mozo. Ta mé mozo cán yíca da loho va nuú da cán. Ta já nacasáhá da ndáca yihí da cuéntá nuú da cúu mozo jácuahnú ñahá da. Já cáchí da já: “Chahvún ña yícun nuú i”, cáchí da cán. ²⁹ Anda já nandacava xítí mé da cúu mozo cán nu dá já nacasáhá xíca tahví da nu dá já cáchí da já xihín dá: “Cajún ñamani candati too chágun yehe, ndáhvi i, já chahvi ndihi i ña yíca i nuun”, nacachi da cúu mozo cán. ³⁰ Joo coo naxeen da ta ña nacaja da quea nasahan da nachicaan da da cúu mozo cán veca janda quiahva ná cuu chahvi ndihi da ña yíca da nu dá. ³¹ Ta tá naxini java ga na cúu mozo cán ña yóho já nandihihvi ndivaha ini na ta chí ndáva na nasahan na nacaxi tuhun na nu mé rey cán ndaja caa ña nacuu. ³² Anda já xójo ndivaha ini mé rey cán chí nacana da da nasayicá cán já nacachi da já xihín dá: “Mozo quini ndivaha cúu yóhó. Cuahá ndivaha jihún nasayicún nuú i joo nacaja cáhnu ini i saha tóco ndihi a jáchi naxica tahvún nuú i. ³³ Quiahva já ndítahan ri nu yóhó va caja cáhnu inún sahá ña yíca ñani táhún nuun jáchi já nacaja i xuhun”, nacachi rey cán. ³⁴ Ta sahá ña xójo ndivaha ini mé rey cán xihín dá sahá ña cán quea nandiquiahva da da yíca cán ndáha na jácaxáhan ñahá cán janda quiahva ná chahvi da saha tóco ndihi ña yíca da —cáchí Jesús.

³⁵ Já nacachi tucu Jesús já:

—Quiahva já caja ri Ndióxi, tátá i, mé a ñin indivi xihín ndóhó va tá co caja cáhnu ini ndó sahá ñani táhan ndó xihín ndinuhu ini ndó —cáchí Jesús.

19

Jánaḡa Jesús nuú na sa natandḡa ña co ndítahan jándacoo táhan na

(Mr. 10:1-12; Lc. 16:18)

¹ Tá nandihí nācachi Jesús ña yóho já naquee a estado Galilea já naxinu coo a estado Judea, ña ín inga xoo yuta Jordán cán. ² Ta a juú quiahva cuahá ñayivi nandico jatá ta nandaja vaha mé á na quíhvi.

³ Joo ndaja coo java na fariseo nācayati na nu Jesús sahá ña coto ndojó ñahá na cúnī na. Já nācachi na já xihín á:

—Á núná nuú in datāa jándacoo da ñájíhí da saha ndá ña nācuu —nācachi na fariseo cán.

⁴ Anda já nācachi Jesús já:

—Á a ñaha cahvi ndó tūhun Ndióxi nu cáhí a ña janda mé saha tá nācavaha Ndióxi ñayivi nu cuítí já nācavaha datāa ta nācavaha ñañáha. ⁵ Ta nācachi tucu a ña ndítahan nuú datāa jándacoo da tátá da xihín náná da já ndique táhan da xihín ñájíhí da. Já xinu ndívī na cán cacuu na tátūhun in víxí yiquí cuñu na. ⁶ Sahá ña cán queá co cúu ga na ivi yiquí cuñu sahá ña nanduu na tátūhun in túhún yiquí cuñu na. Sahá ña cán queá co ndítahan nuú da cán janí táhan da ña najácatáhan Ndióxi tá natandaha ná —nācachi Jesús.

⁷ Anda já nandaca tūhún tucu na cán Jesús já nācachi na já:

—Joo já cachi ndó xihín nde: ndá cuéntá queá nasahnda ri Moisés chuun ña cuu cavaha in datāa in tutu quiahva da nu ñájíhí da ta xihín ña cán cuu jándacoo da ña —nācachi na cán xihín Jesús.

⁸ Já nācachi Jesús já:

—Sahá ña táhyí ndivaha ínima ndo sahá ña cán queá sáhan Moisés ñamanī nu ndó ña cuu cavaha ndó tutu quiahva ndó nu ñájíhí ndo ña ná jándacoo ndó ña. Joo tá nācavaha Ndióxi ñayivi nu cuítí coo nācacúnī toho a coo ña yóho. ⁹ Cuni johó ndó ná cahan ī xihín ndo. Tá ná jándacoo in datāa ñájíhí da ta co cúu á saha ña nācaja ña cuachi xihín inga taa ta tá tandaha dá xihín inga ñá já

qu_eá cája da cu_achi nu Ndióxi. Ta quiahva já íin ri cu_achi da ná tandaha xihín ñá ñacandoo cán —cáchi Jesús.

¹⁰ Tá naxini johu na xíca tuun xihín Jesús cán ña yóho já ñacachi na já:

—Tá ta quiahva já cáa janda vaha chága ná a tándahá ñayivi, dá já —ñacachi na cán.

¹¹ Já ñacachi Jesús já:

—A juú ndihi ñayivi canda_a ini ña cáhan i yóho. Ndinuhu na ndínuna xíní túni cája Ndióxi, na cán cúu na cánda_a ini ña yóho. ¹² Ndúu java da_taa ta a cuú tandaha da jáchi já ñacacu da ta já taa cúu mé va da. Ta java da a cuú tandaha da jáchi já ñacaja ñayivi xihín ná ta já taa cúu mé va na. Ta java da a tándaha da jáchi cúni da ndiquiahva níi da mé dá nu Ndióxi ña ná cacomí a cuéntá saha dá. Ta ndá ndó, na ndínuna xíní túni, canda_a ini ndó ña yóho —ñacachi Jesús.

Cája yii Jesús na valí

(Mr. 10:13-16; Lc. 18:15-17)

¹³ Tá nandihí já ñéhe na java na valí ñacasaa na nu Jesús ña ná chinúu a ndahá a jiní ná ta já caca tahví a nu Ndióxi saha ná. Joo ndaja coo na xíca tuun xihín á cán ñacasáhá na cája cuehe na xihín na ndáca na valí cán. ¹⁴ Já ñacachi Jesús xihín na xíca tuun xihín á cán já:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá saha ñayivi tá ná caha na tá quiahva cája na valí yóho —ñacachi Jesús.

¹⁵ Tá nandihí já ñachinúu Jesús ndáha á jiní na valí cán. Anda já ñaquee a cuahan.

Ndítuhún in da cuicá xihín Jesús

(Mr. 10:17-31; Lc. 18:18-30)

¹⁶ Ta ndaja coo naxinu in da_taa nu íin Jesús ta ñandaca tuhún ñahá da já ñacachi da já:

—Maestro, mé ndó cúú ndó t̄a v̄aħa ñ̄a cán qūeá ndáca tuhún i ndohó ndiá ndítahan caja i já ná ñeħe táhv̄i i cuħun i indiví coo i anda ama cáa quiv̄i —naçachi da xih̄in Jesús.

¹⁷ Já naçachi Jesús já xih̄in dá:

—Ndá cuéntá qūeá cáchún xih̄in i ñ̄a cúú u da v̄aħa. Ni in tuhún toho ñayivi co cúú ná na v̄aħa ñuyiví yóho. In tuhún Ndióx̄i cuití va qūeá v̄aħa. Tá cúnun catacún nu ín mé á já qūeá xíní ñúhú cajún ñ̄a sáħndá tuhun Ndióx̄i —naçachi Jesús xih̄in dá.

¹⁸ Já naçachi da cán já:

—Ndá cúú mé ñ̄a ndítahan caja i —naçachi da.

Já naçachi Jesús já xih̄in dá:

—Coto a cáhnún nd̄i. Coto a cóun xih̄in ñájíhí á yí ñani táhún. Coto a cáa cuihnún. Coto a cáhun ñ̄a tuhún sahá ñayivi. ¹⁹ Ndítahan caja cáhnún tátún xih̄in nánún. Ta ndítahan quih̄vi inún ñani táhún tá quiahva quih̄vi inún mún —naçachi Jesús.

²⁰ Já naçachi da yúta cán já xih̄in á:

—Janda t̄a loho naçacuu u naçasáhá i cáa i tóco ndiħi ñ̄a sáħndá Ndióx̄i caja i. Ndiá cúú ga ndítahan caja i —naçachi da.

²¹ Já naçachi Jesús já xih̄in dá:

—Tá t̄a cúnun cacuún in t̄a ndacú nu Ndióx̄i cuáhán jicún tóco ndiħi ñahún jan ta ndacahndún jiuhún jan nuú na ndahví já ñeħe táhvun coo cuahá ñahún indiví. Ta tá nandih̄i já quisún candicún yeħe —naçachi Jesús.

²² Tá naħini joh̄o da yúta cán ñ̄a yóho já naquee cuéħa ndivaha da cuah̄an da jách̄i da cuiçá ndivaha cúú dá.

²³ Anda já naçachi Jesús xih̄in na xíca tuun xih̄in á cán já:

—Mé a ndaa ná cachi i xih̄in ndó ñ̄a ndaja yáncá ndivaha cáa já ndiquahva na cuiçá mé ná ndáħa Ndióx̄i ñ̄a ná

cacomí a cuéntá saha ná. ²⁴ Jáchí jandá cama chága cuu yaha in camello ini in yávi sahá yítucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá —ñacachi a.

²⁵ Tá naxini johó na xíca tuun xihín Jesús cán ña yóho já ñacatóntó ndivaha na ta nandaca tuhún táhan na já cáchí na já:

—Ndá na cúu na cuu cacu ndaa ínima, dá já —cáchí na.

²⁶ Nandicoto nihni Jesús nu ná já ñacachi a já xihín ná:

—Ni in na a cúu caja ña yóho joo Ndióxi quéa cuu caja ña jáchí ni in ñaha co íhvi toho nu Ndióxi —ñacachi Jesús.

²⁷ Anda já ñacachi Pedro já:

—Joo ndehe, najándacoo ndihi nde ñaha ñasacomí nde ta ndíco nde ndóhó. Ndía ñehe táhvi nde caja ndó —ñacachi Pedro xihín Jesús.

²⁸ Anda já ñacachi Jesús já xihín dá:

—Mé a ndaa ná cachi i xihín ndo. Tá ná tandaa quivi nduu saá tóco ndihi ñaha já cacoo yehe, da ñachindahá Ndióxi nduu ñayivi nuú ndicáhnu ndivaha i. Ta cán cacoo ri ndóhó, na naxíca tuun xihín i nuú uxu ivi táyi vaha. Ta cán caja vií ndó sahá ndíhuxu ivi táhndá na ñaquixi chíchi Israel. ²⁹ Ta ndá na najándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi na sahá yehe, na cán cúu na ñehe ná cuaha chága ví ñaha. Ta jatá ña cán ñehe táhvi ná catacu na nu Ndióxi anda ama cáa quivi. ³⁰ Ta ndúu cuahá na ín saha ñuyívi yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyívi yóho viti joo vaxi quivi cacuu na na ín saha nu Ndióxi —ñacachi Jesús.

20

Sácú Jesús quiahva sahá java da sáhdá uva

¹ Já ñacachi Jesús já sácú a quiahva:

—Nuú cacomí Ndióxi cuéntá sahá ñayivi cúú á tátuhun ña yóho: Íin in dataa naha chá ñaquee da cuahan da nducú da mozo caja chúun da cahnda da uva nu ñúhu dá. ² Ta ñacandoo da चाहvi da in jihún caa naní denario in quivi. Ta já ñachindahá da mé mozo cán cuahan da caja chúun da nu ñúhu dá. ³ Tá ñandihi já ñaquee tucu da xihín ñaha ñúhu cán tátuhun caa in naha já ñanditahan da java da ndúu núná uun nuú yahvi. ⁴ Já ñacachi mé da xihín ñaha ñúhu cán já: “Cuáhán ri ndóhó va cahnda ndó uva nu ñúhu i ta já चाहvi i ndohó tá quiahva ndítahan nu ndó quehe ndó”, ñacachi da. Já ñaquee mozo cán cuahan da jáquee da nu ñúhu dá. ⁵ Ta tá ñacuu caxivi já ñaqueta tucu da xihín ñaha ñúhu cán cuahan da ta ñatiin da java ga da caja chúun xihín dá. Ta tá ñacuu caa uní ñatiin chága da da jáquee nu ñúhu dá. ⁶ Ta tá ñacuu tátuhun caa uhun sahini ñaqueta tucu da ta nuú yahvi cán ñaxini chága da da ndúu núná uun. Já ñacachi da já xihín da ndúu cán: “Ndá cuéntá queá sa ñacuu ndiví yaa ndúu ndó yóho”, ñacachi da xihín da ndúu cán. ⁷ Ta ñanducú ñehe da cán tuhun já cáchí da já: “Co cája chúun nde jáchí coo ña quíxi ndúcú nde caja chúun nde”, ñacachi da cán. Anda já ñacachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já चाहvi i ndohó tá quiahva ndítahan nu ndó quehe ndó”, ñacachi da.

⁸ Ta tá sa ñacuaá já ñacachi da xihín ñaha ñúhu cán xihín da cómi chuun nu mozo cán ña ná cana da da cúú mozo cán já ná quehe yahvi da sahá chuun ñacaja da. Ta da ñaquihvi ñacaja chúun nu ndíhí cán, da cán cúú da jihna ñúhú ná quehe yahvi. Tá ñandihi cán ná quehe yahvi da ñaquihvi nu cuítí. ⁹ Anda já ñacasaá da ñaquihvi caja chúun caa uhun sahini já ñaquehe in in da cán in denario. ¹⁰ Ta ndaja coo tá ñacani a nuú da ñaquihvi caja chúun janda naha cán quehe yahvi da já queá ñacahán da

ñā cuahā chāga jjuhún ndiquehe da nuú da naquihvi caa uhun sahini cán. Joo quiahva já in denario naquehe ri in in da cán. ¹¹ Sahá ñā cán queá nacasáhá da cáhan cuachí da xihín da xihín ñaha ñúhu cán. ¹² Já nacachi da já: “Da nandai cuu caja chúun nu ndíhí cuí yóho in hora cuití nacaja chúun da. Ta tá quiahva nachahvi ndó ndehe, da nacaja chúun ndiví yaa nu ndítahyí quiahva já nachahvi ri ndó nuú da cáa va”, nacachi da cáhan cuachí da cán. ¹³ Anda já nacachi da xihín ñaha ñúhu cán xihín in táhan mozo cán já: “Candehé, amigo. Co caja quini toho i xuhun. Á a juú in denario nacandoo i chahvi i nuun. ¹⁴ Júhun ñā ndítahan quehún ta cuanúhun. Jáchi cúní chahvi i nuú da nacaja chúun in hora cuití va tá quiahva nacandoo i chahvi i nu yóhó. ¹⁵ Jáchi núná nuú i caja i ñā cúní mí i xihín jjuhún i. Ta co ndítahan cahihvi inún sahá ñā vaha ini i”, nacachi da xihín ñaha ñúhu cán xihín da cáhan cuachí cán —nacachi Jesús sácú a quiahva.

¹⁶ Ta nacachi tucu a já:

—Sahá ñā cán queá ndúu cuahá na íin saha ñuyiví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyiví yóho viti joo vaxi quivi cacuu na na íin saha nu Ndióxi —nacachi a.

Cáxi tuhun tucu Jesús ñā quivi a

(Mr. 10:32-34; Lc. 18:31-34)

¹⁷ Ta tá sa naquee tucu Jesús cuahan chí Jerusalén já íchi cán natavá xóo a ndíhuxu ivi na xíca tuun xihín á cán já nacachi a já xihín ná:

¹⁸ —Candehé ndo. Yóho ndáa í cuahan yó chí Jerusalén nuú ndiquiahva na yehe, da nachindahá Ndióxi nduu ñayivi ndahá na sacuahā nuú jutū xihín nuú na jánaha ley Moisés. Ta na cán cúu na cacu ini sahá ndaja quivi i. ¹⁹ Anda já ndiquiahva na yehe ndahá na tóho ñā ná cuacu ndaa na yehe. Ta cani na yehe ta já cata caa na yehe ndica

crúxu joo tá ná yaha uni quivi já nditacu tucu u —nacachi Jesús.

*Tá naxica náná Jacobo xihin Juan ñamaní nuú Jesús
(Mr. 10:35-45)*

²⁰ Anda já nacayati ñájíhí Zebedeo, ñá cúu náná Jacobo xihin Juan nuú Jesús. Ta ndáca ñá ndíví jahyi ñá nacasaa ñá nacaxítí ña nu á jáchi cúni ñá caça ñá in ñamaní nuú Jesús. ²¹ Anda já nacachi Jesús já xihin ña:

—Ndá queá cúni ndó —nacachi a.

Já nacachi ñá cán já:

—Ñá cúni queá ná caja ndó ñamaní cahnda ndó chuun ña ná cacoo in in jahyi i xoo jíin ndó. In da xoo cuáha ta in da xoo íti jíin ndó indiví tá ná cacomí ndó cuéntá sahá ñayivi —nacachi ñá cán.

²² Anda já nacachi Jesús já xihin ña:

—Co cándaá ini ndó ña xíca ndó nuú i —nacachi a.

Anda já nacachi a já xihin Jacobo xihin Juan cán:

—Á cuu ndoho ini ndó tá quiahva nditahan nuú i ndoho ini i. Jáchi ña vaxi nuú i ndoho ini i cúu á tátuhun coho i in yáxi ndutá ova. Á íin tiahva ndó ndoho ini ndó tá quiahva ndítahan nuú i ndoho ini i anda quiahva ná quivi i —nacachi Jesús xihin ndíví da cán.

—Cuu caja nde ña —nacachi ndíví da cán xihin Jesús.

²³ Anda já nacachi tucu a já xihin dá:

—Mé a ndaa tandaa quivi coho ndó ña ova ñúhu in yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xíca ndó cacoo in ndó xoo cuáha i ta in ndó xoo íti i a juú yehé cúu dá cuu quiahva i ña nu ndo. Jáchi sa nandicaxi Ndióxi na ñehé táhvi cacoo cán —nacachi a.

²⁴ Joo ndaja coo tá naxini joho ndihuxu chága na xíca tuun xihin Jesús cán ña yóho já nacasáhá na xójo ini na

xihin ndíví dā cúú ñani cán. ²⁵ Anda já nacana Jesús tóco ndihi na xíca tuun xihín a cán já nacachi a já xihín ná:

—Sa xini ndó ndaja cája na sáhdá chuun nuú ñayivi ndúu ñuyíví yóho. Na cája na queá jácandíhi na ñayivi ta cája na tá quiahva cúni mé ná. ²⁶ Joo co ndítahan coo ña cán tañu mé ndó jáchi ndá dā cúni cacuu dā cáhnu chága tañu ndó xini ñúhú cacuu da in dā cája chúun cuéntá ndihi ndó. ²⁷ Ta ndá dā cúni cacuu dā nu cuítí tañu ndóhó ndítahan cacuu da dā cája ndíví nuú ndihi ndó. ²⁸ Jáchi ni yehe, dā nachindahá Ndióxi nduu ñayivi coo naquixi i ñuyíví yóho ña ná caja ndíví ñayivi nuú i. Ña naquixi i caja i queá caja ndíví i nu ná ta ndiquiahva i mí i quivi i já ná cuu cacu ndaa ínimā cuahá ñayivi ná a cúhun na indayá —nacachi a.

Tá nandaja vaha Jesús ivi dā cuaá

(Mr. 10:46-52; Lc. 18:35-43)

²⁹ Ta tá naqueta Jesús ñuu Jericó xihín na xíca tuun xihín á cán já ndíco cuahá ndivaha ñayivi jatá cásahan na. ³⁰ Ta ndaja coo yati jíin íchi cán nasanduu coo ivi dā cuaá ta tá naxini johó da ña yáha Jesús cuahan já nacasáhá ndíví dā cáyuhú dā já cáchí dā já:

—Jesús, dā naquixi chichi David, caja ndó ñamani candáhví loho ini ndó ndehe —cáchí dā.

³¹ Anda já nacasáhá cája cuehe ñayivi xihín ndíví dā cuaá cán ña ná catáji yúhu dá. Joo ví ga ví cáyuhú dā já cáchí dā já:

—Jesús, dā naquixi chichi David, caja ndó ñamani candáhví loho ini ndó ndehe —nacachi da.

³² Anda já nandaca ndichi Jesús já nacana ndíví dā cuaá cán. Ta já nandaca tuhún a dā já nacachi a já xihín dá:

—Ndía cúni ndó ña ná caja i xihín ndo —nacachi a.

³³ Já nacachi ndíví dā cuaá cán já:

—Candehé nde cúni nde, xitoho.

³⁴ Andá já ñacandáhvi ini Jesús da ta ñacani ndaa ndáha á nuu dá. Chí ivi laá ñanuna nuú da cuaá cán ta ñacasáhá da ndíco da jatá Jesús cuahan da.

21

Ndíhvi Jesús ñuu Jerusalén

(Mr. 11:1-11; Lc. 19:28-40; Jn. 12:12-19)

¹ Ta tá sa ja chá xinu cõo na ñuu Jerusalén já ñaxinu na in ñuu loho naní Betfagé yati jín yúcu naní olivo. Ta cán ñasahnda Jesús chuun nuú ivi táhan da xíca tuun xihin á cán. ² Já ñacachi a já xihin dá:

—Cuáhán ndó ñuu loho jan ta tá ná xinu cõo ndó jan ndiñehẽ ndõ in búrrõ jíhí ndíco ndaa rí ta xihin mé rí jan cándichi inga búrrõ loho. Ndaxí ndó ri ta cañehẽ ndó ndívi ri quixi ndó. ³ Ta ndá ña ná cahan xihin ndõ já quẽa cachi ndó xihin ná ña xíní ñúhú xitoho ndó ri joo tá ná ndihi chuun rí já nducú ñehẽ tucu da ri, já cachi ndó xihin ná —ñacachi Jesús xihin ndívi da cán.

⁴ Tóco ndihi ña yóho ñayaha já ná xinu cõo nuú ña ñacahyí in da profeta já:

⁵ Joho cachi ndó xihin na ñuu Jerusalén:

“Candehé ndõ. Ndáhvi uun cáa da cómí cuéntá saha ndó. Vaxi da nu ndõ ta canúu da jatã búrrõ jíhí, jahyi in rí ndiójo, canúu da vaxi da nu ndõ”, cáchí tuhun Ndióxi.

⁶ Ta ndívi da xíca tuun xihin Jesús cán ñasahan da ñacaja da tá íin ñasahnda Jesús chuun nu dá. ⁷ Já ñehẽ da búrrõ jíhí cán xihin búrrõ loho, jahyi rí ñaxinu na nuú Jesús. Andá já ñachojó ña cotó ndéé ña jatã ri ta ñandaa Jesús jatã ri. ⁸ Ta mé cuahá ñayivi ndúu cán ñacasáhá ña chínduu na cotó ndéé ña íchi mé nuú yaha Jesús cán. Ta java na ñacasáhá ña sáhnda ña ndahá yító ta chínduu na dõ íchi mé nuú yaha Jesús cuhun a. ⁹ Ta ñayivi cuahan chí

nūu ta jári na vaxi chí jata nacasáhá na cáyuhú na já cáhí na já:

—Cája cáhnu í da naquixi chíchi David yóho. Ndicáhnu nahá ná cacuu da cómi cuéntá saha yo jáchí cúu dá da vaxi yuhú nūu Ndióxi. Cáhnu ná cacuu Ndióxi —cáhí ñayivi cuaha cán cáyuhú na casahan na xihin á.

¹⁰ Ta tá nandihvi Jesús ñuu Jerusalén cán tóco ndihi ñayivi nacasáhá catóntó ndivaha na. Já cáhí xihin táhan na já:

—Ndá da cúu da yóho —cáhí xihin táhan na.

¹¹ Java táhan na cán cáhí na:

—Da yóho cúu in profeta, da ñuu Nazaret cuéntá estado Galilea —cáhí xihin táhan na.

*Tá nataxí Jesús na ndúu jícó ñaha yéhe veñuhu
(Mr. 11:15-19; Lc. 19:45-48; Jn. 2:13-22)*

¹² Anda já nandihvi Jesús veñuhu cáhnu cán já nacasáhá táxi ndihi a na ndúu jícó xihin na ndúu xéen cán. Ta naxicó ñehe a mesa na ndúu ndíjama jiuhún cán ta naxicó ñehe a táyi sácoo na ndúu jícó ndijata. ¹³ Já nacasáhá cáhí a já xihin ndihi na cán já:

—Já cáhí tuhun Ndióxi já: “Vehe mí i cacuu a vehe nuú quixi na caça tahví na nu Ndióxi”, cáhí tuhun Ndióxi. Joo ndóhó nandai cuu ndó yóho caja cuíhna ndo nuú ñayivi —nacachi Jesús xihin ná.

¹⁴ Tá nandihvi já nacayati java na cuáá xihin java na réncō nu á ini mé veñuhu cáhnu cán ta nandaja vaha mé á na. ¹⁵ Joo xójo ndivaha ini na sacuaha nuú jutū xihin na jánaḥa ley Moisés tá naxini na ña xituhún nacaja mé á ta tá naxini johō na ña cāja cáhnu na valí cán mé á tá cáhí na já: “Cája cáhnu í da naquixi chíchi David.” Saha ña cán queá xójo ini na ¹⁶ ta já nacachi na já xihin Jesús:

—Á xini johún ña cahan na valí yóho —nacachi na xihin Jesús.

Já nacachi Jesús ja:

—Ajan, xíni joho i ña caja cahnu na Ndióxi. Á coo nacachi ndó tuhun Ndióxi nu cachí a ja:

Janda na valí ta janda na chíchí nacaja Ndióxi xihín na,
ña na cuu caja cahnu na mé á, cachí tuhun Ndióxi —
nacachi Jesús xihín na can.

¹⁷ Anda ja najándacoo a na ja naqueta jatá ñuu can
cuahan chí ñuu Betania ta can nasahijn a.

*Tá nachicaan Jesús cháhan jata titó ñuhú
(Mr. 11:12-14, 20-26)*

¹⁸ Ta inga quiví itaan tá nandicó coo a cuahan chí
Jerusalén ja nacasáhá cuico a cuahan. ¹⁹ Ta yuhú íchi can
naxini a candichi in titó ñuhú. Ta chí nasahan sándehé a
á ín cuihi nu do caxí a. Joo coo ñaha na ndiñehé a. Ndáha
uun do can cuití va ín. Anda ja nacachi a ja xihín do:

—Ni in túhún ga tañu a cana cuihi nu yóho —nacachi a
xihín do.

Chí ivi laá nahichi titó ñuhú can. ²⁰ Tá naxini na xica
tuun xihín Jesús can ña yóho ja nacatóntó na ja cachí na
ja:

—Ndá cuénta quéa nahichi titó ñuhú can ivi tuhun —
nacachi na xihín Jesús.

²¹ Ta nanducú ñehe Jesús tuhun nu na ja nacachi a ja:

—Mé a ndaa na cahan i xihín ndo ña tá na candéé ini
ndó yehé ta ni loho co cahvi ivi joho ini ndó ja quéa cuu
caja ndó ña nahnu chága nuú ña nacaja i yóho. Ta janda
cuu cachi ndó xihín in yúcu: “Caxoo ta cuáhán jaquetún
mún ini tañuhú”, ta chí ja ndusa coo. ²² Ta tá na candéé
ini ndó yehé nani xica tahvi ndo nu Ndióxi ta co cahvi ivi
joho ini ndó ja quéa ñehe ndó ña xica ndo nu á —nacachi
Jesús.

Tá ndáca tuhún na Jesús yo sáhan ndée nu á ña jánaha mé á nuú ñayivi

(Mr. 11:27-33; Lc. 20:1-8)

²³ Tá nandihí já nandihvi Jesús ini veñuhu cáhnu cán ta nani jánaha tuhun Ndióxi nuú na ndúu cán naxinu na sacuahá nuú jutú xihín na sacuahá nuú na Israel cán nu á. Já nacachi na já xihín á:

—Yo já sáhan ñamani nuun cajún ña cajún yóho — nacachi na.

²⁴ Anda já nanducú ñehe Jesús tuhun nu ná já nacachi a já:

—Ta ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndó yo já nasahan ñamani nuú i caja i ña cája i yóho. ²⁵ Ta viti cachi ndó xihín i yo já nachindahá Juan ña ná quixi da caja ndúta dá ñayivi. Á Ndióxi nachindahá da á ñayivi nachindahá ñahá —nacachi Jesús ndáca tuhun a na.

Já nacasáhá ndítuhún xihín táhan na já cáchí na já:

—Tá ná cachí ña Ndióxi queá nachindahá Juan ta já nducú ñehe Jesús tuhun nu yo já cachi da xoho: “Ndá cuéntá queá coó naxeen ndó candúsa ndó da, dá já”, cachi Jesús xoho. ²⁶ Ta tá ná cachí ña ñayivi cúu na nachindahá Juan já yihví yo ña ndicuíta ñayivi xihín yo. Jáchi tóco ndihí na cándúsa na ña naquixi Juan jáyaha da ña nacahan Ndióxi nuú ñayivi —cáchí na ndítuhún xihín táhan na.

²⁷ Sahá ña cán queá nacachi na já xihín Jesús:

—Co xini toho nde yo já nachindahá Juan.

Anda já nacachi Jesús já xihín ná:

—Ta ni yehe a cáxi tuhun i nu ndo yo já nasahan ñamani nuú i caja i ña yóho —nacachi Jesús xihín na cán.

Sácu Jesús quiahva sahá ivi da cúu jahyi in datqa

²⁸ Anda já nacachi tucu Jesús xihín na cán já:

—Cuni joho ndó ña nayaha in tañu. Íin in dātaa ta nasahjin ivi jahyi ɬaa da. Ta nasahan da nuú in táhan da cán já nacachi da já xihín dá: “Jahyi a, cuáhán caja chúun lohún nu ñuhú i nu cáa tó uva”, nacachi da xihín jahyi da. ²⁹ Já nacachi jahyi da já xihín dá: “A cūhun toho i jáchi co xíca ini i cūhun i”, nacachi da. Joo tá nandihí nacahvi ini da ña a váha ná cuu ini da chí já naquee da cuahan da caja chūun da nu ñūhu tátá da. ³⁰ Ta jári nasahan tátá da cahan da xihín inga jahyi da ta quiahva já nasahnda ri da chuun nuú da cán. Ta da cán nacachi da já xihín tátá da: “Ajan. Cūhun i”, cáchi da. Joo tá nandihí coo nasahan toho da. ³¹ Ta viti cachi ndó xihín i ndá da cúu da nacaja ña cūni tátá da —nacachi Jesús.

Já nacachi na cán:

—Da nu cuítí.

Anda já nacachi tucu Jesús já:

—Mé a ndaa ná cahan i xihín ndo ña íin chága sahá na játaca jihún cuénta impuesto xihín najihí xíca jii ña ná cacomí Ndióxi cuénta saha ná a juú ga ndohó. ³² Jáchi naquixi Juan, da jácandúta ñayivi najánaha da ndohó ndaja ndítahan caja ndó ta coo naxeen ndó candúsa ndó da. Joo na játaca jihún cuénta impuesto xihín najihí xíca jii nacandúsa na ña nahahan da. Ta vatí naxini ndó ña yóho joo coo naxeen ndó ndijama ndó ña cája ndó jáchi coo naxeen ndó candúsa ndó mé Juan.

Sácú Jesús quiahva sahá java mozo, da nacaja quini xihín xitoho da

(Mr. 12:1-12; Lc. 20:9-19)

³³ Cuni joho ndó ná cacu u inga quiahva nu ndo. Nasahjin in dātaa ta najandee cuaha dá tó uva nu ñūhu dá. Ta nasacu da in corra yító nu do. Ta nacavaha da in nuú cūhni mé uva cán ña cavaha vino. Ta nacavaha da in nu jícó canúu da já cuu candaa da tóco ndihi dó cán.

'Anda já nasahan ndojó da ñúhu dá nuú java na caja chúun na ña. Ta já ñaquee da cuahan xícá da. ³⁴ Ta tá naxinu tiempo jáquee na já nachindahá da java mozo da ña ná cuhun na nuú na ndúu cája chúun ñúhu da cán ña ná ndiquiahva na nu dá ña cáni nu dá ndiquehe da saha ñúhu dá ña nasahan ndojó da nuú na cán. ³⁵ Joo ndaja coo na cája chúun nu ñúhu cán ñatiin na in táhan da cúu mozo da cán ta ñacani na da. Ta inga táhan da cán nasahní na. Ta inga táhan da cán nandicuita ñee na xihín yuu. ³⁶ Joo mé da xihín ñaha ñúhu cán nachindahá cuaha chága da mozo da nasahan da nu ñúhu dá. Ta tá quiahva ñacaja na xihín mé java mozo nasahan nu cuítí cán quiahva já ñacaja ri na xihín tóco ndihi mozo cán.

³⁷ Tá nandihí já nasacu ini da xihín ñaha ñúhu cán chindahá da jahyi da jáchi ñacahán da: “Cája i cuénta coo toni ñúhu na xihín jahyi i”, ñacahán da xihín ñaha ñúhu cán. ³⁸ Joo tá naxini na cája chúun ndojó ñúhu cán ña vaxi da cúu jahyi da xihín ñaha ñúhu cán já ñacachi xihín táhan na já: “Candehé ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, ñacachi xihín táhan na cán. ³⁹ Ña cán quea ñatiin na da ta ñatavá na da janda yuhú cútu ta cán nasahní na da —ñacachi Jesús sácú a quiahva.

⁴⁰ Anda já nandaca tuhún Jesús na ndúu cán já ñacachi a já:

—Ndía cáhán ndo caja da xihín ñaha ñúhu yóho xihín na cája chúun nu ñúhu dá —ñacachi a.

⁴¹ Anda já ñacachi na cán já xihín Jesús:

—Ña caja da quea cahní da na quini, mé na ñacaja chúun tóo nu ñúhu da cán. Ta já ndiquiahva ndojó da ñúhu da nuú java ga na ña ná caja chúun na nu á. Ta tá jáquee na

ndiquiahva na nu dá ña cáni nu dá ndiquehe da saha ñúhu dá —ñacachi na cán xihín Jesús.

⁴² Já ñacachi Jesús já xihín na cán:

—Á a ñáha cahvi ndó tuhun Ndióxi nu cáchi a:

Mé yuu ña najácana da cávaha vehe,
ña cán cúu ña nanduu yuu ndúhu sahá vehe ña in chága saha.

Ña yóho quea ñacaja Ndióxi,

ta cúu á in ñáha cáhnu ndivaha nu yo, cáchi tuhun Ndióxi.

⁴³ Ña cán quea cáhan i xihín ndó ña cacu xoo Ndióxi ndohó ña ná a cácomí ga mé á cuénta saha ndo. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuénta saha ná, mé na ndiquiahva na nu á ña cáni nu á ndiquehe a. ⁴⁴ Ta cáchi i xihín ndó ña yehe cúu u tátuhun mé yuu cáhan i saha. Ta ndá na ná ndicava jatá yuu cán chí chachi xéhe na. Quiahva já ndihi sahá ñayivi tá co cúni na candúsa na yehe. Ta tá mé yuu cán ná yaha ndicava jatá in na já caji ndihí ñahá. Quiahva já ndihi sahá ñayivi ini indayá tá co cúni na candúsa na yehe —ñacachi Jesús.

⁴⁵ Tá ñaxini johó na cúu sacuahá nuú jutú xihín na fariseo cán ña yóho, ñacandaa táhyí ini na ña saha mé ná cáhan Jesús. ⁴⁶ Sahá ña cán quea nanducú na tiin na mé á joo coó ñacuu caja na sahá ña nayihvi na ñayivi jáchi cándúsa ñayivi cán ña cáhan Jesús cuénta Ndióxi.

22

Sácu Jesús quiahva sahá vicó tándaha

(Lc. 14:15-24)

¹ Tá nandihí já ñacasáha tucu Jesús jánaha ñayivi xihín ndinuhu quiahva. Já cáchi a já xihín ná:

² —Nuú cacomí Ndióxi cuénta sahá ñayivi cúu á tátuhun ña nayaha xihín in rey tá ñacavaha da in víco ña tandaha

jahyi ɬaa da. ³ Nachindahá ɖa mozo ɖa ña ná cuhun ɖa cana da na ndítahan quixi. Joo coó naxeen na quixi na mé víco. ⁴ Anda já nachindahá chága ɖa mozo ɖa ña ná caxi tuhun da nuú na ndítahan quixi cán ña sa nacaja ndívi ɖa ña cuxu na. Sa naxihi tindiQUI xihín java ga quíti, rí nandaha. Sa nacandívi ndihi ñaha cuéntá víco tándaha sahá ña cán queá ná quixi na. Ña yóho cúu chuun natahnda nu mozo cán cachi da xihín na ndítahan quixi cán. ⁵ Joo co ndaa na cán cuhun na. In táhan ɖa cán naquee da cuahan ɖa candehé ɖa nu núhu dá. Ta inga da naquee da cuahan ɖa caja ndahvi ɖa. ⁶ Ta java ga na cán natiin na mozo mé rey cán ta nacaja xíxi na xihín dá janda quiahva nasahní ñahá na. ⁷ Anda já naxojo ndivaha ini rey cán sahá ña cán queá nachindahá ɖa soldado ɖa ña ná cuhun na cahni na nasahní ndi cán ta ná chicaan núhu dá ñuu na. ⁸ Anda já nacachi tucu rey cán já xihín java ga mozo ɖa: “Sa nacandívi tóco ndihi ñaha ña coo víco joo na nacana i cán coó saha toho na quixi na víco. ⁹ Ña cán queá cuahán ndó ndijáá cáyé náhnu ta ndá ñayivi nacuu cana ndó na ná quixi na víco tándaha yóho”, nacachi rey cán nasahnda da chuun nu mozo ɖa. ¹⁰ Anda já naquee mozo ɖa nasahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti natata nacaja na. Ta já najácutú na vehe nuú coo víco tándaha cán xihín ñayivi.

¹¹ Anda já nandihvi rey nu núhu na cán já naxini da ndacaan in dataa, ɖa co ndíxi jáhma ña ndíxi na ndúu víco tándaha. ¹² Ta nacayati mé rey nu dá já nacachi da já xihín dá: “Amigo, ndaja nacajún naquihvún yóho tá co ndíxi tohún jáhma ña ndíxi na ndúu víco tándaha”, nacachi rey xihín ɖa cán. Joo coó nanducú ñehe da tuhun nu rey. ¹³ Anda já nasahnda rey chuun nu mozo ɖa. Já nacachi da já xihín ná: “Cató ndó ndáha dá xihín saha dá. Ta jácana ndó ɖa chí jata nuú naá yávi. Cán cuacu ndivaha da anda

quiahva cahña nuhu da”, cáchí da. ¹⁴ Jáchí cuahá ndivaha cúú ná nacana Ndióxi ña ná cacomí a cuéntá saha joo chá cúú ná ndíquiahva na ndáha mé á ña ná cuu çaxi a na — nacachi Jesús.

Ndáca tuhún na Jesús á ndítahan nu ná चाहvi na jiuhún cuéntá impuesto

(Mr. 12:13-17; Lc. 20:20-26)

¹⁵ Tá nandihí já naquee na fariseo nasahan na jándique táhan na tuhun na ndaja caja na coto ndojó na Jesús xihín tuhun cáhan mé á já ná cuu jácojo na cuachi jatá. ¹⁶ Ña cán queá nachindahá na java na cuéntá mé ná xihín java na cuéntá Herodes nuú Jesús já nacachi na já xihín á:

—Maestro, xini nde ña ndinuhu ña ndaa cáhan mé ndó. Ta cándaá ini nde ña jánaha ndó ña ndaa saha íchi cuéntá Ndióxi. Ta cō quehe ndó cuéntá tá cáhan núu ñayivi saha ndo. Ta cándaá ini nde ña tá cáhan ndó sahá in ñaha cája ñayivi cúú á sahá ña sándehe ndó janda ínima ná. ¹⁷ Sahá ña cán queá cuni nde candaá ini nde ndía cachi ndó sahá ña yóho: Á ndítahan nuú nde चाहvi nde jiuhún cuéntá impuesto nuú da cómí cuéntá sahá ñuu Roma. Á चाहvi nde ña á a चाहvi toho nde ña —nacachi na cán xihín Jesús.

¹⁸ Joo sa nacandaá ini Jesús ña चाहvi núu ini na sahá ña cán queá nacachi a já xihín ná:

—Cō cúú ndó tá quiahva ndaa ndó jáchí cuni ndó coto ndojó cuití ndó yehe. ¹⁹ Jánaha ndó in táhan jiuhún ña चाहvi ndó impuesto jan nuú i —nacachi Jesús.

Anda já nasahan na in jiuhún caa naní denario nu á.

²⁰ Tá naxini Jesús ña yóho já nacachi a já xihín ná:

—Yo nahná ta yo quivi queá ndaa nu á —nacachi a.

²¹ Já nacachi na cán já xihín á:

—Ñéhe a nahná xihín quiví da cómí cuéntá sahá ñuu Roma —nacachi na.

Anda já nacachi tucu Jesús já:

—Ndiquiahva ndó ña cúu ñaha da cómi cuénta sahá ñuu Roma jan nu dá. Ta ndiquiahva ndó ña cúu ñaha Ndióxi nu á —nacachi a.

²² Tá naxini johó na cán ña yóho já nacatóntó na ta najándacoo na a naquee na cuahan na.

Tá ndáca tuhun na Saduceo Jesús á mé a ndaa nditacu ndii (Mr. 12:18-27; Lc. 20:27-40)

²³ Ta sa mé quivi já nasahan java na saduceo cahan na xihin Jesús. Ta mé na saduceo yóho co cándusa na ña nditacu tucu na sa naxihi. Sahá ña cán quea nandaca tuhun na Jesús já cáchi na já xihin á:

²⁴ —Maestro, nu ley nacahyí Moisés sanahá natahnda chuun ta cáchi a já: “Tá tandaha in dataa xihin ñájíhí da ta tá xihí da ta coó jahyi da cacu já quea ndítahan nuú ñani da tandaha dá xihin ña cuaan nacandoo cán. Ta já ná coo jahyi da cán xihin yuhú nuú ñani da”, cáchi ley Moisés. ²⁵ Ta viti cuni johó ndó ná cacu nde in quiahva nu ndó. Tañu mé nde yóho nasanduu usa ñani. Ta da nu cuítí cán natandaha dá xihin in ñáñáha. Tá nandihi já naxihi da. Joo sahá ña coó jahyi da nacacu xihin ñájíhí da sahá ña cán quea nandiquehe ñani da, da chí ivi jata dá ñá cuaan cán. ²⁶ Ta quiahva já nandoho ri da chí ivi cán jáchi naxihi da ta coó jahyi da nacacu xihin ña. Ta janda ndihusa ñani cán natandaha xihin ña ta ndihusa da naxihi ta ni in da coó nacacu jahyi xihin ña. ²⁷ Ta tá nu ndíhí naxihi ri ñáñáha cán va. ²⁸ Ta viti cachi ndó xihin nde tá ná xinu quiví nditacu tucu ndii, ndá da cacuu ndusa yí ñá cán jáchi ndihusa ñani cán natandaha xihin ña ñuyiví yóho —nacachi na saduceo cán xihin Jesús.

²⁹ Anda já nacachi Jesús já:

—A váha toho cáhán ndo jáchi co xini ndó ndaja cáhan tuhun Ndióxi ta ni co xini ndó ndá quiahva cáhnu cúu

ndée Ndióxi. ³⁰ Jáchí mé quiṽi tá ná nditacu tucu ndii a tándaḥa ga ná ta ni a quiáhva na jahyi jíhí na tándaḥa ná. Cacuu na tátuhun tátō Ndióxi ndúu indivi ta cō tándaḥa na cán. ³¹ Joo sa xíní yō ña nditacu tucu ndii. Á a ñáha cahvi ndó tuhun Ndióxi nu cáchí a já: ³² “Yeḥe cúú Ndióxi ña cája cáhnu Abraham ta yeḥe cúú Ndióxi ña cája cáhnu Isaac ta yeḥe cúú Ndióxi ña cája cáhnu Jacob viti”, naçachi a. Ta ña yóho cúní cachi a ña tácu yiṽi va Abraham xihín Isaac xihín Jacob vatí sa na xihí yiquí cuñu na —naçachi Jesús.

³³ Tá naçini jōho ñayivi ndúu cán ña yóho já naçatóntó na xihín ña jánaḥa Jesús nu ná.

Tá cáḥan Jesús ndá ley quéa cáhnu chága

(Mr. 12:28-34)

³⁴ Tá nañehé na fariseo tuhun ña naçuee vaḥa Jesús naçahnu a nuú na saduceo já nañditútú ndihi na. ³⁵ Ta in táhan mé da cán, da jánaḥa ley Moisés nañdaça tuhún da Jesús jáchí cúní da coto ndojó da mé á. Já naçachi da já:

³⁶ —Maestro, ndíá cúú ña cáhnu chága sáhdá ley Moisés caja í —naçachi da cán xihín Jesús.

³⁷ Já naçachi Jesús já xihín dá:

—Ña cáhnu chága nu ley Moisés cúú ña yóho: “Ndíta-han quiḥvi ini ndó Ndióxi, xitoho ndó xihín tóco ndihi ínima ndó ta xihín ndinuhu ini ndó ta xihín tóco ndihi xíní túní ndo.” ³⁸ Ña yóho cúú ley nu cuítí ta cúú á ña cáhnu chága nu tóco ndihi ley. ³⁹ Ta tá quiáhva ín ña nu cuítí yóho quiáhva já ín ri ña chí ivi va ta cáchí a já: “Xíní ñúhú quiḥvi ini ndó ñani táhan ndó tá quiáhva quiḥvi ini ndó mé ndó.” ⁴⁰ Ta jata ndíví ña yóho tíin tóco ndihi ley Moisés xihín ña najánaḥa na profeta sanahá —naçachi Jesús xihín na fariseo cán.

Ndáca tuhún na Jesús ndáchi naquixi a

(Mr. 12:35-37; Lc. 20:41-44)

⁴¹ Ta nani nanditútú ndihi na fariseo ndúu na nu Jesús cán já ndaça tuhún a na. ⁴² Já nacachi a já xihín ná:

—Ndía cáhvi ini ndó saha Cristo. Ndá chichi cáhán ndo vaxi a —nacachi Jesús xihín ná.

Já nacachi na cán já:

—Vaxi a chichi David, da nasacuu rey sanahá —nacachi na cán xihín Jesús.

⁴³ Anda já nacachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá quea nacachi da ña cúu á xitoho da. Jáchi naxhutú ndaa ínimá David xihín ínimá yii Ndióxi tá nacañyí da já:

⁴⁴ Já nacachi Ndióxi xihín xitoho i:

“Cacoo xoo cuáha i yóho

janda quiahva ná caja i ña ná cacomún cuéntá sahá na co cúní yohó”, nacachi Ndióxi, nacachi David.

⁴⁵ Ndávaha cáhí na ña vaxi Cristo chichi David tá ta sa mé David nacachi da ña cúu á xitoho da —nacachi Jesús.

⁴⁶ Ta chí ni in na coó nacuu caja nducú ñehe na tuhun nu á. Ta janda mé quivi já ni in ga na coó nasahan ndeé ini ndaça tuhún chága na mé á.

23

Chicaan Jesús cuachi jatá na fariseo xihín jatá na jánaha ley Moisés

(Mr. 12:38-40; Lc. 11:37-54; 20:45-47)

¹ Anda já nacachi Jesús já xihín tóco ndihi ñayivi ta xihín na xíca tuun xihín á cán já:

² —Na jánaha ley xihín na fariseo cúu ná na ndítahan nuu ndicani na ña cúní cachi ley Moisés. ³ Ña cán quea xíní ñúhú caja ndó tóco ndihi ña jánaha na nu ndo. Joo a cája toho ndó tá quiahva cája mé ná jáchi co cája na ña jánaha mé va na. ⁴ Jáchi cája na ña ná coo ihvi ndivaha ley janda

quiahva cō ndeé ini ñayivi cája na ña. Joo mé ná ni loho tíin cō chindeé ñahá na. ⁵ Ta cája na tóco ndihi ñaha ña ná cuni ñayivi na jáchi cátóo na candico listoni náhnu jini ná xihín jico ndáha ná nu ndaa tuhun Ndióxi. Ta cátóo na coo lándá chága yuhú jáhma ná a juú ga java ga ñayivi. ⁶ Ta tá cuahan na víco cátóo na coo na nuú vaha cuití va. Ta tá quíhvi na veñuhu cátóo na cacoo na nu sácoo na iin chága saha. ⁷ Ta cátóo na ña ná cahan toni ñúhú ndivaha ñayivi xihin ná tá xíca nuu na nuú yahvi. Ta chí a juú quiahva cátóo na ña ná cachi ñayivi 'maestro' xihin ná.

⁸ Joo ndóhó cō ndítahan nu ndó nducú ndó ña ná cahan ñayivi 'maestro' xihin ndo. Jáchi in ñani cúu ndihi ndó ta in túhún cúu maestro ndo, mé á cúu Cristo. ⁹ Ta a cáhan ndo tátá cáhnu xihín ni in ñayivi ñuyívi yóho jáchi in túhún Ndióxi cúu á tátá ndo ta mé á iin a indivi. ¹⁰ Ta a nducú ndo ña ná cahan ñayivi 'jefe' xihin ndó jáchi in túhún laá va cúu jefe ndo, mé a cúu Cristo. ¹¹ Ndá da cúu da cáhnu chága tañu ndó xíní ñúhú da cája chúun da sahá ndihi ndó. ¹² Jáchi ndá na ndíñehe jícó mé, jánuu ndáha Ndióxi na. Joo ndá na jánuu ndáha mé nu Ndióxi, jándíñehe jícó mé á na.

¹³ Ndáhví nacuu ndó, na jánaḥa ley Moisés xihín na fariseo jáchi cō cúu ndó tá quiahva ndaa ndó. Jáchi sáji nuu ndó nuú ñayivi já ná a cuú cacomí Ndióxi cuéntá saha ná. Ta ni ndóhó cō ndíquiahva ndó mé ndó ndáha Ndióxi ná cacomí a cuéntá saha ndo. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi. ¹⁴ Ndáhví nahá nacuu ndó, na jánaḥa ley Moisés xihín na fariseo jáchi cō cúu ndó tá quiahva ndaa ndó. Jáchi cándaa ndó vehe najihí cuaan ta tá nandihí cuahá ndivaha xíca tahví ndo nu Ndióxi jáchi cuni ndó jájahvi ndó nuú ña núu cája ndó. Sahá ña cán queá cáhí i xihin ndó ña ndóhó cacuu ndó na ndoho chága ini, caja

Ndióxi.

¹⁵ 'Ndáhví nahá nacuu ndó, na jánaha ley Moisés xihín na fariseo jáchi cō cúú ndó tá quiahva ndáa ndó. Jáchi a juú quiahva xíca nuu ndó ndúcú ndo in tálaa ñayivi ña ná candico na ña jánaha ndo. Ta tá sa nandaja ndó na cuéntá mé ndó já cája chága na cuachi janda cáni a nu ná ndoho chága ini na indayá a juú ga mé ndó.

¹⁶ 'Ndáhví nahá nacuu ndó jáchi cúú ndó tátuhun na cuaá ndáca inga na cuaá. Jáchi jánaha ndó ñayivi ña tá sáhan na tuhun na nuú inga ñayivi nani tává na quivi veñuhu cáhnu já queá cō ndúsa jáxinu cōo na tuhun na. Joo cáchi ndo ña tá tává na quivi jiuhun cuáan ndácaan veñuhu cáhnu já queá ndúsa jáxinu cōo na tuhun na, já cáchi ndo. ¹⁷ Joo tóntó ndivaha ndó ta cúú ndó tátuhun na cuaá viti. Jáchi cō cánda ini ndó ña íin chága sahá veñuhu cáhnu a juú ga sahá jiuhun cuáan jáchi mé jiuhun cuáan cúú á cuéntá Ndióxi sahá ña ndácaan ini veñuhu cáhnu ña cúú cuéntá mé á. ¹⁸ Ta inga tucu ña jánaha ndó nuú ñayivi cúú ña yóho: Tá sáhan in na tuhun na nuú ñayivi nani tává na quivi nu náa Ndióxi já queá cō ndúsa jáxinu cōo na tuhun na. Joo cáchi ndo ña tá tává ñayivi quivi ña sájocō na cánúu nu náa cán já queá ndúsa jáxinu cōo na tuhun na, já cáchi ndo. ¹⁹ Joo tóntó ndivaha ndó ta cúú ndó tátuhun na cuaá. Jáchi íin chága sahá nu náa cán a juú ga sahá ña sájocō na cánúu nu náa jáchi ña sájocō na cán cúú á cuéntá Ndióxi sahá ña cánúu a nu náa cuéntá mé á. ²⁰ Sahá ña cán queá ndá na tává quivi nu náa já queá tává ndihi ri na quivi tóco ndihi ña sájocō na cánúu nu náa cán. ²¹ Ta ndá na tává quivi veñuhu cáhnu já queá tává ri na quivi Ndióxi jáchi cán íin mé á. ²² Ta ndá na tává quivi indivi já queá tává ri na quivi Ndióxi xihín quivi nu sácoo a sáhdá a chuun.

²³ 'Ndáhví nahá nacuu ndó, na jánaha ley Moisés xihín

na fariseo jáchi cō cúú ndó tá quiahva ndáa ndó. Mé ndó cávaha ndó uxu táhnda ña jáquee ndó ñundáhyi ndo ta sáhan ndó in táhnda ña nu Ndióxi. Já cája ndó anda yucu válí ña támi sáhan tátuhun menta xihín anís xihín comino. Joo cō cája ndó ña ñin chága saha ña sáhnda ley Moisés. Jáchi cō cája ndó ña ndaa ta cō cándáhví ini ndó ñayivi ta cō cándeé ini ndó Ndióxi tá quiahva sáhnda ley caja ndó. Mé a ndaa xíní ñúhú cája ndó tóco ndihi ña yóho joo a jándacoo ndó ña jóco ndó nu Ndióxi in táhnda nuú uxu táhnda ña ñéhe ndó. ²⁴ Mé ndó cúú ndó tátuhun na cuaá ndáca inga na cuaá. Jáchi ndinuhu ini ndó cája ndó ña cōó cuahá saha cuénta ley Moisés joo sácú xoo ndó ña ñin chága saha nu Ndióxi caja ndó. Cúú ndó tátuhun in da ndíhi ini da tavá da in ndicama loho ndácaan tásá da ná a cócō da ri. Joo cō íhvi toho nu dá cócō da in camello.

²⁵ 'Ndáhví nahá nacuu ndó, na jánaha ley Moisés xihín na fariseo jáchi cō cúú ndó tá quiahva ndáa ndó. Jáchi ndíhi ini ndó caja ndó costumbre ña ndícata ndó jata vaso xihín jata cōho joo ña ñúhu ini a cán najátaca cuíhna ndo sahá ña ndiáva ndivaha ini ndó ña núu. ²⁶ Ndáhví nahá nacuu ndó, na fariseo jáchi cúú ndó tátuhun na cuaá. Ña ndítahan caja ndó nu cuítí quea ndaja vií ndó ínimá ndó já cacuu ndó tátuhun in vaso á in cōho sa nandicata vaha na jáchi nandivií ini a xihín jata viti.

²⁷ 'Ndáhví nahá nacuu ndó, na jánaha ley Moisés xihín na fariseo jáchi cō cúú ndó tá quiahva ndáa ndó. Cúú ndó tátuhun vehe válí ndíta camasanto nu táán na ndji. Ndató jándicuchu na jata joo chí ini a a juú quiahva quini sáhan jáchi ndinuhu lásá ndji ñúhu ini a. ²⁸ Quiahva já cúú mé ndó jáchi ndáa ndó tátuhun ñayivi vaha ndivaha. Joo mé a ndaa cō cúú ndó tá quiahva ndáa ndó jáchi ndinuhu ña núu ndácaan ínimá ndo.

²⁹ 'Ndáhví nahá nacuu ndó, na jánaha ley Moisés xihín

na fariseo jáchi cō cúú ndó tá quiahva ndaa ndó. Cá-
vaha ndó vehe válí ndíta camasanto nuú cañuhu lásá na
nasacuu profeta sanahá ta jácacutú ndó nuú nanduxu na
naja ndaa. ³⁰ Ta cáchí ndo já: “Ta tá nasanduu nde
tiempo nasanduu tásánu jícó yo sanahá ta chí a chindeé
toho nde na nasahni profeta, na nasanduu sanahá”, cáchí
ndo. ³¹ Ta xihín ña yóho náha táhyí a ña naquixi ndó
chichi na nasahni profeta sanahá. ³² Cuahán ndo jáxinu
cōo ndó mé cuachi nacasáha cája tásánu jícó ndo sanahá.

³³ Mé ndó cúú ndó tátuhun cōo jáchi cája ndó tá
quiahva cája cōo. A cuú cacu ndaa ínima ndó ta chí tandaa
quivi cūhun ndó indayá nu ndoho ndivaha ini ndó. ³⁴ Sahá
ña cán quea yehe chindahá i java profeta nu ndo xihín
java na ndichí xihín java na jánaha tuhun Ndióxi nu ndo.
Joo java na cahní ndó na ta java na cata caa ndó na ndica
cruxu ta java na cani ndó na ini veñuhu ta java na taxí ndó
na tá ñuu tá ñuu. ³⁵ Ña cán quea cacā Ndióxi cuénta nu
ndó saha tóco ndihi ñayivi ndaa, na nasahni ndo sanahá.
Caca mé á cuénta saha Abel, da nasacuu da ndaa janda
quiahva naxinu cōo a nuú cacā mé á cuénta saha Zacarías,
da nasacuu jahyi Berequías. Mé da yóho nasahni ndó ini
veñuhu tañu nu náa xihín nuú yji ndivaha. ³⁶ Mé a ndaa ná
cahan i xihin ndo ña cacā Ndióxi cuénta saha tóco ndihi
ndii jan nuú ñayivi ndúu tiempo viti.

Tá sácu Jesús sahá ñayivi ndúu ñuu Jerusalén

(Lc. 13:34-35)

³⁷ Ndáhví nahá nacuu ndó, na ndúu ñuu Jerusalén.
Jáchi sáhní ndó na profeta. Ta ndicuita ndó cáni ndó na
xihín yuu na nachindahá Ndióxi nu ndó. Cuahá ndivaha
tañu cúni jándataca ndihi i ndohó joo cōo naxeen ndó cuni
joho ndó. Cúú á tá quiahva cája nduxú tá játa rí jahyi
válí rí tixi ndixi rí. ³⁸ Ta viti cuni joho ndó ña cahan i
xihin ndo. Vaxi quivi tá jani ndáha mé vehe ndó candōo

a. ³⁹ Ta mé a ndaa ná cahan i xihin ndó ña a cúní ga ndó yehe janda quiahva ná xinu coo quivi cachi ndó: “Cáhnú nahá ná cacuu da vaxi cuéntá Ndióxi, xitoho í”, cachi ndó —nacachi Jesús xihin na cán.

24

Cáxi tuhun Jesús ña vaxi quivi ndihi sahá veñuhu cáhnú ndácaan ñuu Jerusalén

(Mr. 13:1-2; Lc. 21:5-6)

¹ Ta tá sa naquee Jesús veñuhu cáhnú Jerusalén cán cuahan já nacativi na xica tuun xihin á nu á ta nacasáhá na cahan na xihin á ndá quiahva cáa veñuhu cán. ² Joo nanducú ñehe Jesús tuhun nu ná já nacachi a já:

—Mé a ndaa ná cahan i xihin ndó ña janda ni in yuu yóho a cándoó jatá inga yuu jáchi vaxi quivi tá nditaní ndihi ña yóho —nacachi Jesús xihin na xica tuun xihin á cán.

Ña coo tá sa nacayati quivi ndihi sahá ñuyivi

(Mr. 13:3-23; Lc. 21:7-24; 17:22-24)

³ Anda já naquee Jesús cuahan chí yucu nu cáa yitó olivo xihin na xica tuun xihin á. Ta nani ndúu na cán nacativi na xica tuun xihin á nu íin coo a cán já nacasáhá ndáca tuhún xóo na a já nacachi na já xihin á:

—Cúní nde ña ná caxi tuhun ndó xihin nde ndá ama coo tóco ndihi ña yóho. Ta ndaja coo tá ná xinu coo quivi quixi tucu ndó ñuyivi yóho. Ta ndaja coo tá ná ndihi sahá ñuyivi —nacachi na xihin Jesús.

⁴ Já nacachi Jesús já:

—Cuéntá coo ndó ná a jándahvi ni in na ndohó. ⁵ Jáchi cuahá ndivaha na quixi na cuéntá mí i ta cahan na ña tuhún tá cachi na já xihin ndó: “Yehe cúú Cristo, da nachindahá Ndióxi cacomí cuéntá sahá ñayivi”, cachi na. Ta xihin ña yóho cuahá ndivaha ñayivi jándahvi na. ⁶ Ta

jandá johō ñehe ndó tūhun ña ndicuīta ñayivi cani táhan na yóho á cáa. Joo a cáyihví toho ndó jáchi já ndítahan coo. Joo ña yóho co cúnī cachi a ña naxinu coo quivī nu ndíhí. ⁷ Jáchi ñayivi ndúu in nación ndicuīta na cani táhan na xihín na ndúu inga nación. Ta quixi tama ta quixi cuehe ta ndaja táhan quixi a táan. ⁸ Ta ña yóho cacuu a tondóhó ña casáhá jihna ñúhú vaxi nuú ñayivi jáchi cámani xinu coo nuú ndoho chága ini na.

⁹ Andá já tiin na ndohó ta ndiquiahva na ndohó ndahá na co cúnī ndohó já ná caja xíxi na xihín ndo. Ta cahní na ndohó ta tóco ndihi ñayivi ndúu ñuyiví candají na ndohó sahá yehe. ¹⁰ Ta mé tañu já cuaha ná jándacoo na ña candeé ini na yehe ta ndaja táhan mé ná candají táhan na ta ndaja mé ná jicó tūhún táhan na. ¹¹ Ta quixi cuahá ndivaha na tūhún ta cachi na cúu ná profeta cuéntá Ndióxi joo jándahvi na cuahá ndivaha ñayivi. ¹² Ta sahá ña ndicuahá ndivaha ña núu ñuyiví yóho sahá ña cán queá jándacoo cuahá ñayivi ña quíhvi ini táhan na. ¹³ Joo ndá na ná candico tuun íchi mí i janda ná xinu quiví quivi na, na cán cacuu na cacu ndaa ínima. ¹⁴ Ta níí cúu ñuyiví ndicuīta nuu tūhun vaha cáhan sahá yehe já ná candaa ini ñayivi ndá quiahva cacomí Ndióxi cuéntá saha ná. Andá jáví ndihi saha ñuyiví.

¹⁵ Na cáhvi tutu ná candaa ini na ña cáhan. Sanahá nacahyí profeta Daniel sahá in ña quini ña játiví ñahá. Tá ná cuni ndó ña xinu coo ña yóho nuú yii cuéntá Ndióxi ¹⁶ já queá ndá na ndúu estado Judea xíní ñúhú cunu na cūhun na chí yúcu. ¹⁷ Ta ndá na cándójó jiní vehe, co ndítahan nuu na tavá na ndá ñaha vehe na. ¹⁸ Ta ndá na ndúu yúcu, ná a ndicó coo na vehe na ndiquehe na jáhma ná. ¹⁹ Ndáhví nacuu najihí, na ñúhu jahyi mé quiví já. Ta ndáhví nacuu najihí na néhe ndaa na valí táhan ña chíchí yii. ²⁰ Caca tahví ndo nu Ndióxi ña ná a cacuu a tiempo

vixi tá ná cunu ndó cuhun ndo. Ta caca tahví ndo nu á ña ná a cacuu a quivi ndíquehe ndée ná. ²¹ Jáchí quiví ndoho ndivaha ini ñayivi cacuu a cán. Jáchí janda tá nacava sáhá saha ñuyiví coó nandoho ini na tá quiahva ndoho ini na mé quivi já. Ta tá ná yaha ña jan, a ndíco coo ga ña ndoho ini na quiahva já. ²² Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá na sa nacaxi mé á sahá na cán ndaja cuítí mé á tiempo cán.

²³ Ta tá ná cachi in na xihin ndó: “Candehé ndo. Yóho íin Cristo, da nachindahá Ndióxi cacomí a cuéntá sahá ñayivi.” Á tá ná cachi na: “Candehé ndo. Caa íin da”, cachi na, já queá a cándusa toho ndó na. ²⁴ Jáchí quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan na cuéntá Ndióxi ta jári caja na cuahá ndivaha ña náhnu xihín ña xitúhún ña ná jándahvi na ñayivi. Ta janda na sa nacaxi Ndióxi jándahvi na tá ná cuu caja na ña. ²⁵ Candehé ndo jáchí sa nacaxi tuhun yachí ndihi i ña yóho xihin ndo. ²⁶ Ña cán queá tá ná cachi na xihin ndo: “Candehé ndo. Yucú íchí caa íin Cristo.” Já queá a cuhun ndó jan. Á tá ná cachi na xihin ndo: “Candehé ndo. Ini vehe yóho ndácaan da cúu Cristo.” A cándusa ndó na. ²⁷ Jáchí tá quiahva yehe tása quéta xoo nu cána candii ta xójo cava indiví quiahva já queta yehe, da nachindahá Ndióxi nduu ñayivi. ²⁸ Mé nu candúhu yiquí cuñu ndji cán cacuu nuú ndicutú tiyocó canduu rí.

Ndá quiahva coo tá ná quixi tucu Jesucristo

(Mr. 13:24-37; Lc. 21:25-33; 17:26-30, 34-36)

²⁹ Ta ivi laá tá jacá nayaha quiví ndoho nahá ini na cán já canaa nuú candii ta ni a ndíyehe ga yoo ta janda indiví quee quimi cuyu rí nu ñúhu ta janda indiví ña nacavaha Ndióxi ndiquiji nuu. ³⁰ Anda já ndaca náha ña xitúhún indiví já candaa ini ñayivi ña vaxi yehe, da nachindahá

Ndióxi nduu ñayivi. Ta ndaja táhan ñayivi ndúu níí cúú sahá ñuyíví ndahyi cóhó na ta já cuni na yehe quixi i tañu viço indiví xihín tóco ndihi ndeé e ta cuni na ndá quiahva cáhnu cúú yehe. ³¹ Ta já chindahá i tátó mí i ña ná tiví cóhó na trompeta já ná nditaca tóco ndihi na ñacaxi i tañu tóco ndihi ñuu janda níí cúú saha ñuyíví ta janda níí cúú sahá indiví.

³² Jácuaha ndó ña cúní cachi mé quiahva sácú u nu ndó sahá yító titó ñuhú. Jáchí tá yúta ndáha dó cán ta já vaxi núma válí do já candaa ini ndó ña sa ñacayati tiempo ihní. ³³ Quiahva já cuu candaa ini ndó ña tá ná cuni ndó ña sa cúú tóco ndihi ña ñacachi i xihín ndo yóho já cuu candaa cáxí ini ndó ña sa ñacayati tiempo quixi tucu yehe ñuyíví yóho. ³⁴ Mé a ndaa ná cahan i xihín ndo ña yaha tóco ndihi ña yóho ta anda javí quivi na ndúu tiempo viti. ³⁵ Ta ndihi saha indiví xihín ñuyíví joo a ndíhi toho sahá tuhun ñacahan i xihín ndo yóho jáchí coo tá coo tá quiahva ñacachi i yóho.

³⁶ Joo ni in túhún toho ñayivi co xíní na ndá quiví a ndá hora yaha ña yóho. Ni mé tátó Ndióxi ndúu indiví co xíní na ndá quiví coo ña yóho. Ta ni yehe, da cúú in túhún jiní já jahyi Ndióxi co xíní ndá quiví coo ña yóho. In túhún Ndióxi, tátá i quéa xíní a. ³⁷ Tá quiahva nayaha tiempo tá ñasahín Noé sanahá quiahva já yaha ri tá ná tandaa quiví quixi tucu yehe, da ñachindahá Ndióxi nduu ñayivi. ³⁸ Jáchí mé tiempo cán tá cámaní cuun javí quíni cán já cáxixi ñayivi ta cáxihi na ta tándaha ná ndúu na janda quiahva ñaquihvi Noé ini barco cáhnu cán. ³⁹ Ta coo ñaquehe na cuéntá janda quiahva ñaxinu coo javí quíni cán ta najánaa dó sahá ndihi na. Quiahva já a quéhe na cuéntá saha ndá quiví quixi yehe, da ñachindahá Ndióxi nduu ñayivi. ⁴⁰ Mé tiempo já canduu ivi dataa xútu da ta in da ndindita cuhun xihín i ta inga da candoo va. ⁴¹ Ta

canduu *iv̄i* najihí ndíco na ta in ñá ndindita *cuh̄un xih̄in i* ta inga ñá candoo va.

⁴² Xíní ñúhú coo *tiahva vaha* ndó *jách̄i c̄o xín̄i* ndó ndá *quiv̄i quixi tucu xitoho* ndó. ⁴³ Xíní ñúhú *candaa vaha* ini ndó ñá tá *xín̄i in dataa* ndá hora *cún̄i quih̄vi taa cuihná* vehe da já *quéa a cúju* toho da *jách̄i candaa vaha* da vehe da já ná *a quih̄vi da cuihná* vehe da. ⁴⁴ *Sahá ña cán quéa* ndítahan canduu *tiahva* ri ndóhó va. *Jách̄i xin̄u c̄o yehe,* da *nachindahá Ndióxi* nduu ñayivi mé hora tá *c̄o cáhán ndo xin̄u c̄o i nu* ndo.

Da cája chúun vaha ta da c̄o cája chúun vaha

(Lc. 12:41-48)

⁴⁵ Mé ndó ndítahan *nu* ndó *cacuu* ndó *tátuhun* in da *ndíchí jin̄i,* da *cája chúun vaha nuú* xitoho da. Ta *najándacoo* xitoho da *chuun ndáha dá ña ná quiahva* da *cuxu na java ga cúu* mozo *xih̄in da cán.* *Anda* já *naquee* xitoho da *cuahan da.* ⁴⁶ *Tahví nacuu* mé mozo *cán tá xin̄u c̄o* xitoho da ta ndítahan *da cája chuun yii* va da ña *nacandoo nu* dá *caja* da. ⁴⁷ Mé *a ndaa* ná *cahan i xih̄in ndo ña quiahva* xitoho *da cán chuun nu* dá ña ná *cacomí da cuéntá saha* tóco *ndihi ñaha cómí* xitoho da. ⁴⁸ *Joo tá cásahá da cája núu* da ta *cáhán da ña cayáncá* *ndivaha* xitoho da *ndicó c̄o* da. ⁴⁹ *Ta saha ña cán quéa cásahá da cája xíxi* da *xih̄in java ga na* *cúu mozo xih̄in dá.* Ta já *cáa ga da cásahá xíxi* da ta *xíhi* da ta *já xín̄i* da. ⁵⁰ *Ta ndaja* coo *xin̄u c̄o* xitoho mozo *cán mé quiv̄i c̄o cáhán da ña xin̄u c̄o* da. ⁵¹ *Anda javí jándoho* *quini* xitoho *da cán* ini da *jách̄i c̄o cúu dá tá quiahva* *cáa* da. Ta ndítahan *ndoho* da tá *quiahva ndoho tóco ndihi na cája* já mé *nuú cuacu* *ndivaha* na *janda quiahva cáhña nuhu* ná —*nacachi Jesús.*

25

Sácú Jesús quiahva saha ña nacaja uxu najihí, na tacú

¹ Já cáchí tucu Jesús já:

—Tá ná xinu coo quivi cacomí Ndióxi cuéntá sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá ñaquehe na candil ña ñúhu sítí ini já cuahan na ndique táhan na xihín da tándaha cán. ² Uñun táhan na tacú cán cúu ná na tácu ini ta uñun na cán cúu ná na co tácu toho ini. ³ Ndiñuhun na co tácu ini cán ñatiin na candil ñaha na cuahan na joo coo ñaquehe chága na sítí ña jácutú tucu na candil tá sa cúní ndahva ña. ⁴ Joo na tácu ini cán ñehe na candil ñaha na ta ñehe ri na yúyú sítí cuahan na ña jácutú na candil tá sa cúní ndahva ña. ⁵ Ta ndaja coo ñacasáhá cáyáncá mé da tándaha cán sahá ña cán quéa nanaá ini ndihi na ta ñaquiji va na. ⁶ Joo tá ñacuu yati java ñúú já tácu cáyuhú java na já cáchí na já: “Candehé ndo. Sa vaxi da tándaha. Cuahán queta ndó ndiquehe ndó da”, cáchí na cáyuhú na cán. ⁷ Já ñandacoo tóco ndihi na tacú cán ta ñacasáhá na cája ndívi na candil ñaha na. ⁸ Anda já ñacasáhá ndiñuhun na co tácu ini cán cáhan na xihín ndiñuhun na tácu ini cán já cáchí na já xihín ná: “Caja ndó ñamaní quiahva loho ndó sítí ndo nuú nde jáchi sa ñandihí sítí nde ta jalóho cúní ndahva candil ñaha nde”, cáchí na co tácu ini cán. ⁹ Já ñanducú ñehe ndiñuhun na tácu ini cán tuhun nu ná já cáchí na já: “A cúu toho caja nde quiahva nde sítí nu ndó jáchi tiaha náa ndimaní dó nu mé nde. Vaha chága cuahán mé ndó nu cáyahvi dó cueen ndó do”, ñacachi na tácu ini cán xihín ná. Já ñaquee na co tácu toho ini cán cuahan na. ¹⁰ Joo nani ñaquee ndiñuhun na co tácu ini cán cuahan na cueen na sítí na já ñaxinu da tándaha cán ta ñandihvi ndiñuhun najihí tácu ini cán ini vehe nu íin vicó tándaha cán ta ñandaji yéhe. ¹¹ Tá ñandihí já ñandai cuu ndiñuhun na nasahan ñaxeen sítí cán já cáti ndaha ná yéhe ta cáyuhú na já cáchí na já: “Cuná loho ndó yéhe nuú nde, xitoho”,

cáchí n̄ cáyuhú n̄ ndíta na j̄at̄ véhe. ¹² And̄a j̄a n̄anducú ñehe d̄a t̄and̄ah̄a cán tuhun n̄u ná j̄a cáchí d̄a j̄a x̄ih̄in ná: “C̄o x̄in̄i toho i yo cúú ndóhó”, n̄acachi d̄a cán x̄ih̄in ná —n̄acachi Jesús.

¹³ J̄a n̄acachi tucu Jesús j̄a:

—Sah̄á ñ̄a cán qūea x̄in̄i ñ̄uhú cuéntá v̄aha coo ri ndóhó va j̄ách̄i c̄o x̄in̄i ndó ndá hora x̄in̄u c̄o qūiv̄i cacomí Ndióxi cuéntá sah̄a ndo —cáchí Jesús.

Ñ̄a n̄acaja in t̄aa x̄ih̄in j̄iuhún d̄a

(Lc. 19:11-27)

¹⁴ Ta j̄a cáchí tucu Jesús j̄a:

—Tá ná x̄in̄u c̄o qūiv̄i cacomí Ndióxi cuéntá sah̄á ñ̄ayivi j̄a cacuu a tátuhun ñ̄a nayaha x̄ih̄in in dat̄aa. Tá n̄ax̄in̄u c̄o qūiv̄i quee da c̄uhun x̄icá d̄a j̄a n̄acana da java d̄a cája chúun x̄ih̄in dá. Ta j̄a n̄andiquiahva da j̄iuhún d̄a ndahá d̄a cán ñ̄a ná candaa da ñ̄a. ¹⁵ Ta tá quiahva t̄iahva in in da cañehe da j̄iuhún quiahva j̄a nas̄ahan xitoho da n̄u dá. In t̄áhan d̄a cán nas̄ahan xitoho da ūhun mil n̄u dá ñ̄a ná candaa da ñ̄a. Ta inga d̄a cán nañehe iv̄i mil. Ta inga d̄a cán nañehe in mil. And̄a j̄a naquee xitoho da cuah̄an x̄icá d̄a. ¹⁶ Ta ndaja coo d̄a n̄andiquiahva xitoho ūhun mil ndáha cán n̄acaja da ndah̄vi x̄ih̄in j̄iuhún xitoho da ta j̄a nañehe dá inga ūhun mil ch̄ága jatá. ¹⁷ Ta j̄ari d̄a nas̄ahan xitoho iv̄i mil n̄u cán n̄acaja da ndah̄vi x̄ih̄in j̄iuhún cán ta nañehe dá inga iv̄i mil jatá. ¹⁸ Joo d̄a nas̄ahan xitoho in mil n̄u cán n̄atiin da j̄iuhún xitoho da ta j̄a nas̄ahan d̄a n̄acaan da in ȳavi ta j̄a naj̄ánduxu da ñ̄a.

¹⁹ Ta tá sa nayaha cuah̄a tiempo j̄a n̄andicó c̄o xitoho mozo cán. Ta j̄a n̄acasáhá cája vií d̄a cuéntá x̄ih̄in da cán. ²⁰ Ta j̄a n̄ax̄in̄u d̄a nañehe ūhun mil cán nuú xitoho da ta j̄a n̄andiquiahva da inga ūhun mil ñ̄a nañehe dá jatá j̄iuhún cán nuú xitoho da. Ta j̄a cáchí d̄a j̄a x̄ih̄in xitoho da: “Candehé ndo ūhun mil nas̄ahan ndó nuú i. Joo

yóho íin inga uḥun mil nañehé e jatá”, naçachi da xihín xitoho da. ²¹ Anda já naçachi xitoho da já xihín dá: “Vaha ndivaha naçajún. Mozo vaha ndivaha cúu yóhó jáchi chá va naçahan i nuun ta vaha naçaja chúun ña. Sahá ña cán queá caja i ña ná cacomún cuéntá sahá cuaha chága ñaha. Ta viti cuu coún xihín i ta já ná caji chága inún”, naçachi xitoho da. ²² Tá nandihí já naxinu coo ri da nandiquehe ivi mil cán nuú xitoho da. Já naçachi da já xihín xitoho da: “Ivi mil naçahan ndó nuú i joo yóho íin inga ivi mil nañehé e jatá”, naçachi da xihín xitoho da. ²³ Anda já naçachi xitoho da já xihín dá: “Vaha ndivaha naçajún. Mozo vaha cúu yóhó jáchi chá va naçahan i nuun ta naçaja chúun vahún ña. Sahá ña cán queá caja i ña ná cacomún cuéntá sahá cuaha chága ñaha. Ta viti cuu coún xihín i ta já ná caji chága inún”, naçachi xitoho da. ²⁴ Joo tá naxinu coo ri da nañehé in mil ndahá xitoho cán já naçasahá cáchi da já xihín xitoho da: “Candehé ndo, xitoho i. Sa cándaq vaha ini i ña cúu ndó in ta ndacú ndivaha tuhun. Ta vatí co xútu ndó nuú in ñúhu joo jáquee tá jáquee ndó nu á. Ta játaca ndó ña nuú coo naxutu ndó ña. ²⁵ Sahá ña cán queá nayihví vi ta naçahan i najánduxu u jiuḥún naçahan ndó nuú i tixi ñúhu. Joo yóho íin jiuḥún ndo ndiquehe ndó ña”, naçachi da cán xihín xitoho da. ²⁶ Anda já naçachi xitoho da já xihín dá: “Co cúun in mozo vaha nuú i. Cúun da júsa ndivaha. Sa cándaq vaha inún ña jáquee e nu ñúhu ña co xútu u, ²⁷ ña cán queá ndá cuéntá queá coo naçahan tóun jiuḥún i banco já ná ndiquehe e jiquí á nuú na cán tá ná ndicó coo i, nduu”, naçachi xitoho da cán xihín dá. ²⁸ Anda já naçachi da xihín java na ndúu cán: “Candaa ndó in mil jan ndahá da jan ta quiahva ndó ña nuú da sa cómí uxu mil jan. ²⁹ Jáchi da cája chúun vaha ñehé chága ví da ñaha já queá ná coo cuahá chága nu dá. Joo da co cája chúun vaha janda ña chá cómí da ndindaa ndáha dá.

³⁰ Ta mozo a váha toho jan tiin ndó da jácana ndó da nuú naá jata véhe jan. Cán cúu nu ndáhyi ndaá ñayivi janda quiahva cáhña nuhu ná sahá ña ndóho ndivaha ini na”, ñacachi xitoho da, —ñacachi Jesús.

Tá ná cavií sahá ñayivi nu Ndióxi

³¹ Já ñacachi tucu Jesús já:

—Tá ná xinu quiví quixi yehe, da ñachindahá Ndióxi nduu ñayivi ta quixi i xihín tóco ndihi na cúu tátó Ndióxi. Anda já cacoo i nu sácco na sáhná chuun ta já ndicáhu ndivaha i. ³² Ta nditaca ñayivi ndúu ndíjáá ñuyíví nuú i. Ta já casáhá i ndicahnda java táhan i na tá quiahva cája in da ndáá ndicachi tá sáhná java da ndicachi xihín tijúhu ña ná a cáva táhan rí. ³³ Ta já chinduu u ñayivi cuéntá mí i, na cúu tátuhun ndicachi cán xoo cuáha i. Ta xoo íti i chinduu u na co cúu cuéntá mí i, na cúu tátuhun tijúhu cán. ³⁴ Ta sahá ña cúu u da cómi cuéntá sahá ñayivi sahá ña cán queá cachi i já xihín na ndúu xoo cuáha i cán já: “Cuáyaha ndó ná cacomí Ndióxi, tátá i cuéntá saha ndo jáchi cúu ndó na ñacaja cuahá mé á ñamani xihín. Jáchi janda tá cámaní cava sáhá saha ñuyíví sa nasacu tiahva mé á nuú canduu ndó ña cacomí a cuéntá saha ndo. ³⁵ Jáchi nasahan ndó ñaxixi i tá ñacuico i. Ta nasahan ndó ticuíf nuú i tá ñahichi ini i. Ta ñandiquehe vaha ndó yehe tá nasacuu u da tóho ñaxinu i nu ndo. ³⁶ Ta najasá ndo jáhma nuú i tá co ñéhé e ña cándixi i. Ta tá nasaquíhvi já ñachindeé ndó yehe. Ta tá nasandacaan i vecaa já ñaxito nihni ndó yehe.” ³⁷ Anda já ndaca tuhún java na ñacaja vaha ta já cachi na já xihín i: “Ndá tañu queá ñaxini nde ña cuico ndó, xitoho nde ta já nasahan nde ña xixi ndó. Ta ndá tañu ñaxini nde ña íchi ndó ticuíf ta já nasahan nde ticuíf nu ndo. ³⁸ Ta ndá tañu nasacuu ndó da tóho ta ñandiquehe vaha nde ndohó. Ta ndá tañu ñaxini nde ña cámaní jáhma candixi ndó ta najasá nde ña nu ndo. ³⁹ Ta ndá tañu queá

naxini nde ña quíhvi ndo ta naxindeeé nde ndohó. Ta ndá tañu nasandacaan ndó vecaa ta naxito nihni nde ndohó.”
⁴⁰ Anda já cachi yehe, da cómí cuéntá sahá ñayivi já xihín ná: “Mé a ndaa ná cahan i xihín ndó ña tá naja ndó a xihín na cúu cuéntá mí i, na cóo saha nuú ñayivi ñuyíví já cúu á tátuhun naja ndó a xihín mí i”, cachi i xihín na ndúu xoo cuáha i.

⁴¹ 'Anda já casahá cachi i já xihín na ndúu xoo íti i cán já: “Caxoo ndó nuú i jáchi cúu ndó na natavi cháhan ta cuhun ndó indayá cañuhu ndó anda ama cáa quivi. Jáchi ña jan cúu ña nasacu tiahva Ndióxi ndacaan tiñahá sacuaḥa xihín táto mé rí. ⁴² Jáchi cóo nasahan ndó ña xíxi i tá nacuico i ta ni cóo nasahan ndó ticuiví nuú i coho i tá nahichi ini i. ⁴³ Da tóho cúu u naxinu cóo i tañu ndó ta cóo nandiquehe vaha ndó yehe. Ta nandimani i ña candixi i ta cóo nasahan ndó in jáhma loho nuú i. Nasaquíhvi ta nasandacaan i vecaa ta cóo naxito nihni ndó yehe”, cachi i xihín na ndúu xoo íti i cán. ⁴⁴ Anda já nducú ñehe ri na cán tuhun nuú i já cachi na já xihín i: “Ndá tañu quea naxini nde ña cuico ndó ta ndá tañu quea naxini nde ña íchi ini ndó ticuiví ta ndá tañu nasacuu ndó da tóho ta ndá tañu nandimani jáhma ndo ta ndá tañu nasahijn quíhvi ndo ta ndá tañu nasandacaan ndó vecaa ta cóo naxindeeé nde ndohó”, cachi na ndúu xoo íti i cán xihín i. ⁴⁵ Anda já cachi i já xihín na cóo cúu cuéntá mí i já: “Mé a ndaa ná cahan i xihín ndo ña tá ta cóo naja ndó xihín ñani táhan ndó, na cóo saha nuú ñayivi ñuyíví já quea cóo naja ndó ña xihín yehe”, cachi i xihín na cóo cúu cuéntá mí i. ⁴⁶ Ta já yaha ndihi na cán cuhun ná indayá anda ama cáa quivi. Ta na naja vaha cán yaha na nu Ndióxi catacu na anda ama cáa quivi —cáchi Jesús.

26

*Ndítúhún jehé na tiin na Jesús**(Mr. 14:1-2; Lc. 22:1-2; Jn. 11:45-53)*

¹ Tá nandihí naçahān Jesús tóco ndihí ña yóho xihín ñayivi cán já naçachi a xihín na xíca tuun xihín á cán já:

² —Sa cándaā ini ndó ña tixi ivi quivi coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu —naçachi Jesús xihín na xíca tuun xihín á cán.

³ Andá já na sacuaḥa nuú jutú xihín na jánaha ley Moisés xihín na sacuaḥa veñuhu nandique táhan na yéhe Caifás, da cúu sacuaḥa chága nu ndíhi jutú cán. ⁴ Ta najándique táhan tuhun na ndá quiahva caja na tiin jehé na Jesús ña ná cahní ñahá na. ⁵ Já cáchi xihín táhan na já:

—Joo a tíin toho í da tañu mé víco jáchi tiaḥva náá ndivaā ñayivi —naçachi na.

*Tá nachojo in ñáñáḥa perfume jini Jesús**(Mr. 14:3-9; Jn. 12:1-8)*

⁶ Ta ndaja coo íin Jesús ñuu Betania vehe Simón, da cáhan na xihín: taā nandoho cueḥe táhyi. ⁷ Já naxinu in ñáñáḥa nu á ta cáñee in yúyú ña alabastro ndáḥa ña. Ta ini mé yúyú cán ñúhu perfume, dó yaḥvi ndivaḥa. Ta já naxinu ña najácuyu ña do jini Jesús nani íin coo a nu mesa cán. ⁸ Tá naxini na xíca tuun xihín Jesús cán ña yóho já naçasáhá na xójo ini na já cáchi na já:

—Ndá cuéntá queá tíví uun perfume yaḥvi ndivaḥa yóho. ⁹ Jáchi cuu jicó yó do ta já queḥe cuaḥá jiuhún saḥa do, nduu ta já cuu jasá yo jiuhún cán nuú na ndahví —naçachi na cán.

¹⁰ Ta naçandaā ini Jesús ña cáhvi ini na cán ña cán queá naçasáhá cáchi a já xihín ná:

—Ndá cuéntá quéa cája cuehe ndó xihín ñáñáha jan jáchi ña va ha quéa nacaja ñá yóho xihín i. ¹¹ Jáchi na ndahví ní tiempo canduu na tañu ndó joo yehe a cóo tuun toho i xihín ndó. ¹² Jáchi tá najácuyu ñá perfume yiquí cuñu i já nacaja tiaha ñá yehe ná coo tiaha vi tá ná casaa quiví nduxu. ¹³ Mé a ndaa ná cahan i xihín ndó ña ní cúu ñuyiví nuú caca nuu ñayivi cahan na tuhun va ha sahá i ndicani na ña nacaja ñá yóho xihín i já ndicuhun ini na saha ña —nacachi a.

Jícó túhún Judas Jesús

(Mr. 14:10-11; Lc. 22:3-6)

¹⁴ Ta ndaja coo in táhan da uxu ivi xica tuun xihín Jesús, da naní Judas Iscariote nasahan da cahan da xihín na sacua ha nuú jutú. ¹⁵ Ta já cáchí da já xihín ná:

—Ndaja quiaha ndó nuú i tá ná ndiquiaha i Jesús nu ndó —nacachi Judas xihín na sacua ha nuú jutú cán.

Anda já nasahan na oco uxu jihun cúxú nu dá sahá Jesús. ¹⁶ Ta sa mé nani já nacasáhá Judas ndúcú da ndaja cuu caja da ndiquiaha da Jesús ndáha ná.

Tá naxijíni ndayí Jesús xihín na xica tuun xihín á

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Mé quiví nuú víco xíxi na pan, ña co quée yusá naxaa xihín cán já naxinu na xica tuun xihín Jesús cán nu á. Já nacachi na já xihín á:

—Ndáchí cúní ndó cuhun nde caja ndíví nde cajíni ndó víco pascua —nacachi na xihín á.

¹⁸ Anda já nacachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da jána ha ndehe cáchí xuhun: Cuhun i vehe ndó cajíni i víco pascua xihín na xica tuun xihín i jáchi sa nandindaa tiempo cuhun i viti” —nacachi Jesús.

¹⁹ Já ñaquee ña cán ñasahan ña ñacaja na tá ñin ñasahnda Jesús nu ná ta cán ñacaja ndívi ña ña cajíni na vicó pascua.

²⁰ Ta ndaja coo tá ñacuaá já ñasacoo Jesús nu mesa xihín ndíhuxu ivi ña xíca tuun xihín a cán. ²¹ Ta nani xijíni na já ñacasáhá cáchí a já:

—Mé a ndaa ná cahan i xihín ndó ña in táhan ndó, ña xíca tuun xihín i cacuu da jicó túhún yehe —ñacachi Jesús xihín ná.

²² Anda já ñacasáhá ña cán cácuéha ndivaha ini na já ñacasáhá tá in tá in na ndáca túhún ña Jesús já cáchí ña já xihín á:

—Á yehe cacuu da jicó túhún ndo, xitoho i —cáchí ña ndáca túhún ñahá ña.

²³ Anda já ñanducú ñehe Jesús túhun nu ná já ñacachi a já xihín ná:

—Da ñaquíhvi ndáha ini cõho xíxi i, da cán cúú da jicó túhún yehe. ²⁴ Yehe cúú da ñachindahá Ndióxi nduu ñayivi ta ndítahan nuú i quivi i tá ñin cáchí túhun Ndióxi. Joo ndáhví ñahá ñacuu da jicó túhún yehe. Janda vaha chága ná a cácu da, nduu —ñacachi Jesús.

²⁵ Anda já ñandicahan Judas, mé da jicó túhún ñahá cán já ñacachi da já xihín Jesús:

—Xitoho i, á yehe cúú da jicó túhún ndo —ñacachi da xihín á.

—Jivi mún cúú dá —ñacachi Jesús xihín dá.

²⁶ Ta nani xíxi na ndúu na ñatiin Jesús pan já ñandiquiahva ndixahvi nu Ndióxi. Tá ñandihi já ñasahnda java ña ta ñandicahnda ña nuú ña xíca tuun xihín á cán. Ta já ñacachi a já xihín ná:

—Júhun ndó jáchi ña yóho cúú tátuhun yiquí cuñu i —ñacachi a.

²⁷ Tá nãndihi já nãtiin a in vaso nu ñúhu tó uva já nãndiquiahva ndixahvi nu Ndióxi já nãcachi a já xihín na xíca tuun xihín á cán já:

—Coho ndihi ndó dó ñúhu ini vaso yóho. ²⁸ Jáchi dó yóho cúú dó tátuhun níí i, dó cuíta sahá cuahá ñayivi já ná ndoo cuachi na. Tá ná cuíta níí i já candaã ini ndó ñã najáxinu coo Ndióxi tuhun a nasahan sanahá. ²⁹ Mé a ndaa ná cahan i xihín ndo ñã a cóho ga i tó uva janda quiahva ná xinu coo quiví coho tucu u inga dó vaha chága xihín ndo tá ná xinu quiví cacomí Ndióxi, tátá i cuéntá sahá ñayivi —nãcachi a.

*Cáxi tuhun Jesús ñã chijehé tuhún Pedro ñã xini da mé á
(Mr. 14:26-31; Lc. 22:31-34; Jn. 13:36-38)*

³⁰ Ta tá nãndihi nãxita na in canto já naquee na cuahan na yúcu yitó olivo. ³¹ Ta já nãcachi Jesús já xihín ná:

—Mé ñuú viti jándacoo ndihi ndó yehe cuhun ndó sahá ñã ndoho i. Já cáchi tuhun Ndióxi já: “Cahní i da ndáá ndicachi ta xihín ñã yóho ndicuíta nuu ndicachi jana dá cuhun ri”, cáchi tuhun Ndióxi. ³² Joo tá sa ná nditacu tucu u já cuhun jihna ñúhú yehe estado Galilea anda já cuhun mé ndó —nãcachi Jesús.

³³ Anda já nãnducú ñehe Pedro tuhun nu á já nãcachi da já xihín á:

—Vatí ná jándacoo tóco ndihi na mé ndó sahá ñã ndoho ndó joo a jándacoo toho i ndohó —nãcachi da xihín á.

³⁴ Anda já nãcachi Jesús já xihín dá:

—Mé a ndaa ná cahan i xuhun ñã mé ñuú viti tá cámani cana chéle já chijehé tuhún ñã xínun yehe uni táhnda —nãcachi Jesús xihín dá.

³⁵ Anda já nãcachi tucu da já:

—Vatí ná quivi i xihín ndo joo a chijehé tuhun toho i sahá ñã xini i mé ndó —nãcachi da xihín Jesús.

Ta quiahva já nacachi tóco ndihi java ga na xíca tuun xihin á cán.

*Tá xíca tahví Jesús nu Ndióxi in nuú nani a Getsemani
(Mr. 14:32-42; Lc. 22:39-46)*

³⁶ Anda já naxinu coo Jesús xihín na xíca tuun xihín á cán in nuú nani a Getsemani. Já nacachi a já xihín ná:

—Yóho cacoo ndó nani ná cuhun i cáa cacá tahví i nu Ndióxi —cáchi a.

³⁷ Ta ndáca Pedro xihín ndíví da cúu jahyi Zebedeo cuahan xihín á. Ta já nacasáhá cácuéha ndivaha ini a ta a juú quiahva táhvi ini a. ³⁸ Anda já nacachi a já:

—A juú quiahva cácuéha ini i chí quivi i cúu ini i. Yóho candati tóo ndó yehe ta coto a cúju ndo —nacachi Jesús.

³⁹ Ta já naquee mé á nasahan loho chága chí nuú já nacaxítí a janda quiahva naxinu taan nu ñúhu. Ta já cáchi a já:

—Tátá Ndióxi, tá ta ná cuu caja ndó ñamani ña ná a ndóho i ña ihvi ndivaha vaxi nuú i ndoho i. Joo ná coo tá ín cúní mé ndó ta ná a cóo toho ña cúní yehe —cáchi Jesús.

⁴⁰ Tá nandihí já nandicó coo a nuú najándacoo a na xíca tuun xihín á cán ta já nandiñehe á na quíji na ndúu na. Anda já nacachi a já xihín Pedro:

—Á cóo nacuu candita ndó ni in hora. ⁴¹ Xíní ñúhú coo tiahva ndó ta cacá tahví ndo nu Ndióxi já ná a cóto ndojó rí quini ndohó. Jáchi ínima ñayivi cúní a ndinducú a Ndióxi joo yiquí cuñu na coo ín tiahva caja ña cúní Ndióxi —nacachi Jesús.

⁴² Anda já naquee tucu Jesús táhnda ivi cuahan tucu a cacá tahví a nu Ndióxi já cáchi a já:

—Tátá Ndióxi, tá ta a cúu va caja ndó ñamani ná a ndóho ini i ña jan já ná coo tá ín cúní mé ndó coo —cáchi a.

⁴³ Tá nandihí já nandicó ɔo tucu a nu ndúu na xíca tuun xihín á cán ta nandinehe á na quíji tucu na ndúu na jáchi naquehe a mahnú na. ⁴⁴ Já naquee tucu a nasahan xíca tahví a nu Ndióxi táhnda uní ta sa mé tuhun cán nacahan tucu a. ⁴⁵ Anda já naquixi tucu a nu ndúu na xíca tuun xihín á cán já nacachi a já xihín ná:

—Vatí cúní ndó cujú ndó ta vatí cúní ndó ndiquehe ndée ndó joo a cúu caja ndó ña viti. Jáchi sa naxinu ɔo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi. ⁴⁶ Cuáhán ndacoo ndó ná ɔho. Jáchi sa vaxi da jicó túhún yehe —cáchi a.

Tá natiin na Jesús

(Mr. 14:43-50; Lc. 22:47-53; Jn. 18:2-11)

⁴⁷ Ta nani cáhan yíi va Jesús já naxinu Judas, da cúu in táhan uxu ivi na xíca tuun xihín á cán. Ta ndáca da cuahá ñayivi, ñehe na machítí xihín yíto viti. Ta na cán cúu ná na naquixi cuénta na sacuahá nuú jutú xihín cuénta na sacuahá veñuhu. ⁴⁸ Ta mé Judas, da ndiquiahva ñahá cán sa nacandoo da xihín na cán ña tatí yúhu dá sajóho Jesús jáchi nacachi da já xihín ná:

—Ndá da ná tatí yuhú u sajóho, da cán cúu dá tiin ndó —nacachi da.

⁴⁹ Chí ivi laá nacativi da nu Jesús já nacahan Ndióxi dá xihín á ta já natatí yúhu dá sajóho mé á. ⁵⁰ Anda já nacachi Jesús já xihín dá:

—Cama chá cajún ña, amigo.

Anda já nacayati na nu Jesús ta natiin tuun na a.

⁵¹ Joo in táhan da xíca tuun xihín Jesús cán, natavá da machítí da ta já nachitúhun da in johó da cúu mozo nuú da sacuahá chága nu ndíhi jutú cán. ⁵² Anda já nacachi Jesús já xihín dá:

—Chicaan vaha machítí jan jáchi ndá na sáhní xihín machítí, xihín machítí quivi ri na cán va. ⁵³ Á ɔo cánda

inún ña cuu caça tahví i nu Ndióxi, tátá i ña ná chindahá mé á cuaha ndivaha tátó mé á ña ná chindeé na yehe. ⁵⁴ Cuu caja i ña joo xíní ñúhú yaha tá yaha ña nacahyi nuú tuhun Ndióxi ndoho i —cáchi Jesús.

⁵⁵ Ta já nacachi Jesús já xihín na naxinu tiin ñahá cán:

—Cája ndó xihín i tátuhun cája na xihín ta cuihná jáchi naqueta ndó vaxi ndó tiin ndó yehe xihín machítí ta xihín yító viti. Ta ndijáá ní quivi nasahiin i xihín ndo ini veñuhu cáhnu jánaha i tuhun Ndióxi nu ndo ta ni in tañu coo natiin ndó yehe. ⁵⁶ Joo tóco ndihi ña yóho yaha ña já ná xinu coo ña nacahyi na profeta sahá i ini tuhun Ndióxi sanahá —cáchi a.

Tá nandihí já naxinu ndihi na xíca tuun xihín Jesús cán cuahan na ta najándacoo na mé á.

Tá ñéhe na Jesús cuahan na nuú nataca ndihi na sacuahá (Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Tá natiin na cán Jesús já ñéhe na a cuahan na nuú Caifás, da cúu sacuahá chága nu ndíhi jutú. Ta cán sa nanditútú na jánaha ley Moisés ndúu na xihín na sacuahá veñuhu. ⁵⁸ Joo ndaja coo nasandico xíca Pedro Jesús anda quiahva naxinu da yéhe vehe da cúu sacuahá chága nu ndíhi jutú cán. Ta já nandihvi da nasacoo da nu ndúu soldado cán sándehe da ndá quea caja na xihín Jesús.

⁵⁹ Ta na sacuahá nuú jutú xihín tóco ndihi na cómi cuénta sahá na Israel nataca na cán ndúcú na cuachi jácojo na jatá Jesús já ná cuu cahní ñahá na. ⁶⁰ Joo coo nañehe ná cuachi jíquí ña cuu chinúu na jata mé á vatí naxinu coo cuahá na nacahan ña tuhún sahá. Anda jáví naxinu coo ivi ga da cahan ña tuhún sahá. ⁶¹ Já nacachi da já:

—Naxini johó nde nacachi da jan já: “Jánditani i veñuhu cáhnu cán ta jácandichi tucu u ña tixi uní quiví”, cáchi da —nacachi na cán chícaan na cuachi jatá Jesús.

⁶² Anda já nandaca ndichi da cúu sacuahá chága nu ndíhi jutú cán já cáchí da já xihín Jesús:

—Á chí a ndúcú ñehún tühun nuú nde sahá cuachi jácojo na jatun —nacachi da.

⁶³ Joo ni in tühun coó nanducú ñehe Jesús nu dá. Anda já nacachi da cúu sacuahá chága nu ndíhi jutú cán já xihín á:

—Tavún quivi Ndióxi, ña tácu ín indiví ta cachún xihín nde á jivi ndusa yóhó cúún Cristo, da cúu in túhún jini já jahyi Ndióxi, da nachindahá mé á cacomí cuéntá sahá ñayivi —nacachi da xihín Jesús.

⁶⁴ Já nanducú ñehe Jesús tühun nu dá já nacachi a já:

—Ajan, jivi yehe cúu u da cáchí ndó jan. Ta viti ná cahan í xihín ndó ña vaxi quivi tá cuni ndó yehe, da nachindahá Ndióxi nduu ñayivi cacoo í xoo cuáha Ndióxi, mé á ín cuaha ndéé. Ta já cuni ndó yehe ndicó coo í ñuyiví yóho tañu vico tá ná quixi í chí indiví —nacachi a.

⁶⁵ Tá naxini johó da sacuahá chága nu ndíhi jutú cán ña yóho já nandatá da jáhma dá ña ná candaa ini ñayivi ña xójo ini da. Ta já nacachi da já:

—Ndája núu da yóho Ndióxi. Coó chicuu chága yó ñayivi ná cahan na xihín yo jáchi sa naxini johó ndihí ña nacannahá da yóho xihín Ndióxi. ⁶⁶ Ta ndaja xíní ndó caja í xihín dá viti —nacachi da.

Anda já nacachi ndihi na cán já:

—Ín cuachi da jan ta ndítahan cuhun da quivi da —nacachi na cán.

⁶⁷ Ta já nacasáhá na xihnu ndaa na tójií na nu á. Ta nacasáhá túxú na yiquí a. Ta java na cáni jahndá nuu á.

⁶⁸ Ta já cáchí na já xihín á:

—Cahan xihín nde yo nacani yohó tá ta mé a ndaa cúún Cristo, da nachindahá Ndióxi cacomí cuéntá sahá ñayivi —cáchí na xihín á.

*Tá năchijehé tŭhun Pedro ñă xínĭ dă Jesús
(Mr. 14:66-72; Lc. 22:56-62; Jn. 18:15-18, 25-27)*

⁶⁹ Ta ndaja coo ín coo Pedro yuhú yéhé dă cúú săcuaha chága nŭ ndíhi jutŭ cán. Já năcativi in ñáñáha, ñá cája chúun mé vehe cán. Já năcasáhá cáchĭ ñă já xĭhĭn dá:

—Yóhó cúún in táhan dă xĭca tuun xĭhĭn Jesús, dă estado Galilea —năcachi ñá cán xĭhĭn dá.

⁷⁰ Joo ndaja coo năchijehé tŭhun Pedro nŭ ndíhi nă cán ñă xínĭ dă Jesús. Já cáchĭ dă já:

—Cŏ xínĭ toho ĭ ndá săha cáhŭn —năcachi da xĭhĭn ñá cán.

⁷¹ Ta tá să năqueta da yéhé cán já năxini inga ñáñáha dă já năcasáhá cáchĭ ñă já xĭhĭn tócó ndihi nă ndúu cán:

—Năxini ĭ năxĭca tuun dă yóho xĭhĭn Jesús, dă ñuu Nazaret cán —năcachi ñá cán.

⁷² Ta já năcasáhá tucu Pedro chíjehé tŭhun da ñă xínĭ dă Jesús ta nătavá dă quĭvĭ Ndióxi já cáchĭ dă já:

—Cŏ xínĭ toho ĭ ndá dă cúú dă jan —năcachi Pedro xĭhĭn nă cán.

⁷³ Chá va năyaha ñă yóho ta năcayati java nă ndúu cán nŭ Pedro. Já năcachi na já xĭhĭn dá:

—Mé a ndăa táhyĭ jivi táhan nă xĭca tuun xĭhĭn Jesús cúú ri yóhó va jáchĭ cáhŭn tátŭhun cáhan nă cán —năcachi na xĭhĭn dá.

⁷⁴ Andă já năcasáhá Pedro cánahá dă ta nătavá dă quĭvĭ Ndióxi ñă cŏ xínĭ dă Jesús. Já cáchĭ dă já:

—Cŏ xínĭ toho ĭ ndá dă cúú dă jan —năcachi da.

Tá năcachi da já chí ĭvĭ laă năcana chéle. ⁷⁵ Andă já nădicŭhun ini Pedro ñă năcahan Jesús xĭhĭn dá tá năcachi a xĭhĭn dá: “Tá cámanĭ cana chéle să chíjehé tŭhún ñă xínŭn yehe ŭnĭ tañu.” Andă já năqueta da jată véhe ta a juú quĭahva sácu da jáchĭ cácuéha ndivaha ini da.

27

*Tá nandiquiahva na Jesús ndáha Pilato**(Mr. 15:1; Lc. 23:1-2; Jn. 18:28-32)*

¹ Tá nativi inga quiví itaan já nandique táhan ndihi na sacuahá nuú jutu xihín na sacuahá veñuhu ña nditúhún na ndá quiahva jácojo na cuachi jatá Jesús já ná cuu cahní ñahá na. ² Sahá ña cán queá nacató na mé á ta ñehe na a cuahan na ndiquiahva na mé á nu Pilato, da cúu gobernador ñuu cán.

Tá naxihí Judas

³ Ta ndaja coo naxini Judas, da najicó túhún Jesús ña nasacu ini na cán cahní na Jesús. Já naxahvi ini da sahá ña núu nacaja da chí ndáva da cuahan da nducú ñehe da ndíhoço uxu jihun cúxú nuú na sacuahá nuú jutu xihín nuú na sacuahá veñuhu. ⁴ Já nacachi da já xihín na cán:

—Cuachi cáhnu ndivaha queá nacaja i jáchi najicó túhún i in da coo cuachi.

Já nacachi na cán já xihín dá:

—Co sáhní toho nde mé nde sahá ña yóho. Mún xini ndá queá nacajún —nacachi na cán xihín dá.

⁵ Anda já nacuihna Judas jihún cán ini veñuhu cáhnu. Ta já naqueta da nasahan da nacata caa da mé dá já nasahní da mé dá.

⁶ Ta já najátaca na sacuahá nuú jutu jihún cán já nacachi xihín táhan na já:

—A váha toho ña ná chicao yó jihún yóho ini sató nu táan na jihún jóco na nu Ndióxi jáchi ndii naxihí sahá ña yóho —nacachi na.

⁷ Ta tá sa nanditúhún vaha xihín táhan na já naxeen na in ñúhu xihín jihún cán. Mé ñúhu cán naní a ñúhu da cávaha ñaha xihín ñundáhyi. Ta ñúhu cán cacuu a nu jánduxu na na tóho. ⁸ Sahá ña cán queá nasacu na

quivi ñúhu cán ña cananí a yójo nuú naxita nii. Ta já naní a janda viti. ⁹ Ta xihín ña yóho naxinu coo nuú ña nacañí profeta Jeremías sanahá tá nacachi da já sahá Jesús: “Natiin na ndíhoço uxu jiuñun cúxú jáchi ña jan nasacuu yahvi nasacu na Israel chahvi na saha dá. ¹⁰ Ta xihín mé jiuñun cán naxeen na ñúhu naní a ñúhu da cávaha ñaha xihín ñundáhyi jáchi quiahva já nasahnda Ndióxi chuun nuú i caja i”, cáchi tuhun Ndióxi.

Tá cándichi Jesús nu Pilato

(Mr. 15:2-5; Lc. 23:3-5; Jn. 18:33-38)

¹¹ Ta ndaja coo cándichi Jesús nu Pilato, da cúu gobernador. Ta já nacasahá da cán ndáca tuhún ñahá da já cáchi da já xihín á:

—Á mé a ndaa cúun in rey, da cómi cuénta sahá na Israel.

—Ajan. Jivi ndusa cúu u tá quiahva cáchi ndó jan — nacachi Jesús xihín dá.

¹² Ta na sacuaña nuú jutú xihín na sacuaña veñuhu nachicaan na cuachi jatá Jesús joo ni in tuhun coo nanducú ñehe a nu ná. ¹³ Andá já nacachi Pilato já xihín Jesús:

—Á co xini joho tohún ndaja cuahá nuú cuachi jácojo na jatun — nacachi da.

¹⁴ Joo ni in túhún tuhun coo nanducú ñehe Jesús nu dá. Chí catóntó ndivaha da cúu gobernador sahá ña co cáhan Jesús.

Sácú ini na ndaja caja na ña ná quivi Jesús

(Mr. 15:6-20; Lc. 23:13-25; Jn. 18:38-19:16)

¹⁵ Tañu mé víco pascua nasahjin costumbre da cúu gobernador cán sá janí da in táhan da ndácaan vecaa. Ndá da cúní ñayivi janí da, da cán cúu da janí da. ¹⁶ Mé tañu já nasandacaan in da naní Barrabás vecaa. Níí cúu naxita

nuu tuhun sahá da yóho. ¹⁷ Ta tá n̄ataca ndihi ñayivi já n̄andaça tuhún Pilato na já n̄acachi da já xih̄in ná:

—Yo cún̄i ndo ña ná janí i. Á Barrabás janí i á Jesús, da cáh̄í na cúu Cristo, da n̄achindahá Ndióxi cacomí cuéntá sahá ñayivi. Yo janí i cún̄i ndo —n̄acachi da.

¹⁸ N̄acachi Pilato ña yóho xih̄in ná jách̄i sa cándaã vaha ini da ña sahá ña cáh̄ihvi ini na xih̄in Jesús sahá ña cán queá n̄andiquiahva na mé á nu dá. ¹⁹ Ta nani ín coo da nu sác̄oo da sáh̄ndá da chuun vechúun cán já n̄achindahá ñájíh̄i da tuhun nu dá já n̄acachi ñá já: “A quíhvi ndáh̄un Jesús jách̄i cúu dá in taa ndaa. Ñuú anda véhe nasaní i n̄acaja Jesús ta ndícani ndivaha ini i sahá”, n̄acachi ñá.

²⁰ Joo ndaja coo na sacuah̄a nuú jutu xih̄in na sacuah̄a veñuhu cán n̄ajáchan na ñayivi ña ná caca na nu Pilato ña ná janí da Barrabás ta ná cah̄ní da Jesús. ²¹ Anda já n̄acachi da cúu gobernador cán já xih̄in ná:

—Yo cún̄i ndó ña ná janí i.

Anda já n̄acachi na cán já:

—Barrabás jan va janí ndó —n̄acachi na xih̄in dá.

²² Anda já n̄acachi tucu Pilato já xih̄in ná:

—Ndía cún̄i ndó caca i xih̄in Jesús, da cáh̄í ndo cúu Cristo.

Anda já n̄acachi tóco ndihi na cán já:

—Cata caa ndó da ndica crúxu.

²³ Anda já n̄acachi tucu Pilato já xih̄in ná:

—Ndá cuachi n̄acaja da, vaha —n̄acachi da xih̄in ná.

Joo xih̄in ña yóho ví ga ví n̄acasáhá cáyuhú na já cáh̄í na já:

—Cata caa ndó da ndica crúxu.

²⁴ Ta tá n̄axini Pilato ña co yáa na cán ta ví ga ví ndívaa na já n̄atiin da ticuif̄i ta n̄andahá da nu ndíhi ñayivi cán ta já n̄acachi da já xih̄in ná:

—Xihín ña yóho jánaḥa i nu ndo ña coo cuachi toho ndójo i saha ndá ña ná caja ndó xihín da yóho jáchi coo cuachi toho da yóho. Jata mé ndó ná cuhun ndihi va — nacachi da xihin ná.

²⁵ Anda já nacachi tóco ndihi na cán já:

—Vaha ná candojo nde cuachi ta janda jahyi nde viti ná candojo na cuachi sahá ña ná quivi da — nacachi na cán xihin dá.

²⁶ Anda já najaní Pilato Barrabás. Ta tá nandihí najá-caxáhan na Jesús já nandiquiahva da a ndáha ná ña ná cata caa na a ndica crúxu.

²⁷ Anda já ñéhe soldado cuéntá gobernador cán Jesús yuyéhe vechúun. Já najátaca soldado cán java ga táhan da ta cán nacava toyivi da mé á ndúu da. ²⁸ Tá nandihí já natavá na jáhma á. Anda já nachinúu na in jahmá cuhá túun jata. ²⁹ Ta já nachinúu na in tiyivi ínu jini á. Ta nachínee na in ndoo ndahá cuáha. Ta já nacasáha na caxítí na nu á já sácú ndaa ichi ñahá na já cáhí na já xihin á:

—Cáhnú nahá ná cacuu yóhó, da cúu rey nuu na Israel — nacachi na.

³⁰ Ta nacasáha xihnu ndaa na tójií na nuu á. Ta já cándaa na ndoo cán ndáha á ta cáni na yiquí jini a xihin do. ³¹ Ta tá sa nandihí nasacú ndaa ñahá na já nacandaa na jáhma nachinúu na jata cán ta najácandixi tucu na a xihin jáhma mé á. Anda já ñéhe na a cuahan na cata caa na a ndica crúxu.

Tá nacata caa na Jesús ndica crúxu

(Mr. 15:21-32; Lc. 23:26-43; Jn. 19:17-27)

³² Ta tá ñéhe na Jesús cuahan na cata caa na a já nanditahan na in da naní Simón, da ñuu Cirene. Ta nacaja ndúsa na xihin dá ña ná ndicojo da crúxu nuú cata caa na Jesús. ³³ Ta naxinu coo na xiquí naní Gólgota. Tuhun yóho cúní cachi a: nu ndúu lásá yiquí jini ndi. ³⁴ Mé cán

naṣahaṇ na vino nu á, dó naçava táhan xihín ña ova ña ná coho a do. Joo tá naçito ndojó a do coó naçeen toho a coho a do.

³⁵ Ta tá sa nandihí naçata caa na a ndica crúxu já naquehe na jáhma á nandicahnda nu táhan na. Joo jihna ñúhú naçajíquí na sahá ta da naquee vaḥa cán, da cán nandiquehe jáhma á. Xihín ña yóho naçinu coo nuú ña naçahyí profeta sanahá tá naçahyí da já: “Nandicahnda nu táhan mé ná cotó níhnu i ta já naçajíquí na sahá cotó maá i ta da naquee vaḥa cán nandiquehe da ña”, cáchí tuhun Ndióxi. ³⁶ Ta já naçacço soldado cán ndúu na ndáá ñahá na. ³⁷ Ta jiní ndica crúxu cán naçahyí na ndá saḥa naçata caa na a já cáchí a já: “Da yóho cúu Jesús, da cúu rey nuú na Israel.”

³⁸ Ta sa mé já naçata caa ri na ivi ta cuíhna xihín Jesús: in da xoo cuáha ta inga da xoo íti. ³⁹ Chí cáva jiní mé ñayivi yáha cán cáñahá na xihín á. ⁴⁰ Ta já cáchí na já:

—Yóhó cáchún jánditani veñuhu cáhnu cán ta tixi uní víxí quívi cáchún jácandichi tucún ña. Tá ta mé a ndaa cúun jahyi Ndióxi jáçacu mún ta cuáhán nuu ndica crúxu jan —naçachi na xihín Jesús.

⁴¹ Ta quiḥva já naçaja ri na saçuahá nuú jutu xihín na jáñahá ley Moisés xihín na saçuahá veñuhu. Sácu ndaa na a já cáchí na já:

⁴² —Najáçacu da java ga ñayivi ta viti chí a cuú caja da jáçacu da mé dá. Tá ta mé a ndaa cúu dá rey nuú na Israel, ná nuu da ndica crúxu viti ñúhú já ná candúsa nde da. ⁴³ Cándéé ini da Ndióxi ta cáchí da cúu da jahyi Ndióxi já queá ná quixi Ndióxi chindeé a da tá ta mé a ndaa quíhvi ini a da —naçachi na cán cáñahá na xihín Jesús.

⁴⁴ Quiḥva já cáñahá ri ndíví ta cuíhna táca in in xoo jíin á cán xihín á.

*Tá naxihí Jesús**(Mr. 15:33-41; Lc. 23:44-49; Jn. 19:28-30)*

⁴⁵ Tá naxinu coo caxivi ndaa nacanaá níí cúú ñuyíví ta janda caa uní sahini já nacasáhá nandiyehé tucu. ⁴⁶ Ta sa mé hora já nacayuhú cóhó Jesús já nacachi a já:

—Elí, Elí, lama sabactani —ñá yóho cúni cachi a: Ndióxi mí i, Ndióxi mí i, ndávaha najándacoo ndáha ndó yehé.

⁴⁷ Ta java na ndíta cán tá naxini johó na tühun cáhí a já nacachi na já:

—Cána da profeta Elías —nacachi na cán.

⁴⁸ Ivi laá xínu in da nasahan da nachindaxi da in ticoto ini vino iyá. Ta nacató da ña nuú in yitó ndoo já nachínee da do yati yúhu Jesús ña ná coho a do. ⁴⁹ Joo na java ndíta cán nacachi na já xihin dá:

—Cóho candehé yo á quixi Elías jácacu a da —nacachi na cán.

⁵⁰ Anda já nacayuhú cóhó tucu Jesús já naxihí a. ⁵¹ Ta ndaja coo nandatá java ndaa jahmá ndeé ña sáji nuu nuú yii ndivaha veñuhu cáhnu ñuu Jerusalén cán. Janda jini á ta janda sahá nandata. Ta mé hora já nataan ta ndijáa yuu tóto ndúu cán nandata. ⁵² Ta nanuna cáva nu nasañuhu na naxihí ta cuahá ñayivi, na nasacuu cuéntá Ndióxi nanditacu tucu na. ⁵³ Ta tá sa nanditacu tucu Jesús já naxinu na naqueta cáva cán ñuu Jerusalén ta cuahá ndivaha ñayivi naxini ñahá.

⁵⁴ Ta da cúú sacuahá nuú soldado cuéntá Roma xihin da ndáa Jesús xihín da cán tá naxini da ña nataan ta naxini da java ga ña nayaha cán já nacasáhá yíhvi ndivaha da. Já nacachi da já:

—Mé a ndaa táhyí cúú da yóho in túhún jini já jahyi Ndióxi —nacachi da.

⁵⁵ Ta mé cán nasandita cuahá najihí sándeheé xicá na Jesús. Mé na cán cúú na nacaja ndívi ñahá nu Jesús tá

nandico na mé á naquixi na janda estado Galilea. ⁵⁶ Tañu najihí cán nasandacaan María, ñá ñuu Magdala xihin María, ñá cúú náná Jacobo xihin José. Ta cán nasandacaan ri ñá cúú náná ndíví da cúú jahyi Zebedeo.

Tá nachicaan na yiquí cuñu Jesús ini cáva
(Mr. 15:42-47; Lc. 23:50-56; Jn. 19:38-42)

⁵⁷ Ta ndaja coo nasahiin in da cuicá naní José, da ñuu Arimatea. Mé da yóho nasacuu da in táhan da nasaxica tuun xihín Jesús. Ta tá sa nacuaá já naxinu da ⁵⁸ nasahan da cahan ndahví da xihin Pilato ña ná ndiquiahva da yiquí cuñu Jesús nu dá. Anda já nasahnda Pilato chuun ña ná ndiquiahva na ña nu dá. ⁵⁹ Ta já nachitiví José cán yiquí cuñu Jesús xihín in jáhma vaha ña ví. ⁶⁰ Ta já nachicaan da yiquí cuñu Jesús ini in yávi ña saá ndacaan ndica cáva ña jacá nacaán da cuéntá mé dá. Ta tá nandihí já nachijahví da yuhú cáva cán xihín in yuu jáhnda cáhnu ta já naquee da cuahan da. ⁶¹ Ta nu yéhe mé cáva cán nasanduu coo María, ñá ñuu Magdala xihin inga ñá naní María cán.

Tá ndáá java soldado nu ndacaan Jesús

⁶² Ta ndaja coo sa nandihí nacaja ndíví na ñaha cuéntá quivi ndíquehe ndée na. Ta inga quiví itaan najátaca táhan na sacuaḥa nuú jutú xihín na fariseo já nasahan na nu Pilato. ⁶³ Já nacachi na já xihin dá:

—Vaxi nde nu ndo caça loho nde ñamani nu ndó. Jáchi ndícuḥun ini nde ña tá nasatacu Jesús, da naxica jándahví ñayivi cán nacachi da ña tá sa ná yaha uní quiví já nditacu tucu da. ⁶⁴ Ña cúní nde queá ná chindahá loho ndó na cuḥun candaa nuú nachicaan na yiquí cuñu da cán janda quiahva ná yaha uní quiví. Jáchi tiaḥva náá xinú coo na naxica tuun xihin dá ñuú ta caja cuíhná na yiquí cuñu da. Ta já casáhá cachi na xihin ñayivi ñuu ña nanditacu tucu

Jesús tañu na naxihí. Ta xihín ña yóho jándahvi chága na ñayivi a juú ga jihna —nacachi na.

⁶⁵ Anda já nacachi Pilato já:

—Cañehe ndó in táhndá soldado. Cuáhán ndó candaa ndó nu ndacaan da tá quiahva xini mé ndó caja ndó —cáchi Pilato xihin ná.

⁶⁶ Anda já naquee na cán nasahan na já nachicají vaha chága na nu ndacaan yiquí cuñu Jesús cán. Ta nasacu na sello yuu jáhndá cán ta já nasacu na soldado ña ná candaa da ña.

28

Tá nanditacu tucu Jesús

(Mr. 16:1-8; Lc. 24:1-12; Jn. 20:1-10)

¹ Tá sa nayaha quivi ndíquehe ndée ná ta nativi inga quivi itaan já naxinu María, ña ñuu Magdala xihín inga María cán sándehe na nuú nachicaan na yiquí cuñu Jesús cán. ² In naá cuití nataan ndeé ndivaha. Nayaha ña yóho jáchi nanuu in táto Ndióxi indiví. Ta najátivi a yuu jáhndá nasajahvi nuú nasandacaan yiquí cuñu Jesús cán. Ta já nasacoo a jatá. ³ Ta yéhe mé táto Ndióxi cán tá quiahva yéhe tasa. Ta jáhma ndíxi a cúú á jahmá yaa cachi. ⁴ Ta a juú quiahva ná yihví soldado ndúu cán nacaja táto Ndióxi chí nacasáhá quíji ninu da. Ta já nacuyu da nu ñuhu tátuhun ndi naxihí. ⁵ Joo ndaja coo táto Ndióxi cán nandicahan xihín najihí cán já nacachi a já xihin ná:

—A cáyihví toho ndó. Sa xini vaha i ña ndínducú ndo Jesús, ña nacata caa na ndica crúxu. ⁶ Coó toho a cán ín yóho jáchi sa nanditacu tucu a tá quiahva nacachi mé á xihin ndo. Naha ndó candehé ndo nuú nasahjin a já cuni ndó ña coo ga ín nuú nasacu na ña. ⁷ Ta cama ndó cuhun ndó caxi tuhun ndó xihín da naxica tuun xihin á ña sa nanditacu tucu Jesús tañu na sa naxihí. Ta viti cánúú mé

á cuahān estado Galilea. Ta tá cuhūn ndó cán já cuni ndó a. Ta ndicuhun ini ndó ña ñacachi i xihīn ndo —ñacachi táto Ndióxi cán.

⁸ Anda já ñaquee mé najihí cán mé nuú ñasandacaan yiquí cuñu Jesús. Ta vatí yíhví na joo cávatá ndivaha na ta sahá ña cán quea xínu na cuahān na caxi tuhun na ña yóho nuú na ñaxica tuun xihín Jesús cán. ⁹ Ta nani cuahān na ivi laá sa ín va Jesús xihīn ná. Já ñacachi a já xihīn ná:

—Ndióxi ná coo xihīn ndo.

Anda já ñacayati na cán nu á já ñanumi na sahá ta ñacaja cáhnu na a. ¹⁰ Anda já ñacachi tucu Jesús já xihīn ná:

—A cáyihví toho ndó. Cuáhán ndo caxi tuhun ndó xihín na cúu cuéntá mí i ña ná cuhūn na estado Galilea jáchi cán cuni na yehe —ñacachi Jesús xihín najihí cán.

¹¹ Ta nani xínu najihí cán cuahān na já ndáva java soldado, da ñasandaa nuú ñasandacaan Jesús cán ñaxinu da ñuu Jerusalén já ñacaxi tuhun da ña ñacuu nuú na sacuahā nuú jutu. ¹² Anda já najátaca táhan na sacuahā cán xihín na sacuahā veñuhu já najándique táhan na tuhun na ta já ñasahan cuahá ndivaha na jihún nuú na soldado cán. ¹³ Já ñacachi na já xihín soldado cán:

—Coto a cáhan ndó ña ñanditacu Jesús. Ña cachi ndó cúu ña yóho: “Na ñaxica tuun xihīn á cán, na cán cúu na ñaquixi ñuu ta ñacaja cuíhna na yiquí cuñu a nani ñaquiji nde”, já cachi ndó xihīn ndá na ná ndaca tuhún ndohó. ¹⁴ Ta a cáyihví toho ndó tá ná candaa ini da cúu gobernador sahá ña yóho jáchi cáhan mé nde xihīn dá ta chindeé nde ndohó ña ná a cája da ni in ñaha xihīn ndo —ñacachi na sacuahā cán xihīn soldado.

¹⁵ Anda já ñaquehe da cúu soldado cán jihún ta ñacaja da tá quiahva ñasahnda na sacuahā cán chuun nu dá. Ta

xihín ña yóho nandicuiṭa nuu tuhun sahá ña ñayaha cán. Ta cáhan na Israel cán sahá ña yóho janda quivi víti.

*Tá sáhdá Jesús chuun nuú na ñaxica tuun xihín á
(Mr. 16:14-18; Lc. 24:36-49; Jn. 20:19-23)*

¹⁶ Joo ndíhuxu in na ñaxica tuun xihín Jesús cán ñasahan na chí Galilea. Já nandaa na in jini yucu tá quiahva ñasahnda mé Jesús chuun nu ná. ¹⁷ Ta tá ñaxini na mé á já ñacaja cáhnu na a. Joo java na cáhvi ivi joho ini na jáchi co cándusa na ña nanditacu tucu a. ¹⁸ Anda já ñacayati Jesús nu ná já ñacachi a já xihín ná:

—Ñasahan Ndióxi ndée nuú i caja i ña náhnu ndivaha indivi xihín ñuyivi yóho. ¹⁹ Sahá ña cán quéa cuáhán ndo jánaḥa ndo nuú ñayivi ndúu ndijáá ñuyivi ndaja caja na caca vaha na íchi cuénta mí i. Ta caja ndúta ndó na xihín quivi Ndióxi, tátá i ta xihín quivi yehe, da cúu in túhún jini já jahyi mé á ta xihín quivi ínima yii Ndióxi. ²⁰ Ta jánaḥa ndó na ña ná caja na tóco ndihi ña ñasahnda i nu ndó caja ndó. Ta mé a ndaa coo i xihín ndo ndijáá ní quivi janda quiahva ná xinu coo quivi ndihi saha ñuyivi. Já ná coo — ñacachi Jesús.

Tuhun saá ña najándacoo Jesucristo nu yo: El Nuevo
Testamento en el mixteco de Silacayoapan
New Testament in Mixtec, Silacayoapan (MX:mks:Mixtec,
Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 27 Sep 2019 from source files dated 27 Sep 2019

7f2d3ecf-6d15-55a5-9081-6e970474df2f